


Aka (Hrusso) Bible



Hruso: Aka (Hrusso) Bible (Portions) for India

Aka (Hrusso) Bible
Hruso: Aka (Hrusso) Bible (Portions) for India

copyright © 2024 Bridge Connectivity Solutions Pvt. Ltd.

Language: (Hruso)

Contributor: Bridge Connectivity Solutions Pvt. Ltd.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word.

See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

6ed36eea-a167-5ded-a2d7-08d8d10b8e3c

Contents

Luka	1
Filemon	49

Luka i shi-ñu

Ĝiwbraw

Bzüga go kako ĝiwbraw na vyow vew a vetsü se ye he kako ye Luk i ĝiw cheñe, sünda he kako yo danghuda i galyiw ksü go veksüw Kristan cheñe. Ñom-niti go homeje, i utro ĝübye küĝüw go da. I Tawgyew i shi-ñu truw nüna. I Tawgyew i shi-ñu seyo Tawgyew i shürhaw ná kako ĝida. Ije Polus idra ye Kristan na chiĝa daw Tawgyew ichi chiĝa daw nüna (Kulu. 4:14, 2 Timu. 4:11; 11:1).

Ĝiwbraw i djaga

Odje 60-80 kuw.

Luka i he kako í Kesriya ge ĝilyeñe seyo Rome ge kakuñe ĝimdzoadabi. Kako ĝidaw dzaga na Betlehem, Galil, yahudiya seyo Yerusalemjo du.

Lajovo

Luka ubo yo Tawgyew i shi-ñu ye Tiyufilus í ĝiilyeda. Tiyufilus chemeje “Tawgyew i nülvo daw.” I Kristan í küĝüw ma mo i lyaĝoñ dawma se ye usu-upa yo madanghume. Luka í ĝidaw ge í “Dyewfo” cheñe 1: 3 ge ĝidaw í homeje i Roman gow babu dyew vedujo a du. Añe ge kako ngüdaw ná holaimaje he ye utro ĝübye gojo du. Ichi ĝidaw ge ana vedufodame, “Tawgyew i nüna” seyo “Tawgyew i ĝadz” (Luka 5:24; 19:10; 17:20-21; 13:18).

Ha ma a vew

Jisu iñiñ lañe trumkoige, Luka i Jisu í “Nüna üsañe” cheda. I Tiyufilus í ana ĝida, í ha ñu ná dadrüdama se na se í uw yo danghulafijodawe (Luka 1:4). Luka í ñiku-ñisüw djüngkoi ge í ĝiw yo i kristan nabo hado chemeje Tiyufilus i danghulajobi Tawgyew i shüraw na nüna mauw mow cheñe.

Ñustu gow

Jisu - Nüna uw a.

Udrüla

Jisu í saw seyo ichi kutcho shüw __ 1:5-2:52

2. Jisu i nüna nabo chiĝa daw __ 3:1 - 4:13

3. Jisu ĝaksüivo übraw __ 4:14-9:50

4. Jisu i kros ge jiw __ 9:51-19:27

5. Jerusalem ge Jisu i lüshüw paw, dzüw seyo üshükülyetcho __ 19:28-24:53

Luka i galyiw

¹ Ñimko a ha ha lyilyedama, se ná nüna añe na galyiw ĝipüñejoñe dada.

² Sünda he ñu ná dju nudzoĝ iñiyo hohusedama se naje, seyo, Tawgyew i shi-ñu truñe kahisedaw se naje, se ñu ná ütrüyomdo ñi trukuida.

³ Sünambo, no je ütrüyomdo, he na he í, usupa yo hoksüñe kalyisedaw no, süvzüw Tiyofilus bábo, he na he í magaboliyw ĝi vyeimeje ujoñe vyeda.

⁴ Hado cheholye, bá ha trudrülyedama, se ná umsowgo ba danghuweñe no vyedame.

Dzakariya ñe Elizabet

⁵ Nugo Herodes i Yahudiya ñetrü go ñetrü nugo dañe shüi ñeto ge ana lyikülye: Abiya müga go Jakariya cheñe mügaw a du. Üfum ye, mügaw Arõ yo samtoliyw namko yo a, iñiñi ye Elishiba.

⁶ Sünda se naksü Tawgyew uvro ge chiñifoñe, seyo Prabhu ichi shotuko dügyew ná je da shüw. Úĝü dadrülyedaw ná je madatruw-makitruw da shüw.

⁷ Sünda Elishiba i ügübzümdá naksü agü je ñiwbi. Sünda se naksü kewje keahubi.

Sorgomuko i yo Yohañ í sakülyew ñihowtrü

⁸ Dzakariyas í í ñeşü ná dağań kuwñe, Tawgyew uvro ge, í ñegru ge müga chew daw.

⁹ Sündada mügaw ná daw basha yo dañe kako dzulaw ge iñiñi kakülye, Tawgyew í kügüw ñegru ge jiñe shobrovzü foweñe.

¹⁰ Sündada shobrovzü fomkoi sese vyew na nopsü ge kahuañe kügütsü.

¹¹ Sese Tawgyew ichi sorgomuko a ye shobrovzü fodaw südzüvyepsüĝ vyego psügañe ge gudzukülyedaw ye, í hohu.

¹² Sündá Jakariya í hoglye şüpo lamosha, sünda í ĝew vyehua.

¹³ Seşo ye sorgomuko í í che, “Jakariya, djuĝejodawe hado chemeje bá kügüdaw ye dzühujemme sündada bafum Elishiba yo babó saw a sakülyejome, sünda ba se iñiñi ye Yohañ ñe ñijodawe.

¹⁴ Sünda ba agü saahuñe şüpyo lüshüñe, lüshümfoajome seyo şüpyo nüna na agü sadabi cheñe lüshüjome.”

¹⁵ Hado chemeje í Tawgyew üvro ge sawlyiw chiñifojome; seyo tsü keje matujome; seyo iyañ ulhu ge duluge yo ĝulo güdraw yo güdraavojobi.

¹⁶ Seyo Israyel yo naje şüpo nüna na Tawgyew ichi ge kakultrujome.

¹⁷ I ñihow Eliya í ĝulo seyo küña dafidama dañe üvro üvro kutrojome hado chemeje awu na na üdrü-ulu ye agü nachi ge tchodügyejo; seyo zew chew madzüw na Tawgyewchi ge chiñidrüñe lakujo sünda Tawgyew ibó dafimsofiw dashütrüvojo.

¹⁸ Jakariya í sorgomuko í dzü, hei no künda danghujowa; hado chemeje nobó mukroadabi seyo nofum boje mukromyadabi.

¹⁹ Sorgomuko í í trutcho, “No Gebriyalwa, Tawgyew ichi mukow kewwa sünda üdra gudzusaw ye wa; sündada nó badra chitruweñe seyo bá he ñu ye truweñe kiadaw yewa.

²⁰ Seyo hojo dawew, he ñu ye umsow makalu kuw ba mulyo ĝyojome, sünda mazefijomme, hado chemeje ba nó ñu ye, í ke damdrüñe dafiajoma, sei umsow mavye.”

²¹ Nüna na Jakariya í ĝyokrütsü, sünda mavyenghuahuw lyatsü, hado cheme ñegru ge aña künda uwalajemañe? Vyeñe.

²² Sünda í nopsü kahuadabi abó ñu mazefibi, sündawñe na danghuladabi í ñegru ulunge hama ñita homadadañe, sünda í sei vyeĝelalye seyo mulyo lyadabiñe.

²³ Sünda í sehu datunofiahuñe í í ñe ge katcho.

²⁴ Setasaĝa yo ifum Elishiba somafobi, sünda hubye pom kuw í nudzoĝ ana cheñe müşüñe vye.

²⁵ “Nüna nafo ge nó bümazeamedañe nobó Tawgyew í he ñeto ye ana daidawa.”

Sorgomuko i mariyam itrü a jiku

²⁶ Elishiba agü ñiw yo hubye ĝe kuw sa a Tawgyewchi go sorgomuko Gebriyal í Galili iñiñi Nazrat ñetrü ge,

²⁷ Mimsa nano makaw a ichi ge kiku. Djú Joseb cheñe Dawud í ñeşü go Muhusa a idra ĝulo daida, se nano makaw mimsa iñiñi ye Mariyamwa

²⁸ Sünda Sorgomuko í ichi ge ñelunge jimyoñe che, ba hu je adjüdjüw no je aĝimiw lüshütukoaiwe, Djú Tawgyew í nülwov tukoaidama! Tawgyew í badraşome.

²⁹ I se ñu yo şüpyo ĝelamoag, sünda vyemche, hei küna ñu a djüjemma?

³⁰ Séşo Sorgomuko í í che, Mariyamya; djuĝejoda, hado cheme Tawgyew í nülvo bá tukoaidawa.

³¹ Sünda hojodawe, ba somafojome, sünda ba saw a sakülyejome, ba iñiñi ye Jisu ñe ñijodawe.

³² I şüĝlyiĝjome; seyo bá Soĝgro-yaloñe üsaw chejome; sünda Tawgyew í í awu Dawud í psüĝa ye í djüjome.

³³ Sünda í Yakub í ñeşü ge şüwa nugo da şükejome; sünda í ĝadzü da şükyew ye keje mamütrajome.

³⁴ Mariyam i Sorgomuko í che, “Hei kúnda lyijowa? Nobó muhuje madanghulubi.”

³⁵ Sorgomuko i í trutcho “ĝulo güdraw ye baso ge kamyojome, seyo Toĝgroyama í Ĝagra ye badru ge duñgudrujome; Hado chemeje í ĝulo güdraw yo sakülyalaibi, í Tawgyew üsaw chejome.

³⁶ Sünda hojo dawé, bá ñeşüĝ go Elishiba i je mukromyadabi a saw sakülyemkoiba, hei ichimsoba í na Ügübzüm chebabi, i so mafow hubye ĝe kudaba.

³⁷ Hado chemeje Tawgyew ichi ge ha ñu je madafiwo che ñiwme.”

³⁸ Mariyam i che, “Howe, no Tawgyew i chiĝadambabi, bachi ñu trudo trüduyo dubroñe nodra ana lyimeje.” Sese sorgomuko ye itrü yo katrükralye.

Elizabet ichi ge Mariyam i jiw

³⁹ Sündaw se ñeto Mariyam i kutcho yo gudzuñe pufo go Yahudi na ñetrü a ge ji.

⁴⁰ Sünda Jakariya iñe ge jiñe Elishiba í gagañe da.

⁴¹ Elishiba i Mariyam ichi gaga chewye dzühuhuwñe, seşügudoye ulhu go agü yeje gog, sünda ilishiba i ĝulo güdraw yo tukoa.

⁴² Sünda i gow yo şogzuñe che, ba mim naĝi yo süvzüfowmme, seyo balhu go sheje ye şüvzüw me.

⁴³ Sünda noje hango yo nülvojema, no Tawgyew üyañ ye notrüĝañ a jikuda.

⁴⁴ Sünda holabya bachi gaga chew ye nofu ge dzühubyo dzühügýowñe seşügudo ye nolhu go agü yeje lüshülye gogje.

⁴⁵ Sündada seiye şüvzüwmme, se í djujo umsow vyeñe Tawgyew ichi go, ha ñu ye idra chedama, sei damsojebi.

Mariyam i Tawgyew í troi.

⁴⁶ Sese Mariyam i che, “Nodrü-nolu yo Tawgyew i troime.

⁴⁷ Sünda noĝulo ye, nó gudraw choakejo Tawgyew yo lüshü damme.

⁴⁸ Hado chemeje i í chiĝadam idru ge nülvo hoida, sündada holabya, ayo dalalye shüwa shüw pumnüshüĝi kuw nuna na nó şüvzübram chejome.

⁴⁹ Hado chemeje se bolugobraw Tawgyew i nobo chiĝa dew dew daida, sündada iñiñ ye güdraw me.

⁵⁰ Sünda i nülvo ye se nadra jome, dju í ĝeima, saltso saltsow daw kuw sünañgudrujome.

⁵¹ I í bolugow ye sheiwa, seyo dju nudzo drü-lu ge dafowşoñe daima sena daame-kiamé vye.

⁵² I shotuko dümbraw na psüĝa go dügaaha; Sünda nülvodaw i udruda vye.

⁵³ Luhuşümgraado na gañ uwyo da djü, séso dzomo-külyimodaw na ügzü ufobüla lyadügye.

⁵⁴ I í nüdzog aki-awu na, kulo Israyel na ĝaksüla, hado chemeje se nülvo ye büvyesüdañe.

⁵⁵ Shüwa Abraham ñe i saltsoahuw nadra shüwa duñgudrujo, I küna ñi bupye-ñipye nadra chedama süna.”

⁵⁶ Mariyam i hubye dzü kuw idra ĝyoselyeñe, i ñe ge katcho.

Yohañ Baptisma djüw i sawfo

⁵⁷ Sese Elishiba i samdrü kudabi, sünda i saw sakülye.

⁵⁸ I ĝafopsüĝ-ĝampsüĝ seyo i ñeşüĝ-ñepeĝ na sei dzühulye, Tawgyew i idru ge şüpyo nülvo dadañe, idra ye lüshütuno.

⁵⁹ Sündalye ana a dadawa ñegi şügzü kuwñe se agü í fyuw ñeto kudabi sünda i ñiñi ye ichi awu Jakariya í iñiñ ye ñiweñeda.

⁶⁰ Séso iyañ i che, mowwe; i ñiñi ye Yohañ ñe ñijo dawé.

⁶¹ Sünda na í che, bá ñeşüĝ ge ana üñiñi djuchije ñiwa.

⁶² Sese i ichi awu i damcheñe dzü, ba iñiñi í ha ñiĝoñda?

⁶³ Sündawñe i ĝijo kako prülañe ĝiag, iñiñi ye Yohañ me, sündawñe vyew na mavyenghu-atsüg.

⁶⁴ Sündawñe ichi umdzu ñe zebüla naksü seşügudo ye zefikülye; Sünda i ñu zehuahuw ye Tawgyew i trokülye.

⁶⁵ Sündawñe iñisa ye gyodo na vyew gemoatsü; sünda se ñu ye vyew se Yahudiya nachi ñetrü üñisa üñisa naje şügeatsü.

⁶⁶ Sünda vyew dzühudo na nudzoğ nudzoğ drü-lu ge vyelatsü che, “He agü ye künaajoješoma?” Hado chemeje Tawgyew i ügzü ye idra dubi.

Dzakeriya i ñihow

⁶⁷ Sünda iyaw Jakariya i gulo güdraw yo tukoa, sünda ñihokülye.

⁶⁸ Israyel go Tawgyew í şüvzüwe.

Hado chemeje i í nudzo nüna ná hokrüvo,

Sünda ná gaksüivo,

⁶⁹ Seyo i kulo Dawud i ñe ge ñibo muchoaijo hosüw üşüvzü a lahuaida.

⁷⁰ Sünambo i bzüga yomdo güdraw ñihow truw bupye-ñipye nayo, dju ñedzü üña no üña gomdo dulyisema, senayo trulyeida.

⁷¹ Chemeje ñi vyeñiw-vyeğaw nayo, seyo ñi homsüsew nagzü yo ñi muchoaida;

⁷² Sei ye ñi bupye-ñipye na nülvo dañe nudzoğ güdraw ñu i vyesüweñe,

⁷³ Seyo se trasğa sei, se í i ñi awu Abraham yo todaye,

⁷⁴ I ñi hei djüjo, sei ye ñi vyeñido nayo kahajoñe,

⁷⁵ Ivro ge chiñiw seyo güdraw gabo kaw ge şüdzowkuw mağew ichi chiğa dañgudruweñe.

⁷⁶ Seyo ba ye muhusa agüsa, Toğgroyama i ñihobraw chejome, hado cheme ba Tawgyew ichi gabo dashütrüvojoñe uvro uvro kutrojome,

⁷⁷ Sei ichi nüna na djumuchoawe, dju, ná lalo yo güdraw pawma.

⁷⁸ Hei ñi Tawgyew í nülvo dado yo lyijome, seiyo ñidru ge udrugo yo müsaw a dzüto-rünokülyejo.

⁷⁹ Sei ye nukuğuw seyo dzüjo gabo ge gyodo na müsaw djü, seyo ñishi í lüshüw gabo gudow lakutrokewe.

⁸⁰ Seyo se muhusa angasa ye Yohañ, şülyifi şülyi seyo gulo ge gokülyefi gokülye seyo Israyel ge kakujo ñeto kuw i bye ge gyö.

2

Betlehem ge Jisu i saw

¹ Se ñeto ge ñubyu Kesar Agastas ichivye gow shotuko-kunu kihua, vyow Druguw-Drulyiw gow gadzü-ğaği nañiñ gımyoweñe.

² He uvromashü iñiñ gımyow ye ñubyu Kerinias í Siriya gow dümbraw dadaw ñetow ge daw.

³ Vyew na nañiñ í gımyojoñe nudzo-nudzo ñetrü ge katsüküğatsü.

⁴ Sünda: Joseb je Dawud i ñeşü go üşü umu, sündada i Galili go Nazrat ñetrü yo kañe Yahudiya ge Dawud i ñetrü Betlehem ge ka.

⁵ I iñiñ gımyow, í goidaw Mariyam dju so mafoma idra jisa.

⁶ Na Betlehem ñetrü ge dulu ge, i agü sajo ümdrü kuadabi.

⁷ Sünda i agü üsaw samkyo a saa sündañe í gyeka ge güşhüñe káko ge zua ve, hado chemeje nabo süge ñe gyojo mapa.

Fugulu gokrüw nabo soğgomuko í ñu kidaw

⁸ Seyo se ñetrü a küña fugulu gyokrüw duma, se na ñegi ge vi ge gyoñe ná hokrü gow.

⁹ Seyo Tawgyew i sorgomukow a namgkow ge gudzukülye, sünda Tawgyew i gagra namgkow ye dubrokülyeg, sündawñe na şupo gęatsüg.

¹⁰ Sündawñe sorgomukow i na che, “Dju gęejo dawew; Hado cheholye chemeje, howe, no tuğ-tumo vyow nabo şupo lüshüw ñu a trujome.

¹¹ Yow ñubyu Dawud i ñetrü ge djobo muchoaijo a sadame, sünda se i Prabhu Masime.”

¹² Sündá se ye ba chi shewme, sei ye ba agü a ye gye gûshûñe seyo káko ge zuw hohujome.

¹³ Sündawñe sorgomuko a üdra ye soḡgomuko upua a Tawgyew i iñiñ la troñe ana chew hohuda,

¹⁴ “Ñedzü ge Tawgyew í gûdzüw sündá no ge se tuḡu-tumo na gûdzüw djüwe djú ñedzü Tawgyew i uw veima.”

Fugulu ḡaksüw na Betlehem ge jiw

¹⁵ Sorgomuko i natrü go soḡgo ge katrallyewñe, fugulu ḡaksüw na gûtchü cheḡi, “Tchow, ñi Betlehem jiñe he ñu chedaw i, seyo Tawgyew i trudaw í, hobo.”

¹⁶ Sündá na mekutcho djeñe Mariyam ñe seyo Joseb naksü ütrü ge anga i káko ge vedaw hohu.

¹⁷ I holyeñe na se anga ufo gow na ha trudama se ñu chedaw na truzeḡiatsü.

¹⁸ Seyo vyew dzühutsüdaw na fugulu ḡaksüw na ñu trudaw yo mavenghuatsüg.

¹⁹ Sešo Mariyam i he ñu na üdrü-ulu ge veñe vemchepüñe.

²⁰ Sündá fugulu ḡaksüw na ná kûna trudama, sünambo vyew dzühuñe hohuñe Tawgyew i troyeñe lûshûñe katsütcho.

Jisu ichi fyüñe seyo iñiñ ñiw

²¹ Ñegi şügzü kufiahuñe, seyo i Jisu i mükraksüw fyumdrü kuadabi, sündá iñiñ Jisu ñe ñi, he iñiñ ye sorgomuko i uluhudrü ge mañilugomdo djülyedabi.

²² Sündá Musa í shotuko dalyedaw yo Mariyam i güdraw ḡyow ye ḡomdzoahuwñe sündá Joseb ñe Mariyam naksü í Tawgyew uvro ge shew Yarusalem lañe jike.

²³ Tawgyew i shotuko ge ḡimbo: “Vyew saw samkyo na Tawgyew íbó güdraw vyejome.”

²⁴ Sündá Tawgyew i shotuko dalyedaw go chemeje, “Aşüm osa ksü, momeje paḡusa üsasa ksü lañe küḡuwe.”

Simon i ñi-how

²⁵ Se ñeto ge Yarusalem ge Simon iñiñ yo nüna a duw, sündá i güdraw nüna seyo Tawgyew i küḡüw nüna, sündá Israyel ge gûdzüjo i ḡyokrü, seyo ḡulo güdraw üdra dusa.

²⁶ Sündá ḡulo güdraw yo truhua, ba Tawgyew i saw Masi í mahohulu, ba madzüvzüjome.

²⁷ Sündá í Ḡulo Güdraw i ñegru nopsü ge jidügye; sündá iyaw ñe üyañ naksü se agüsa Jisu íbo, ahugo shotuko na dajoñe veñe lajikedaw sesse,

²⁸ sündá Simon i angasa í lolalyeñe, Tawgyew í troñe ana che:

²⁹ “He Tawgyewwa, ba ñu chew kudabi, bá kulo í ba gûdzüw yo kadügyejodabe;

³⁰ Hado chemeje noñi yo ba muchoadügyedaw ye hohudamme.

³¹ Djú ba vyew druguw-drulyiw gow nüna na hovow sa a dadrü kikülyadama.

³² I utro sama nabo umsow truhoahuw müsaw da kakülyajome, sündá Israyel go djo nüna nabo lûshü-lûbajome.”

³³ Sündá üyaw ñe üyañ naksü ubo gow ñu chedaw yo mavenghuatcheseñgudru.

³⁴ Sündawñe Simon i í gaḡüzü djüñe, üyañ Mariyam í che, “Howe, i Israyel go na gaañe seyo pülyidügyejo go, seyo ana a chi shedügyejoñe ḡyokrüdügyeda, seifo go ñu zeḡijome.

³⁵ Sündá ba ḡulo je vetsü yo vudüga-vudüga dajome. He yo şüpo na drü-lu ge vedaw na truhuañe.”

Hanna i yo trudaw ñu

³⁶ Sündá Asher ḡübye go Fanual üsam a duw iñiñ Hanna, i ñihow trum: I şüpo mukrombi, I ülshi dzüwñe üdra gzü daw yo odje mro kuw şüfisawba.

³⁷ I odje şügzüḡütrü psüḡi gow müjem: sündá ñegru keje matrahuw ñegiw-ñetow drüpsü-ñilyi mañiw seyo küḡüñe ḡyonggudruwba.

³⁸ Sündá i sehu ñeto süge jikuñe Tawgyew i drü-lu yo uw che, sündá vyew ná, dju Yarusalem i yo muchoañoñe ḡyokrüvodaw na, ifo go ñu trumyokülye.

Josep ñe Mariyam naksü ñe katcho

³⁹ Sünda na Tawgyew davyedaw shotuko ügü ye vyew damdzoahuwñe sese Galili ge nudzoğ ñetrü Nazrat ge katcho.

⁴⁰ Sünda angasa ye nugow Iya, sünda bolu dukülyebi, seyo patsü-sholu tukoaha, sünda Tawgyew i nülvo üdra sa dusa.

Angasa Jisu ñegru ge

⁴¹ Üyaw ñe üyañ naksü oje drü-drü Yarusalem ge Fasa rhano ge jingudru.

⁴² I oje güyo ksü kuwñe, na rhano ge gidaw ñom í daw Jerusalem ge ji.

⁴³ Sünda na vyew ñegi gyomdzolye sese katcho, se angasa Jisu Yarusalem ge gyotralye; sei üyow ñe üyañ naksü madanghu.

⁴⁴ Na ana veñ, i upu jiw nadra dusamada, ñegi a kapseajebi: sünda na í nadraw seyo na ñesü nangko ge tchüpüñe.

⁴⁵ Sé matchülawñe na tchü-tchüñe Yarusalem ge katcho.

⁴⁶ Seyo ñegi dzü sefum ye na í ñegru nopsü ge dadrűw nangko ge gyosañe, ná ñu dzüñe seyo naje i chi dzü gyodaw hohu.

⁴⁷ Seyo küña na i ñu truw dzü gyodama, se na vyew í danghuw yo seyo i ñu hutrow yo mavenghuatsü.

⁴⁸ Sündawñe na í holyeñe mavenghualyeñe seyo üyañ i í che, “No sawwa, ba ñidra ana hado dañe? Howe, baw ñiksü ba tağaw na veduw tchü ñegiaha.”

⁴⁹ I í che, “Ba no hado tchüña? Hadoma madanghuma, no nó awu i ñe ge dujobabi cheñe?”

⁵⁰ Sešo i í ha ñu chedama, i se i madzüsüla.

⁵¹ Sündawñe i üdra kasa, sünda Nazrat ge kaku, sünda na chew dzü gyosa; sünda üyañ i he ñu ye üdrü-ulu ge ve.

⁵² Seyo Jisu i patsü-sholu seyo udru ge lyifilyi sünda Tawgyew ñe nuna naksü ubo yo go shülyi.

3

Yohañ Baptisma djüw ichi shi-ñu.

¹ Nugo Tibiriyus Kesar ñetrü nugo dañe oje gütrűpom kuw sese, seyo Pontus Pilatus i Yahudiya go ñetrü nugo da shüi sese, seyo Galili ge Herodes, sünda üñu Filip Ituriya seyo Trakonitis go nugo da shűw sese, sündalye Abilene ge ye Lisaniyas go nugo da shűw sese.

² Seyo sese Anasñe Kefas naksü müga gow, seta-seğa Tawgyew ichi shi-ñu ye, ge bye ge Jakariya ichi üsaw Yohañ ütrü ge dzühuku.

³ Sündalye i Yordan hu itrűgañ go vyew ñetrü-ñetrü ge jiñe, lalo muchojoñe drü-lu ye vyegudoweñe baptisma ifo ye truzekülye.

⁴ Yasaya i ñihow trulyedaw shi-ñu kako ge gidaw ye:

“Bye ge shogzükülyedaw nuna i guksűwme he i:

‘Tawgyew i gabo dashűtrűvowe, i gabo í gudow davowe.

⁵ Kaguğuahuw küñama kazeğiyijome,

Seyo pusa je lűñew daajo;

Seyo üküngűw ná gudojo, lűvzűw lűñew gabo

Sena gabo rhugro lyijome.

⁶ Seyo uso duw chebiw ye vyew Tawgyew i muchoaihuw hohujome.’ ”

⁷ Dju upu dyam na ichi ge baptisma lajoñe jihuañe jikutsűdaw na, se na i che, “He byu üsa nawa, djó dju truda, he kalai lusuvyűw yo ge jehuatsűwe che?

⁸ Drü-lu vyegudofilaw kuw sheje lakuwe: seyo nudzoğ-nudzoğ drü-lu ge ana djuvyelajo dawew, se ñi aki-awu ye Abrahameñe; hado cheme no dju chengkoime, Tawgyew i he kunu yo je Abraham íbo mulo lakűlyefijobame.

⁹ Seyo ya bo puêje ye shoñ ükrütrü ge vyedabi, sündada ha shoñ ye sheje uw yo majema, se na poskealye mi ge foahuebabi.”

¹⁰ Seyo nüna na í dzü, “Sename ñi ha dajowa?”

¹¹ I ná tru, “Djuchi ge polu ksü duma, se djuchi ge ñima se i djüwe seyo djuchi ge tsajo duma, se naje süna datsüwe.”

¹² Seyo patso-law na je baptisma law jiku, seyo í dzü, “He dadrüwwa, ñi ha dajobya?”

¹³ I ná trutcho, “Dju djóbo gyokrüima, se í fojelüzbüw patso djulajo dawewe.”

¹⁴ Seyo rhünakew na je í ana dzü, “Ñi ha dajobya?” I ná chetcho, “Djudru ge je külü djujowe, seyo mülaw-mütraw djufojo dawewe, seyo nudzoê chiêa dadaw ge lüshüjo dawewe.”

¹⁵ Sünda nüna na se í vyeksüne gyomkoi sese, seyo vyew na nadrü-nalu ge Yohañ ifo go vyemkoi, haña he ashá he i Masi mošomachañe.

¹⁶ Sündawñe Yohañ i vyew ná che, “Nobó djo hu yo baptisma djüwbame, séšoye i kalaime, dju nó cheje saw-lyiw bolufowme; no ivro ge ichi shita udro tashaijoje ugō ñiw sü nabame, se i djó gulo güdraw seyo mi yo baptisma djüjome.

¹⁷ Ichi chiaêi ye ichi ügzü a me; seyo i í ñetchü ye uw yo dagüdrajosome; seyo pulgü tcholadaw na üšaka lakeêijome, séšo ügütchü na ye mi ge foajo se mi ye keje madzoñoajo.”

¹⁸ Sündalye i nüna na dadrüñ-dadrülye shi-ñu uw je trusejome.

Herodas i Yohañ í pache ge kiw

¹⁹ Sešoye i psügimko yo ñetrü a go nugo Herodes í iñuw Filipus ufum Hirodiyas ifo go, vyew lalo datruw nafo se na sei í dadaw na fokülye.

²⁰ Sündada Hirodes i vyew naêi yo je i fow lalo je datru, Yohañ í pache ñe ge shü vyewe che.

Yohañ yo Jisu í baptisma djüw

²¹ Vyew na baptisma latsüwñe, seyo Jisu je baptisma lalyeñe kügü gyo, sündawñe ñedzü müsaag.

²² Seyo gulo güdraw paêusa veduw ye uso dañe idru ge güdrokülya, sünda ñedzüdru go ñu zekülye “Ba nó sawme, ba yo no šüpo lüshüdame.”

Jisu i galyiw

²³ Jisu i shi-ñu trukülyewñe, sese i oje dzügü kuw. I Joseb üsaw (nüna na ana vedabi), seyo i Eli ichi,

²⁴ Seyo i Mattat üsaw, seyo i Lewi ichi, seyo i Malki ichi, seyo i Jannai ichi, seyo i Yusuf ichi,

²⁵ Seyo i Mantiyah ichi, seyo i Amos ichi, seyo i Nahum ichi, seyo i Asaliya ichi, seyo Naggai ichi,

²⁶ Seyo i Mat ichi, seyo i Matiyah ichi, seyo i Simi ichi, seyo i Yosek ichi, Seyo i Yoda ichi,

²⁷ Seyo i Yohañ ichi, seyo Resa ichi, seyo i Jarubbabel ichi, seyo i Shaltiyel ichi seyo Nari ichi,

²⁸ Seyo i Malki ichi, seyo Adi íchi, seyo i Kosam ichi, seyo i Almadam ichi, seyo i Er ichi,

²⁹ Seyo i Jisu ichi, seyo i Aliyejer ichi, seyo i Yorim ichi, seyo i Mantat ichi, seyo i Lewi ichi,

³⁰ Seyo i Simon ichi, seyo i Yahuda ichi, Seyo i Yusuf ichi, seyo i Yonan ichi, seyo i Eliyakim ichi,

³¹ Seyo i Maleyah ichi, seyo i Minnah ichi, seyo i Mantat ichi, seyo i Natan ichi, seyo i Dawud ichi,

³² Seyo i Yise ichi, seyo i Obed ichi, seyo i Boj ichi, seyo i Salmon ichi, seyo i Nason ichi,

³³ Seyo i Amminadab üsaw, seyo i Arni üsaw, seyo i Henson üsaw, seyo i Peres üsaw, seyo i Yahuda üsaw,

³⁴ Seyo i Yakub ichi, seyo i Isahak ichi, seyo i Abraham ichi, seyo i Terah ichi, seyo i Nahor ichi,

³⁵ Seyo i Sarug ichi, seyo i Rawu ichi, seyo i Peleg ichi, seyo i Eber ichhi, seyo i Shilah ichi,

³⁶ Seyo i Kenan ichi, seyo i Arafzed ichi, seyo i Shom ichi, seyo Nuha ichi, seyo Lemek ichi,

³⁷ Seyo i Matushilah ichi, seyo i Hanok ichi, seyo i Yirid ichi, seyo i Mahallel ichi, seyo i Kenan ichi,

³⁸ Seyo i Enosh ichi, seyo i Shet ichi, seyo i Adam ichi, seyo Tawgyew ichi üsawwa.

4

Jisu í purkya

¹ Sünda Jisu i ġulo ġüdraw yo tukoañe, Yordan hu go kakutcho; seyo ġülo yo bye ge laġüşhi laġüşhi vye;

² Seyo ñegi piġü kuw mütü na dakütso-kikütso ho. Se ñeto ge i haje-haje matsa-matuw seyo se ñeto kamdzohuñe, sese i luhuşüku.

³ Sündañe mütü ye í che, “Sünameje ba Tawgyew üsawşommeje, he kunu ye cheha odje lyaweñe.”

⁴ Jisu i í trutcho “Ġidame, nūna na odje yo aka mashüjome.”

⁵ Sündatchowñe mütü ye í la djeketcho sündalye lüġañe pu udru gow vyew druguw-drulyiw go ñetrü ná shemdzoa.

⁶ Sündalye mütü chetcho, “No he na he i vyew bá übraw dawewñe djüjome, sünda no ġagra djüjome, hado cheholye he na braw nobabi, seyo no dju djüġoñdama djüfijobame.

⁷ Sündada ba nó küġümeje, he na vyew bachi lyajo.”

⁸ Jisu i í chetcho, “Ana ġidame: ‘Ba bá nudzoġ Tawgyew í gaga dawew; seyo í küġüjo dabawe.’ ”

⁹ Sündatchowñe i í lalye Yarusalem go küġüw ñegru ñelütsü udru ge lalyi vye, sündalye í che, “Süname ba Tawgyew üsaşommeje, babraw bá nudzoġ he ayo üla ge gaawe.

¹⁰ Hado cheme ġidabi, ‘I bábo í sorgomuko ná babo ġaksüweñe düġejome’

¹¹ Seyo ‘I bábo üġzü yo lolajobame, hado chemeje bá gaañe kunu ge bashi í mapadüyejoñe.’ ”

¹² Jisu i í chetcho, “Ana je chedame; ‘Ba nudzoġ Tawgyew í dafimsoima djuhojo dawew.’ ”

¹³ Mütü ye í dafiyima madafima da hopüñemdzoahuñe, sündawñe memja kuw ütrü yo kahatrükralye.

Galili ge Shi-Ñi trukülyew

¹⁴ Sündatchowñe Jisu i Ġulo Ġüdraw yo tukoañe, Galili ge katcho, sünda ífo go ñu ye üñisa üñisa yo küña ñetrü duma vyew dzühuzeġiatsü.

¹⁵ Seyo i süge Tawgyew í küġüw melye ñe ge truw ñe ge shi-ñu truñgudru, sünda vyew na í trotsüküġatsü.

Nasrat ge Jisu í maġoñiw

¹⁶ Sündalye i Nazrat ñetrü ge jiku; hayo sa a í dalañe shükyedama sese; seyo í nudzoġ daw üġü dajo ge ġyogow ñeto kuwñe küġüw ñegru ge jiñe kako ngüjoñe gudzu.

¹⁷ Ñihow Yasaya í ġilyedaw kako ye í djü, sünda i kako ye tahalye, hayo sa a ġidama se i lakülye:

¹⁸ “Tawgyew í ġulo ġüdraw nodra dume,
Sündada i sapse na shi-ñu truweñe nó lakülyedame,
Seyo nó ana dawewñe kiadame, külyidaw ná shaaweñe,
Seyo üñi ġew ná hofidügyewewñe shi-ñu na truñe,

Seyo dügrülyadaw na lahuaiweñe,

¹⁹ Seyo Tawgyew ichi lüshü gyojo oje í shi-ñu trujo.”

²⁰ Sündalye í se kako ye pyelyealye í shürhaw ügzü ge djü, sündalye gyoag: seyo se kügüw ñegru yo nüna na í homdzoatsü.

²¹ Sündawñe í ná che, “Yow he gidaw ye djovro a damdzojemme.”

²² Seyo vyew na í umsolyeñe vyeatsü, seyo ha shi-ñu ye í umdzu yo zehuahima, se na í djühulye vyengatsü; sünda ná ubo chetsü, “Haña he í Joseb üsaw mowma?”

²³ I na chetcho, “Djo nó he anabo zeğajobamme, ‘He mügawwa, nudzoğ í uw dagy-olatchowe! No hadamje ñu dzühudaw ye ba Kafarnahum ge dadaw ná age nudzoğ ñetrü a je dawe.’ ”

²⁴ Seyo í je chetcho, “No djó umsow cheime, djü ñihow je yow kuw nudzoğ ñetrü ge ügõ mapawme.

²⁵ No bá umsow cheime, Eliya í ñeto ge oje dzü kuw ñedzü ye pyelyeatrülye, ana lyiladjew vyew druguw-drulyiw ge luhušümoatsü, sese Israyel ge šüpyo müjem kadã dutsü.

²⁶ Séšo Eliya í se namko ye djuchi ge je maki, Sidon go Sarfat ge Jewishñim mo müjem a ichi a aka ki.

²⁷ Seyo ñihow Elisha í shüi ñeto ge Israyel to šüpyo gôgô naw kadã, séšo Naman ñidaw Jewish mo Siriya go nüna yé tralye vyew na so güdraw madaw kadã.”

²⁸ He ñu ye dzühubyo-dzühuğyowñe küña na se ñegru a дума, se na vyew lusvyum-foatsü.

²⁹ Sündalye gudzulyitsüñe í na se ñetrü yo lahua, sünda ha pudru to í ñetrü gyodama, se pudru ulodza ge la jiku, í seyošü üla ge dügaajoñe.

³⁰ Séšo í nalumko yo kahulalye katrükralye.

Ĝulo ma uw í ñepsü ge lahuahuw

³¹ Sündatcholye í Galili ñetrü go Kafarnahum ge jiku, sünda gyogow ñeto ge nüna ná shi-ñu tru.

³² Se na í shi-ñu ye dzülye mavyenghuatsü hado chemeje í ñu ye dügyebyo-dügyeğowdra du.

³³ Melye ñe ulunge nüna a du, djuso ge ĝulo mauw kamyo gyodama. Se í šüpyo gow yo šogzukülye,

³⁴ “He Nazret go Jisua, no bá ha tsünghu? Haña ba no damtrüajoñe jikuwma? No bá danghuwšowa ba djuma? Ba Tawgyew ichi güdraw üsaw ñe sakülyedaw yewa!”

³⁵ Jisu í í züñe che, “Mazüda gyo sünda í yo kahuag!” Sündawñe se ĝulo mauw kamyodaw ye ilungo haje ma uw madalyew kahuag.

³⁶ Sei hulye vyew na aañiñe vyeatsü, seyo se na nağütchü ge ñu truğiñe che, “He í ye küna ñu baješoma? I se ĝulo ye ñigudu yo mağew dügyebyo-dügyeğyoiwa, sündawñe se í je kuhuabai.”

³⁷ Hangge je hangge je ímdo í kadang ifo truğitsüabaibi.

Patras ichi apyeñe utro nüna na dagyow

³⁸ I ñegru yo kahuañe simon í ñe ge ji, süge se Simon (Pirat) ichi apye ye uso shüñe nala. Sündada í íbo í küğütcho.

³⁹ I ichi üñisa a gudzulye se usso shü nadaw í züg, züwñe sese usso shüw ye gabruag sünda uwabyo-uwağyowñe í süge age da í datunotcho.

⁴⁰ Dru guamkoi sese dju-dju sama-sama yo nomñew yo so natsüdama, se na ichi ge la jikutsü, sündawñe í ügzü ye nadru ge a a dañe vyeñe na dagyotsü.

⁴¹ Sündawñe ĝulo mauw na šogzuñe che, “Ba Tawgyew ichi üsawwa,” šüpyo nachi go kuhuatsü, séšo í se na züñe seyo ñu mazüdügye, hado chemeje na danghudabi, í Masi cheñe.

Galili ge shi-ñu truw

⁴² Sündá ñetoahuwñe i namko yo kahuañe ġüdzüw ge katrükralye, sündawñe upu na í tchüsetcho ichi a kakusetcho, sündá í dügoħa, nachi go djukatrükralyeweñe.

⁴³ Séšo i ná chetcho, “No ñetrü utro ge je Tawgyew ichi shi-ñu trujo dulumme, hado chemeje nó he í dawewñe kiabadamme.”

⁴⁴ Sündá i Galili ñetrü go ñegru ge shi-ñu tru.

5

Jisu ichi shürhaw

¹ Upu na ichi ge gapulotsüñe, seyo Tawgyew ichi shi-ñu na dzütsükügütsü, sündá íbó ge Gannesrat go huġülyi üdza to gudzu, sese ana a da.

² Sese i huġülyi üdza ge lü ksü vyedaw hohu, seyo tromaw-dzükrüw na ná tromaw na tchegüdrankoi.

³ Se lü namko ye a ye, se Simon ichi ye lyimyoalye, i í hudza ge me latrülyeweñe küġüñe che, sündawñe i lü ge ġyolye i nüna ná shi-ñu trukülye.

⁴ I ñu truñahuwñe, sese i Simon i che, “Ġyuw ge la jikewe, seyo tchü lügyejoñe bá tromaw ye majo dawew.”

⁵ Simon i í chetcho, “He Tabrawwa, no yakülyi ñegimütrü kuw koġiw dawye ha malügyelafibi; sedamje ba ñu cheda, tromaw mamkoime.”

⁶ Se i süna dawñe, ichi tromaw ye tchü aña-šütchüw tromaw gaġalajew malgrula.

⁷ Sündaw i í draw utro lü ge gyodaw na, age djeñe latunoweñe naje damche: seyo se na djekutsüñe, se lü ksü ye gudze-gulüšüahuw lagu vye sündá lü yeje müłajo ladjew latchuġyo vye.

⁸ Se na holyebi Simonñe Patras naksü Jisu üshitrü ye gaañe, seyo che, “He Tawgyewwa, notrüġań yo katrülyewe, hado cheme no lalo nüñabame!”

⁹ Hado chemeje aña šütchüw tchü lügyeladaw í holyeñe i seyo üdra ayo na mavenghuatsüđabi;

¹⁰ Seyo süñatchombo Jabdi í üsaw Yakub ñe Yohań naksü je, dju Simon í shürhawma, mavyenghuatsü dawñe Jisu i Simon i chetcho, “Djuġejodawe, ayogo ba nüna ná üshü tsüłajo dawew.”

¹¹ Sündawñe na lü ye hudza ge lakulye seyo sa a tralye ífum ífum kase.

Ġoġo í güdraw daihuw

¹² I utro ñetrü ge dulu sese, se süge ġoġo yo tsafoahuw nüna a ye jiku, sündá i Jisu i hohulye uvro ye gakülyea, sündalye küġüñe che, “He Tawgyewwa ba dagyojoñe vyedameje nó ba muchoadügyefijošome.”

¹³ I üġzü ye djüñe dadülye che, “Bá muchogüdraweñe, no vedame.” Sündawñe ichi se ġoġo tsadaw ye sešügudo ye kagüdrüatsü.

¹⁴ Sündawñe i í trüdrüse, “Djusaje djutruwe, séšo kañe babraw ba müġaw na shewe, seyo ba künda güdraw mucholawma se fo ye, se hadamje Musa i djüvyelyedama se í djüwe ifo gow truñejoñe.”

¹⁵ Séšo íbo gow ñu šüpyo tüġa-zeġitsü, seyo šüpyo nüñapu ye ichi ge shi-ñu dzüjoñe seyo sonaw na dagyolajoñe ichi ye keġitsü.

¹⁶ Séšo i nüna ñiw ge utroga kagañe küġüñgudru.

Jisu i külyi-ġüdjew naw í dagyo

¹⁷ Ahua ye ana a datcho, i shi-ñu trumkotchoi sese, Farisiñe dakyew kikyew na sa a ġyoda, dju Galili seyo Yahudiya go küña ñetrü dulumma sego na, seyo Yarusalem go jiku; sündá naw na dagyoijoye Tawgyew i ġagra gokyew ye idra ye duse.

¹⁸ Seyo howe kagua na külyi-ġüdjew naw nüna a ye, ñelütsüđru ge lalyi, seyo na í ġütrü ge la jikuñe lamyoañe seyo Jisu ivro ye vyejoñe daahi.

¹⁹ Seyo na upu mutchusübyeñe ñelunge la majimyofiwnë, na ñelütsü udru ge lyilyiñe seyo ñeltsü tahalye, í gûtrü nadra ye Jisu uvro ge ulungko ye kikülyeaha.

²⁰ Jisu i na umsow lutuksüw vyedaw ye holyeñe che, “He nüna bá lalo ye muchoa-jemme.”

²¹ Sündawñe shizew-ñuzew nañe Farisi nağütchü cheği, “He i djubajema, Tawgyew í mow uw zehi ye? Tawgyew í tralye dju lalo na muchoifiwa?”

²² Jisu i nalu ge vyedaw danghulye ná che, “Djo djolu ge ha vyemkoiya?”

²³ Hado vyedoña? Ana chejoma, ‘Djo lalo ná muchoadama,’ semome ana ma ‘Gudzuñe seyo kutro djeg?’

²⁴ Séso ye ana dadá djo danghujo dawwe nüna üsaw í druguw-drulyiw ayo lalo muchoaifiwme.” I se külyi-ğüdjea nado í che, “No ba chemkoi me, gudjuwe seyo bá gûtrü ye lalye ba ñe ge la kabi.”

²⁵ I jeañe ütrü a gudzu, seyo hayo sa a í gudru dama se í lolalye, Tawgyew í trolleye í nudzoğ ñe ge kajebi.

²⁶ Sündawñe vyew na mavyenghuatsüñe Tawgyew í trotsü, sündalye şüpyo ğeñe che, “Yow ñi sama a ñu hohujemme.”

Matti í balaw

²⁷ Seyo sefum a i ñepsü ge jihua, seyo Leviñe ñidaw a ye patso-law nüna ye patso ñe ye ğyodaw hohu, sünda í che, “Nófum kasewe.”

²⁸ Sündawñe i vyew tratsülye ífum kase.

Lalo nadra tsasaw

²⁹ Sünada Levi i í ñe ge ava tsaw rhano a djü; seyo sünda se patso-law nañe seyo nüna utro a upua nañe üşa ğyoñe ava tsa, şüpyo upu dyam.

³⁰ Seyo Farisi nañe seyo shizew-ñuzew nañe í şürhaw ná ana cheñe zekütso-zemrhü “Djo patso-law seyo lalobraw nadra hado ğyoñe üşa tsa-tu daiya?”

Luhuşüw-lukrow ğyow ge Jisu i dzüw

³¹ Jisu i na chetcho, “Müga ñachi ge so manaw na majijome, séso sonaw na jijome.

³² No nüna güdraw na mowme, lalo duw ná nadrü-nalu lagudoijoñe balaw kakuwme.”

³³ Seyo na í chetcho, “Yohañ í şürhaw na ye şüpyo uw yo matsa-matuw küğüñe ğyoiwa, seyo sünambó Farisi nachi go na je, séso bá şürhaw na ye tsa-tuiwa.”

³⁴ Jisu i ná chetcho, “Hawa ba name gzü jiw nüna ná gzübraw ye nadra dulu sese, matsa-matudügyefijoma?”

³⁵ Séso se ñeto je kakujome, sayo sa a gzübraw ye nayo utroga dajome, sese na se ñeto ge matsa-matuw dajome.”

³⁶ Ná i zeğaw a ze tru, “Dju nüna yo gye ükün ye tağañe dju matüpsüwme, semome ükün ye tağajobabi sedamje se tüpsüdaw ye je gye üme üdra makamyogîjo.

³⁷ Seyo dju je tsühu ükün ye dzaği üme gye mapyujö, semome tsü ükün ye se dzaği üme yebó byoğalye kasuajo, seyo dzaği je mau lyajo.

³⁸ Séso anggur uhu ükün ye dzaği ükün ge pyujo dume.

³⁹ Kagua nüna na tsühu üme ye tulye ükün ye matuğöñjo, hado chemeje na truibî, üme ye ufomdodaşo cheñe.”

6

Jisu Sabbat go Tawgyew

¹ Sündalye ğyogow ñeto sehu i vi goşü dañe kamkoi sese, seyo í şürhaw na pu ye trükülyelalye, ügzüku yo şükrüñe tsa-tsa ka.

² Sese Farisi namko yo na hadamje chekülyetcho, “Djo süna chiğa hado dawwa hai ye ğyogow ñeto ge madafiwjoma?”

³ Jisu i ná trutcho, “Hawa djo he í mangüma, nugo Dawudñe üdra ayo na luhušüda sese ha dawma?

⁴ I kúndañe Tawgyew ichi ñe ge jima, seyo lapsü djüdaw go odje na lañe tsa, se na bó mügaw ná tralye djusaje matsafijo, seyo ídra yo naje djüdalubi?”

⁵ Sünda i ná chetcho, “Nüna üsaw ye gyogow ñeto ge je Tawgyewbamme.”

Gyogow ñeto ye sonaw ná dagyow

⁶ Sünda ana dañ ahua ye gyogow ñeto kuw sese i ñegru ge jiñe shi-ñu trutchoñe da gyog; seyo sa a nüna a duw ye ügzü fuvro go krosdzüada.

⁷ Shizew-ñuzewñe Farisi na í hadamje zeñe ñu jojoñe hoksü gyog, i gyogow ñeto ge dagyoahima madagyoima hojoñe.

⁸ Séšo íbó nalu vyedaw dāhuñda; sündada i se ügzü kroadaw nüna í che, “Pülyiñe, umko a gudzug.” I pülyiñe gudzu.

⁹ Jisu i í chetcho, “No djo he dzüime gyogow ñeto ge ha dafijowa, uw dajo veima mo mau dajoma; shüw ná gaksüjoma mo mağaksüjoma?”

¹⁰ Seyo i vyew ná hozeğiatzülye, se nüna í che, “Bagzü ye vro ge djüwe.” I süna da, sündawñe ügzü ye muchoañe uw lya.

¹¹ Séšo se na ñepsü ge kuhuatcholye lusvyuñe nağütchü poğitcho, ñi he Jisu idra ha dañelye?

Shürhaw gü yo ksü

¹² Seyo se ñeto bó i pudru ge küğüw katrükralye, seyo akülya ñetow Tawgyew í küğü ñetoaha.

¹³ Ñetoahuwñe, i í shürhaw ná balalye namko ye gü yo ksü ye pola, sündalye ná shürhawñe che.

¹⁴ Sünda se na heimme; Simon í ñiñi ye i Patras ñe je vye; seyo í ñuw Andriyas, seyo Yakub, seyo Yohañ, seyo Fillipus, seyo Bertulme,

¹⁵ Seyo Matti, seyo Tomas, seyo Halfais í saw Yakub, seyo Simon dju í Jeletes je chewma,

¹⁶ Seyo Yakub í saw Yahuda, seyo Yahuda tcho Iskariyoti, se i í tsadrüahuw lyikülye.

Jisu i nüna ná truñe dagyow

¹⁷ Sündawñe na ídra kagalye no üpra a ye gudzutsü, sünda ichi shürhaw na upu mutchu, seyo vyew Yahudiya na, seyo Yarusalem, seyo Sor seyo Sidon go sütüğülü üdza ge küña ñetrü ma sego şüpyo nüna upu na je,

¹⁸ Dju i shi-ñu truw í seyo gülo ná muchoañe dagyojoñe ichi ge jikutsüdama, süge dutsü. Seyo chigüje na maw da vyedaw na je uw dagyo.

¹⁹ Seyo vyew na í kidügyoñ vyetsü, hado cheme íso go gagra na kahuañe ná muchoahi.

Gagüze shi-ñu

²⁰ Sündawñe i í shürhaw nachi ge hoñe che,
 “Şüvzüwme bá, ñeto daw ye,
 Hado cheme Tawgyew ichi ñetrü ye bachime.”

²¹ “Şüvzüwme bá je, dju luhuşüdama,
 Hado cheme gaksüjome,
 Şüvzüwme bá, dju ksei ma;
 Hado cheme tchüjome.”

²² “Şüvzüwme bá, dju nüna üsaw íbo
 Bá mau dajome,
 Seyo bá lahuajome, seyo bá tchügo-hoğojome,
 Seyo bá ñiñi danghulye vyetsü djojome.

23 “Sehu ñeto lüshüñe gyojo dawē, hado cheme hojo dawē, babó soḡgo ge lapsü dume. Í bupye-ñipyē ñihow kew nadra je süna dawbamme.”

Dzüngawhuw shi-ñu

24 “Séso tui me djo, dju bo-luko duma,
Hado cheme djo djolu vyew apyew pajebi.”

25 “Tuime djó dju hesahe ḡaksüwdadama,
Hado cheme luhušujome.”

“Tuime djó, dju hesahe tchüima,
Hado cheme duhu pajome seyo ksejome.”

26 “Tui me djó, nüna na djodruge uw chejome,
Hado cheme ná bupye-ñipyē na mülaw ñihow nadra je ana dawbamme.”

Vyeñiw na je nülvowe

27 “Sešo dzüvodo djó no chei me, bá vyeñido na nülvow dawē; bá dju mau daiba sena uw dajo dawē.

28 Bá dju chemui ma, sená ḡaḡüzü djüjo dawē; bá dju zeamei ma, senábo küḡüjo dawē.

29 Dju bákrumo ge tcheima, ichi ge krumo a go je djüwe; seyo dju bachi ḡüfaw laḡaima, se í bá polu djulawe djuchewe.

30 Dju damje bá prüima sená djüwe; seyo bachi ḡañ laḡaimeje, í djuprüwe.

31 Seyo ba nüna ná bá küna dawēñe vyedama, baje ná süna dajo dawē.

32 “Sešo ba bá nülvow dai ná akasa ba nülvow dame je, ba ha dew dawwa? Hado chemeje lalo dado na je, ná dju nülvow daima na je sená nülvow daḡoi.

33 Ba bá dju uw daihi ma sená akasa uw daijobame, bá ha dew chejowa? Hado chemeje lalo daw na je süna bó daḡoi.

34 Sešo ba í chi gudzumeje, nachi go patchojoñe vyemeje, bachi ha uwwa? Hado cheme lalo daw naḡütchü je chi bó gudzuḡoi.

35 Sešo bá vyeñido nadra nülvow dawē, seyo uw dawē, seyo patchojoñe mavýew chi gudzujo dawē; seyo babó dew lapsü lyijome; seyo ba Tawgyew í üsañe chejome, hado chemeje i se nabó dju mašüvzüdügyejome, dju kew nadru ge nülvoi me

36 Baw küna nülvosüwma, sünambo ba je nülvojo dawē.

Udru ge dju truchoawe

37 “Külü dju jowe, sündame badru ge je külü majojome; trudañe djuchewe, badru ge je truda machejome; aloijoda, sündameje bá je alojome.

38 Djüjo dawē, sündame bá je djüjome: nüna na düsdzü-düsdzüñe seyo so-soñe seyo gusuañe badru ge suijome, hado cheme ha chi yo ba tsoima, se chi yo babó je seiyo tsojome.”

39 Sündatcholye i ná zeḡaw a yo chetcho: “Hawa ñiḡew ye, ñiḡew í ḡabo trufijoma? Hawa naksü noḡu ge magaajoma?

40 Shürhaw na nudzoḡ chi dadrüw na yo madewfojome, sešo djudamje dagro dama, i í chi dadrüw imbó vyedujome.

41 Ba bá ñuw ichi iñi go gashüsadaw shobosa í hado hoiya, seyo bá nudzoḡ báñi go sholbosa duw ye maholama?

42 Seyo ba bá nudzoḡ bañi go sholbosa mahomeje, ba bá ñuw ichi í künda chefijowa, ‘No ñuwwa, mola bañi go gashüdaw ye lahuajoma?’ He dakulyutchüwba, uvromashü bachi iñi go sholbosa lahuavzüwe, sündameje sese bachi üñuw ichi iñi go gashüdaw ye hohulye lahuahifijome.

Shoñ í hosüjo ye üje yo

43 “Ha shoñ uw a je ñime, dju sheje ha madaḡiw jewma, seyo ha madaḡiw shoñ je ñime, dju shejo uw jewma.

⁴⁴ Shoñ küña duma, nudzoğ üje yo hosüwme; hado cheme nüna na gralye go lufuje mapyowme, seyo küfsüje go angur mapyofijome.

⁴⁵ Nüna uw na nudzoğ lu go ñu uw chehuahi; seyo nüna mau na nudzoğ lu go mau ñu na mau yo chehuajome; hado cheme lu ge ha gudama se i namdzu go kahujome.

Ñe daw nüna sama ksü yo duw

⁴⁶ “Ba nó ñu chew ná madzújomeje, sünameje hado nó ‘He Tawgyewwa, he Tawgyewwa,’ cheiya?”

⁴⁷ Dju damje nochi ge jikuima, seyo nó ñu í dzühulyeñe zew dzüima, no djo trujome, na dju vyeduwma?

⁴⁸ I se nüna i vyeduwme, dju ñe damkoi sese nogüdzü ye gyuw chigalye kunu ge ñekrü dzuñe, seyo hutchuğo-ğölüşü ye idru yo da kaa, séšo í madañifijome; hado chemeje i lyow yo dada.

⁴⁹ Séšo dju dzhutcholyeñe zew madzüma, se i se nüna i dambo vyeduwme, dju nogüdzü ye ñekru lyow madaw dadama. Se udru ge hutchuğo-ğölüşü kame, i sebyo-segyo ngüaño seyo se i gaañe ganü-gağaaha.”

7

Kulokyew ichi umsow vyedaw ye Jisu i vyelamoa

¹ I í ñu ná nüna na trumdzoalyeñe Kafarnahum ñetrü ge jiku.

² Sünda mükaw a ichi kulom djú i, í ñeşümbo veduw vewma, usso nañe dzüjo veduw lyada.

³ Jisu iñiñ hutraw-notraw dzühulyeñe Yahudi ñetrü go nugow na ütrü ge í kulo í jikuñe dagyoiwe cheñe ki.

⁴ Na Jisu ichi ge jikuñe ishitrü ge gaañe ana che, “Ba ibo he i daijo dawé

⁵ Hado chemeje i ñi gūbye na nülvo daw, sünda ñi melye ñe ije i daihu.”

⁶ Jisu i nadra nadra hutro jisa, sünda i ñe yo aña üğa ñibisa sa a, mükaw i üdraw na yo ana cheñe ki, “He Tawgyewwa, ba ñikuñisüw djudajodawe, hado chemeje nochi ge übadzü ñime, ba no ñelütsü pudaw ge jimyojo.

⁷ Sündada nudzo no bachi ge jikujo übadzü duñe mavemme, sé ba bá ñu i truñe no kulo usso dagyoiijodawe.

⁸ Noje nüna na üla yo nünabame; sünda shipashi na nogzü geme, sünda nüna a í ‘Kab’ chewñe se nüna ye kaw, sünda ütro a í ‘age kab’ chewñe i kaku; sünda no kulo na ‘He i da’ chewñe na se chiğa i daag.”

⁹ He ñu í dzühulye Jisu i lumashüw vea, sünda i ufum ge nüna upu kalasalai nachi ge tcholtruğiañe cheñ, “No djo he trungkoi heme, Israyel ge je no ana veksüw mapame.”

¹⁰ Sünda nüna kidaw na ñe kaku hobanda, kulo usso nadaw i dagyovodabi.

Dzüdo í shüdügye

¹¹ Me ñegi fum sa a i Nayan cheñe ñetrü a ge ji, ichi shürhaw nañe seyo nüna upu üdra jisa.

¹² I se ñetrü gow füta ütrü iñisa jiku, hojodawe, nüna na ñimo a í ñepsü ge la kahuangkoi; se ye üyan üsaw akasa ba, sünda i müjem: sünda ñetrü gow şüpo nüna aña üdra dusa.

¹³ Í hoñe Prabu üdrapra-ulupra na, sünda i cheñ, “Dju ksewe.”

¹⁴ Sündawñe i iñisa ge jikuñe ñimo vedaw i ki; sünda gidaw na gogog jebi, sündawñe i cheñ, “O muhumya, No ba chengkoime, paküleyjodawe.”

¹⁵ Sündawñe se dzüdaw ye pakülye gyo, sünda ütrü zekülye: sünda i í üyañ i djülye.

¹⁶ He yo vyew na gëatsü, sünda na Tawgyew ibo gow troñe ana che, “Ñimko a şüpo dyew ñihow truw a kakülyadame, sünda Tawgyew i í nülvow í nüna na she.”

¹⁷ Sünda ibo gow ñu ye vyew Yahudiya seyo iñisa gow vyew ñetrü ge truzeğiatzü.

Yohañ Baptisma djüw í dzüw

¹⁸ Sündá Yohañ í í shürhaw na he ñu na trutsü.

¹⁹ Sündawñe Yohañ í í shürhaw nangko yo ksü i balalyeñe Prabu ichi ana dzüw ki, “Kakujo ye babamma, mo no utro na gyokrüjoma?”

²⁰ Na ichi ge jikuñe cheñ, “Yohañ baptisma djüw í ñi bachi ge ana a dzüw kidame, se ye kakujo ye babamma, mo no utro gyokrüjoma?”

²¹ Sa yo sa a í süpo na usso naw yo seyo duhu yo lahuaida; sünda mütü kamyodaw seyo süpo iñi giw na iñi djü.

²² Sünda í í che, “Djo ha ha hohuñe dzühudama, kañe Yohañ i trujo daw; iñi gyew hohungkoimme, üshi lyew kahingkoimme, goño nadaw i dagüdrajemme, ufu vaw dzühungkoimme, sünda dzüdaw ye üshükülyejemme, sünda sapse na Tawgyew i shi-ñu trujeme.

²³ Tawgyew i süvzüw djudra duma na ushi mahütrüjome.”

²⁴ Yohañ i kidaw nüna na kawñe, Jisu i Yohañ ubo gow nüna na ana tru, “Djo bye ge ha how jiña? Ha, ñedzülyiw yo age ngüa süge ngüa daw müsügi i?”

²⁵ Nameje djo ha how jibaña? Ha, nüna gye howsa shedaw í? Howe, dju gye-güvo uw sheima sünda ñe uw ge gyoima, na mahal ge gyowwa.

²⁶ Nameje ha how jimdobaña? Ha, djuma a ñihow í? Am, no djo trungkoime, ñihow truw ije dyewfo.

²⁷ He ye sebamme, djubo gidama: ‘Howe, no muko í bavro bavro kijome, dju bavro ge kañe gabo gudow davojome.’ ”

²⁸ “No djo trungkoime, mim naluhu yow sadaw na, namko ye Yohañ i dyewfo djuje mome sé dju Tawgyew i ñe ge imisafo dama, i se ije dyewfo me i.”

²⁹ Sünda vyew nüna na seyo patso-lavow naje dzühuñe Yohañ ichi gow baptisma lañe Tawgyew i umso ve.

³⁰ Sé Farisi seyo shotuko-kunu davow na ichi baptisma malañe Tawgyew i gabo shedaw i madzü.

³¹ “Sündada: no he shülsongkoi gow nüna na ha üdra tsojowa? Na ha veduda?

³² Na se angasa na veduw dju bajar ge gyone nağütchü guksügiñe ana chegiw, ‘Ñi babo bzüva viw, se ba ñuksu je mada, sünda ñi duhu dawgeje ba kseje makse.’

³³ Hado chemeje Yohañ baptisma djüw i odje je matsaw kakülyada seyo tsü je matuw kakülyada, sé ba cheye, usso ge mütü du.

³⁴ Nüna üsaw na tsa tuñe kakülyahume; se ba chewye, ‘Howe, tsağotüw sünda tsü tujetchüw nüna nawa, patso-law üdraw seyo lalo gifuğuw nadraw.’

³⁵ Sé patsü-sholu ye nasaw nachi í umsoñe da veda.”

Simon Faresi ichi ñe ge lalobram í muchoahuw

³⁶ Sünda Farisi a ye í üdra ava tsasaweñe bakuda; sündawñe: i se Farisi i ñe ge jiñe ava tsajone gyoha.

³⁷ Süge se ñetrü yo lalobram a ye, i Farisi i ñe ge ava tsaw jikuñe gyoda che danghulye, kunulübzü yo daw shüve a ge şowsa şow uhu lajikuda.

³⁸ Sünda üshi ütrü ge, fum gow gudzüñe kseñe üshi i üñişü yo dağüñe sünda nudzo ükye gow ükyetrü yo düğüdra sünda üshi ge umdzu yo tsa tsañe, şowsa şow uhu yo şüi.

³⁹ He í holyeñe, se Farisi dju í baladama, üdrü-ulu ve vemche, “I ñihow truw nünan meje i danghujobi, dju i kingkoima, se ye djuma seyo küna mimma cheñe? Hado chemeje ibo lalobrambabi.”

⁴⁰ He í dzühulye Jisu i hutrolañe cheñ, “Simonña, no ba hadamje a chejome.”

⁴¹ “Bo djüw a ichi gudzuvaw ksü duw, a ye lumu yo bosüñ fo pom, seyo utro a ichi ge lumu yo bosüñ pomgü duw.

⁴² Ichi ge domğütchojo ñiahuñe, sündawñe i naksü maksü i ujobammeñe traaha. Sünda: naksümko a dju í nülvo fo vejowa?”

⁴³ Simon i cheñ, “no vew ge, i djú añe traafodama.” I í cheñ, “Ba uw vebadamme.”

⁴⁴ Sündá se mim ichi ge tcholtrüñe i Simon i che, “Ba he mim i homa? No ba ñe ge jikuwbi sé ba nó üshi chejo hu je madjü, se i noshi i iñišü yo dagzüida, seyo i nudzo ükyetrü yo dügüdraida.”

⁴⁵ Ba no umdzo yo bubu matsa, se no jikuw yo i noshi i umdzo yo bubu madamdu.

⁴⁶ Ba no kye ge tel je mašüi; se i noshi ge šowsa šow uhu šüida.

⁴⁷ “Sündada no ba chengkoime; i lalo šüpo duw ye, muchoihumme, hado chemeje i šüpo nülvo dada; sé djuchi mesame muchodama, i nülvow je mesame dawba.”

⁴⁸ Sündá i mim í che, “Ba lalo muchoajemme.”

⁴⁹ Sündawñe üdra a ava tsaw gýosadaw na, nadrü-nalu ve vetsü, “He lalo na muchoihu ye djubajema?”

⁵⁰ Se i mim i che, “Ba kügüw ye ba gaksüi damme, lüshüw yo kajodabe.”

8

Jisu ichi shürhaw na

¹ Se yo na ñetrü ñetrü shi-ñu tru ka, seyo Tawgyew í ñe gow shi-ñu na truñe kahi, sündá i nadra shürhaw gû yo ksü duse,

² seyo mim üchea naje djuso gow mütü na lahuañe so naw na dagyodama, se iñiñ ye Mariyam Magdalini chewme, djuso gow mütü mro kahudama.

³ Seyo Herodes i hokrüvow Kuja ufum Yoanañe Susana seyo šüpo mim na í ná gañ-miği yo na kulom na hotunovow.

Iği truw ichi zeraw

⁴ Nüna upu jikyeğiatsüwñe, seyo ñetrü ñetrü gow na je ütrü ge jikutsüwñe, i zeğaw tru:

⁵ “Üsü traw nüna a ye üsaw traw jihua: trangkoi ye üsü üchea ye gâbokutru ge gaa, sündá dügrüprag, seyo ñedzü gow musu na pilag.

⁶ Seyo üche ye kunuka udru ge gaa, sündá shükülye, séšo hu gzüw mapawtro graha.

⁷ Üchea ye tsü namko ge gaa, sündá tsü na üša üša shüsañe i shümüla.

⁸ Seyo üchea na no uw ge gaada, sündá shülyilyeñe sheje fuğua dzaw djüda.” Ana chefiayeñe i gow yo ñu che, “Djuchi ge dzüjo ufu duma dzüsawe.”

Zeğaw yo trudrüw

⁹ I shürhaw na i dzü, “He zeğaw ichi hawa?”

¹⁰ I cheñ, “Djo Tawgyew i ñe go ñu na dzüsüdügyewbi, se utro na zeğaw go trujome, hado chemeje na hohuñe mahohujome, seyo dzühuñe je madzüsüjome.”

¹¹ “Zeğaw í chemeje ana me: üsü ye Tawgyew í ñume.”

¹² Gâbo üdza ge gýodaw na dju dzühudama; sündawñe mütü na jikuñe nadrü-nalu gow Tawgyew í ñu i lañe katrükralye, hado cheme ana malyajošoma na Tawgyew i kügüñe na gaksüw pajo.

¹³ Kunnu udru ge duw na, dzüñe lüshüw yo shi-ñu bo lašoi, séšo ükrü ñiw tro ye na umso mesame kuw ve, sündá muchow ge gaaha.

¹⁴ Dju kusu ge gamyoadama, se na, dju dzüi na, sé vro ge kañe vesumow seyo bo-luko seyo shüng-dongkoi ge duhu ge gamyojome, sündá na sheje mañujo.

¹⁵ Sé no uw gow na he me, dju shi-ñu lu-drü lümyew yo dzüñe veima, na se yo sheje lakufijome.

Mitrü yo zeğaw

¹⁶ “Djuje müsaw tchüholyeñe boğtom yo pelye mavejo, seyo buğo ufum ge mavejo, sé mütchü ubo ge vejo, hado chemeje nüna jikudaw na müsaw pajo.

¹⁷ Haje mamüşüme, ha ye matruhoajoma; seyo haje trumšüw ñime, se ye madanghu-jome sündá müsaw mapajoma.

¹⁸ Sündada gûdzüw gýowe, ba ha vego dzüngkoima? Hado chemeje djuchi ge dumañe vedama, i djüpyojolume; seyo djuchi ge ñima, ichi gow se ije lağajome, ha ye ichi nudzoğchiñe vedama.”

Jisu ichi ñeşügmüshaw

¹⁹ Üyaññe uñuw naksü ütrü ge jiku, sé nuna aña duw tro sa í matüvafilye.

²⁰ Sûnda í tru, “Baññe bañuw naksü ba tüvajoñe ñepsü ge gudzudame.”

²¹ I í ñu i hutrolañe che, “No aña no ñuw he bamme, dju Tawgyew i shi-ñu dzüñe seyo umso vewma.”

Şüw-lyiw law kaw í dagûdzüahuw

²² Sesüyo ahua ye i seyo i shürhaw na lü ge gyolyi, sûnda i ná cheñ, “Age djebya, hu dügepsü ge jibo.”

²³ Sündawñe: na lü í shaa.

²⁴ Sündawñe na jiñe í dapüñe, sûnda cheñ, “Tawgyewa! Tawgyewa! Ñi mauwfimauw lyangkoimme. Sündawñe í pakülyeñe ñedzü şüw-lyiw seyo hu i lashüraw i miği sündawñe na damudoañe gûdzüw lyaha.”

²⁵ Sûnda i na che, “djo küğüi ye hanga?” Se na geaglye seyo mavenghuañe nağütchü cheği, “He djubajema, ñedzü şüw-lyiw seyo hu naje dügyeie, sûnda na i chew dzütsü.”

Ġuló mauw na lahuahuw

²⁶ Sûnda Giraseni na ñetrü ge jiku se ye süge pseğ ge Galili hu ütrü iñisa ge.

²⁷ I hudza ge jikuwñe, se ñetrü go nuna a í tüva, djuso ge mütü kamyodama. Seyo şüpo üğaluw gomdo gye-ğuvo je mashew seyo ñe ge je mağyow nuğu ge aka gýow.

²⁸ I Jisu i hoñe şogzu, sûnda uvro toi gaañe gow yo ñu che, “He Toğgroyama Tawgyew üsaw Jisu! No badra ha dajo duwa? No ba chengkoime, no ñiku-ñisüw djudjüjodawe.”

²⁹ Hado chemeje i mütü í se nuna usso go kahuañe cheñe dügyengkoi, sündada i üdra gow lyanggudrulai. Sûnda nuna na í sülyeñtchü seyo sülyebu yo vogo vew, sedamje i se sü na gokyoaha, sûnda mütü ye i sümbye ge sagañgudrudügye.

³⁰ Jisu i í dzü, “Bañiñ hawa?” I cheñ, “Upu,” hado chemeje şüpo uğulo na usso ge kamyolyedabi.

³¹ Sûnda i í cheñ, “No noğu ge djukadügyejowe.”

³² Süge puge vo upulo dyew a tsamroñe gýoda, sûnda: i í cheñ, “No nalung ge kamyodügyewe.” Sûnda: i í kamyodügye.

³³ Sündawñe se uğulo ge nuna usso go kahuañe vo usso ge kamyog sûnda se vo upulo ye go ge gûañe husu ge gamyoñe gamüla dzüag.

³⁴ Fugulu gýokrüw na se dagjew i holyeñe ge djeshükralyetsü, sûnda ñetrü ñetrü ge kañe he ñu i trutsüküğa.

³⁵ Sûnda nuna na se dajew i how jihuatsü, sûnda Jisu ichi ge jikuñe dju nuna usso go uğulo mauw lahuadama se ye Jisu ishitrü ge gye sheñe gýodaw i hohuñe geag.

³⁶ Sûnda hohusadaw nuna na ná tru, se uğulo mauw ye nuna i ñiku-ñisüw da vedaw í kûndañe uw dagyodama.

³⁷ Sündawñe Giraseni ñetrü üñisa gow nuna na Jisu i cheñ, ñichi ayo kahujodabe; hado chemeje na gemğekyoatsüdabi. Sûnda: na lü ge gylaye katrükralye.

³⁸ Djuso gow uğulo mauw lahuadama se nuna ye í che, no badra gýokyejodawe, séşo Jisu i kadügyelye cheñ.

³⁹ “Bañe ge kañe nuna na truwe, Tawgyew i kûndañe babo aña şüw-lyiw chiğa dadama.” I kañe vyew ñetrü ge trüzeğiatsüg, Jisu i nobo küña şüw-lyiw chiğa dadama.

Sonaw mim seyo dzüdaw mimsa naksü dashütcho

⁴⁰ Jisu i Galili ñetrü go kalai sa a, nuna na lüshüw yo i tüva; hado chemeje na í gýokrüñe gýow.

⁴¹ Sündañe howe, Yayir cheñe nūna a iñiñ dju ñegru go dyewma, i jikuñe Jisu ishitrü ge gaañe cheñ, “Noñe ge jisawe.”

⁴² Hado chemeje ichi oje ġüyo ksü yo üsam akasa a duw ye dzüasalaibi. I jingkoi ge nūna ishitrü ge gaatsü.

⁴³ Sündä mim a dju oje ġüyo ksügomdo šü lu ġyowma sündä dju nudzo shüw-duw na so naw dagyow nadru ge tratsüdabi sedamje djugzü gow je i madagyofibi,

⁴⁴ fum gow jiñe i gye üdza ge kig sündawñe sešüġdo a i šü luw ye lumudoag.

⁴⁵ Se yo a Jisu i cheñ, “No dju kidüġña?” Vyow na makitsüñe chetsüwñe, Patras seyo üdra ayo dusaw na cheñ, “He Tawgyewwa, bá he nūna fupulodaw na düñe badru ge gaiwa.”

⁴⁶ Séšo Jisu i cheñ, “Djudamje a no kidawa hado chemeje no danghudabi nochi gow mu kahuajewä.”

⁴⁷ Mim ye holyeñe no mamušufijobañe vewñe, usso somsokyo jikülye, sündä ishitrü ge gaañe vyew nūna navro se trukülye, i hado kima, sündä kündañe mekutcho dagyogdama.

⁴⁸ I í cheñ, “Nosamya ba küġüw ye ba dagyodašoñe, lüshüw yo kajodawe.”

⁴⁹ I trungkoibalubi ye, ñegru go müġaw i nūna a jekuñe che, “Basam dzüdamme: müġaw i duhu djujüwe.”

⁵⁰ Jisu i dzühuñe cheñ, “Djuġejodawe; küġüjodabuwe; i basüjošome.”

⁵¹ Ñe ge jikuñe i üdra ye Patras, Yohañ, Yakub seyo mimsa üyow-üyañ na tralyeñe djuje ütrü üñisa ge majidügyew da.

⁵² Sündä vyew na ubo kse-ñiġitsü, séšo i cheñ, “Djuksejodawe; I madzüme, i dru-mubadame.”

⁵³ Nūna na i dzüdabi che danghuñe, i chedaw i dzüñe tchüg.

⁵⁴ Sé i ügzü í kigolañe ġuksuñe che, “He aköa pakülyebi.”

⁵⁵ Sündawñe ġulo üshükülyeñe pakülyeg; sündä i na dügye í tsajo hadamje djüwe che.

⁵⁶ Üyawñe üyañ naksü mavenghutsüg, sé i ná cheñ, he ha dajema se i djuje djutruwe.

9

Shürhaw ġüyo ksü ná jidügyew

¹ Sündatcholye i na ġüyo ksü shürhaw na balañe ná ġuló mauw seyo so naw na dagyow dajo gow bó vye.

² Sündä ná Tawgyew i ñe go shi-ñu uw truw, seyo so naw na dagyowe cheñe ki.

³ Sündä i ná che, “Jiw ge haje djulawe: shobo je djulawe, kapüġa je, odje je, bo je seyo polu ksü ksü djulawe.

⁴ Seyo dju ñe yedamje ba ġyogoima, se a ġyojodawe; sündä se yo kahuaodawe.

⁵ Dju bala maġokyema se ñetrü yo kahuañe ishigo ñelümo na pafiaodawe, hado chemeje nadru ge na je truksüfijo.”

⁶ Sündä: na jihuañe ñetrü, ñetrü shi-ñu uw tru kaahi, seyo nūna ná djuje djuje dagyoñe kaahi.

Herodas í velamow

⁷ Seyo ñetrü go psüġi fum yo nugo Herodes i he í dzühulyeñe mavenghuag, hado chemeje küña nūna na trudabya, Se i Yohañ dzüdo go üshükülyetchoda cheñe.

⁸ Sündä küña nūna na he i, se Eliya i hohuda: utro na ana je chetcho, ahugo ñihow truw müġaw namko yo djuma üshükülyetchoda.

⁹ Sešo Herodes i che, “Yohañ ükye bo no poskeadügyembi, he ye djutchoa, djufo go ana ñu dzühumkotchoiya?” Sündä i í hoġoñikülye.

Nūna hadza pom ná gyew

¹⁰ Sündä í shürhaw na kakuñe na ha ha dalyedama ná í truatsü. Sündä i ná utro ge lagañe, Betseda cheñe ñetrü a ge lañe kakye.

¹¹ He i danghulyeñe nüna na ufum fupuloatsü, sünda í ná lüshüw yo түvatsü, seyo ná i Tawgyew i Nogofo shi-ñu trukye, sünda djú dagyodügyeñoñdama, ná dagyo.

¹² Ñeto kapsealaibi a, se í shürhaw güyo ksü jikuñe che, “Upu na kadügyejodabe, kañe na ñetrü ge ná gyojo seyo tsajo bühohidame, hado chemeje ñi güdzüw ñetrü ge dume.”

¹³ I ná che, “Djo ná tsajo djübalabya.” Na cheñ, “Ñichi ge odje pom seyo tchükro ksü yo haje ñime; sé ñi jihuañe vyow nabo tsaw-tuw prülameje, se ye dujome.”

¹⁴ (Hado chemeje sa yo sa a muhu fo pom kuw du.) Sünda i í shürhaw na che, “Ná pom gü, pom gü dañe gyodügyewe.”

¹⁵ Na süna dabadába, seyo vyow ná gyodügye.

¹⁶ Sese Tawgyew i ülgü odje pom seyo tchükrosa ksü í la, seyo ñedzüdru ge hotroñe na gağüzü djü, sünda tchekuği, tchekuğiñe í shürhaw na djü nüna na hawe cheñe.

¹⁷ Sünda: vyow na tsalyeñe tsaşelatsüdabi, seyo godza daw yo mo gü yo ksü guw trügula.

Patras i Jisu í Tawgyewñe vyew

¹⁸ Se i akasa güdzüw ge kagañe kügümkoi sese, seyo idra ye ichi shürhaw na idra dusa, sündawñe i ná dzü, “Nüna na nó ha cheiya?”

¹⁹ Na che, “Yohañ baptisma dju ye, seyo kagua na mügaw Eliya, seyo kagua na chew ye ahugo ñihow truw mügaw nangko yo a üshükülye da.”

²⁰ I ná dzü, “Sešo djo nó ha cheiya?” Patras i che, “Tawgyew i üsaw Masi.”

²¹ Sündawñe Jisu ná züpsügeñe che, “He ana djúje djuchewe.”

Jisu i í nudzo dzüjo í ñihow tru

²² Sünda i che, “Nüna üsaw í duhu paketrajobamme, seyo dasüñejome seyo kew mügaw na seyo mügaw sawlyiw seyo shizew-ñuzew na í hosügew vyeñe shijobamme, sünda i ñegi dzü ye üshükülyetchojome.”

Jisu ufum kasaw ye

²³ I vyow ná che, “djuma no fum kasajo vedama, nudzoğ yo makasajoñe trawe seyo shüwa nudzo shokru i gilañe no fum kasajodawe.

²⁴ Hado chemeje dju yo nudzoğ shüw ye fupojome vedama na shokru í moajome, sé djudamje nobo nudzoğ uluvyu takyoima se iyo í fupojome.

²⁵ Nüna na vyow druguw-drulyiw í patsülameje, seyo nudzoğ uluvyu ye takyoame, semome ñiku-ñisüw pa, se yo ha palajowa?

²⁶ Djudamje no yo seyo no ñu yo ñimtchüñjema; nüna üsaw ye je ichi seyo i awu ichi sünda güdraw sorgomuko ichi lüshüw pawñe, ije ñimtchüñjome.

²⁷ No djo umso trungkoime, dju ayo ha a gudzudama, namko he a üchea na ana dame Tawgyew i ñetrü mahohumdoluye, na dzüw ye künama madanghujome.”

Musa ñe Eliya naksüdra Jisu

²⁸ He ñu na chelye ñegi şügzü fum sa a Patras, Yohañ seyo Yakub na üdra kügüw pu a ge lañe jike.

²⁹ I kügüngkolui ye, ukrumro utro a lya, seyo i gye ye grobülaşüksüñe lüna-lünakülye.

³⁰ Sese, muhu ksü se ye Musa ñe Eliya naksü üdra ñu chitrungkoi.

³¹ Na gülo güdrawdra hohu, sünda i dzüjo go ñu poği, se ye Yarusalem ge dajo.

³² Patras ñe üdraw na drumuñoñatsüdabi, sünda na pakülyewñe, i gülo güdraw; seyo se nüna ksü ye dju üdra gudzüsadama, hohu.

³³ Na ichi yo kajoñe dawñe, Patras i Jisu í che, “He übrawwa, ñi ha a gyow ye uwme: sünda: ñi lañe ulügü dzü dajome, a ye babo, a ye Musa ibo, seyo a ye Eliya ibo.” I madanghu, i ha chengkoima.

³⁴ I ana chengkobaiye, ná mumu yo boshiğiag, ná mumu yo bolyangkoi ye na geatsüg.

³⁵ Sünda se mumu yo ana ñu a zekülye, “He ye nosaw seyo no i golawme, i chew dzüwe.”

³⁶ He ñu i dzühungkoi ge, Jisu i akasa hohuda; sünda i mazüda ñyoda, sünda ha hohudama, se ñu í se ñeto ge djuje malakülye.

Muhusa í ñulo mauw yo lahua

³⁷ Seyo se draha na pu goşü kagaahuñe, upu dyew a í jiñe tüva.

³⁸ Sündawñe, upumko yo nuna a ye şogzuñe che, “He dadrüwa, no ba chengkoime, nosaw i nülwov hoijodawe; hado chemeje i nosaw akasame.

³⁹ Sünda howe, ñulo mauw a usso ge kamyoy, sünda i ülya akaye şogzukülyeg; seyo i se í ana ñüşülyiñiada, se i üga ge üzetcho fegükülye; seyo í ana damgzüw yo ñiku-ñisüw da tra.

⁴⁰ Seyo no bachi şürhaw ná che, í lahuawe; séşo na malahuafi.”

⁴¹ Jisu i che, “He maküñü seyo bolu datchüw şürhaw nawa, no djodra küña kuw ñyofisajowa, seyo djó daw na vejowa? I muhu i cheñ, basaw i age la jekuha.”

⁴² I jimkolai ye ñulo mauw ye í lola padubug, sé Jisu i ñişgzüñ ñulo í miñiñe seyo muhusa í uw dagyoñe uyow ügzü ge djü.

⁴³ Sündawñe vyow na Tawgyew i gow yo mavenghutsü. Sé vyow na í ha ha chiña dadama se na trongkoiye, sese i í şürhaw na che.

⁴⁴ “He ñu ye djo djofu ge vejodawe, hado chemeje nuna üsaw í nuna nagzü yo kigo ladügyejome.”

⁴⁵ Sé na he ñu i madzüsü; se i í madanghdügye; seyo na he ñu ífo go idra dzüjoje ñetcho.

Vyow namko yo dyewfo djuwa?

⁴⁶ Sünda şürhaw nañütchü ge ñu a kakülye, se i ye nangko a dju dyewfoma?

⁴⁷ Seşo Jisu i nalu ge vedaw í danghula, sünda muhumsasa a í lañe idra a gudzudügye,

⁴⁸ Sünda i che, “Dju damje noñiñi yo he muhusa i hutroima, se i nó hutrolawme; seyo dju nó hutroima, se na nó kidaw na je hutrolawbamme, hado chemeje djomko yo imisa yo imisafodama, se ye dyewfobamme.”

Dju maveñisama, na udraşome

⁴⁹ Sündawñe Yohañ i che, “He übrawwa, ñi nuna a ye bañiñi lañe ñulo mauw í lahuahuw hohudame, sündada ñi í gohame, hado chemeje i ñidra ñisañe bafum makasa.”

⁵⁰ Jisu i ná che, “Í djugohajo daw; hado chemeje dju djo mauw madama, na djodra dujome.”

Jerusalem ge jiw

⁵¹ Se í sorgo ge lalyimdrü ñeto kakusalaibi sese, sündawñe i Yarusalem ge jijoñe vye.

⁵² Seyo i ivro ge mukow ki: i Samariya na ñetrü a ge ji, ibó ñyojo dashütrüivojoñe.

⁵³ Sé na i magyogadügye, hado chemeje i Yarusalem ge jingkoida.

⁵⁴ Se i hoñe í şürhaw Yakub ñe Yohañ naksü che, “He Tawgyewwa; ba ha tsüda, se i ñi dügye, se i ñedzü go mi gaañe ná damyawewne ma?”

⁵⁵ Séşo i tcholtruñiañe na ze, [Seyo che “Ba madanghuwa ba ha uñulo yo ma. Hado chemeje nuna üsaw ye nuna nachi luvyu ye damütrajoñe madaw se í ñaksüijoñe kakuwme.”]

⁵⁶ Sündalye iñe i şürhaw na ñetrü utro ge jitrükralye.

Jisu ufum kasaw chemeje

⁵⁷ Se i ñabo jimkoi ge, se djuma a ye í che, “Ba hange hange jiyima, no bafum kasajome.”

⁵⁸ Jisu i í che, “Şelü ichi uksu seyo ñedzü go musu nachi üdrü duwme, sé nuna üsaw ichi ükye vejo je ñe ñime.”

⁵⁹ I utro nuna a i che, “Nofum jisawe.” I che, “He Tawgyewwa, nó uvromashü kadügyevzüwe, no awu í ñuavzüjome.”

⁶⁰ I í che, “Dzüdaw na ná nudzoñ dzüw í büñudame, sé ba jiñe Tawgyew ichi ñetrü go shi-ñu trujodawe.”

⁶¹ Utro a ye je che, “He Tawgyewwa, no bafum kasajome; sé uvromashü nó kadügyevzüwe no nochi ñe go nüna na yo mülüñ kajoñe.”

⁶² Jisu i í che, “Djudamje nudzo ügzü i luksungkuğu ge kiñe fum ge homeje, i Tawgyew i ñetrü ge gyofiwojome.”

10

Shüraw mroğu ná kiw

¹ Seyo he ñu nafum sa a Tawgyew i nüna mroğu lapyo, sünda ha ha ñetrü ge i jijoma, süge ksü, ksü dañe ivro kibragitsü.

² Sünda i ná che, “Rhamu kiw aña dume; sêso chiğa daw mesame duba sündada vi übraw i küğüwe chejodawe, se i í nudzoğ vi í tcholajo vi nüna kiwe.”

³ Jiwe; howe no djó fugulu vyeduw dañe fumsu namko ge kijome.

⁴ Sündada dzulngasaje djulawe, kapüğa je, seyo shita je; sünda gabo ge je nüna ná dju je gaga djudawe.

⁵ “Dju ñe ge jihima, uvromashü chevzüwe, ‘He ñe ge güdzüw djuwe chewe.’ ”

⁶ Süge djuma güdzüw pafiwo dumeje, ba güdzüw djüdaw ye üdra dusajome, momeje bachi ge kakutchojome.

⁷ Se ñe ge gyowe, sünda ichi go ha paima, se í tsa-tuwe, hado chemeje chiğa daw nüna na ná shishü patsüw; ñetro-ñetro djukahijodawe.

⁸ Seyo ha ñetrü ge jiyima, sügow nüna na hutrovowñe, se bavro a ha vedama se i tsajodabuwe.

⁹ “Sügow sonaw ná dagyojodawe: sünda ná chewe, ‘Tawgyew í ñetrü ye batrü iñiñisa ge kakudamme.’ ”

¹⁰ Sé ba ha ñetrü ge jimyoima, seyo sügo nüna na bá mahutrovolaime, ná bodzağ ge jeñe ana chewe,

¹¹ “ ‘Djo ñetrü yo ñelümo naje, ñishi ge güdrüsadow na, ñi djovro a pafiamkoimme, sedamje he í danghujodawe, Tawgyew i ñetrü djotrü iñiñisa ge kakulaimme.’ ”

¹² No djo trungkoime, se niyay ñeto se ñetrü ye Sodom ñetrü i je mofokaw gijo lyajome.”

Üdrü-ulu mavyegudow ná tui

¹³ “Tui Kurajiña! Tui Betseda! Dju dyew chiğa dafiwo ye djo ge dadama, sese í Sor ñetrüñe sidon ñetrü ge dameje, na ke ge gye güpañe seyo kütsesüpu ge gyoñe na kye ge dru-lu vyeğudoñjemma.

¹⁴ Sešo, melye gzuñe chegyi sehu bafo vyego yo yeje Sor ñe Sidon naksü vyego ye vyeksufofijome.

¹⁵ Seyo Kafarnahum ñetrü, hawa ba soğgo kuw lüvzüw dalyijoma? Ba bó noğu üla ge kuw üla kaajome.”

¹⁶ “Dju ba chew dzüima, se i no chew dzüjo, sünda ba dju mauw daima, noje i mauw dajome; seyo dju no mauw daima, se ye no kiadow i je mauw dajome.”

Shürhaw mroğu na kakuw

¹⁷ Se shürhaw mroğu yo ksü na lüshüw yo kakutchoñe che, “He Tawgyewwa, ba üñiñi yo se gúló mauw na je ñichi pudu-puña ulunge pumódame.”

¹⁸ I ná che, “No mütü í ñedzü lüğaw veduw ñedzü go gaahu hohuime.”

¹⁹ No djó byu na seyo mütü güdzü na dügrüdzagofijo djüwme, seyo vyeñiw nachi go vyew mau dafiwo ná madafijo pudu-puña djüwme; seyo ha gañ yo je djo naw madafijomme.

²⁰ Sé sünašo cheñe djulüshüwe, se gulo mauw na djo pudu-puña yo pumoda cheñe, sešo djo lüshüjo daw se djo ñiñi Ñedzü ge gi vyedotro yo.

Üsaw udru yo uyow í duw

²¹ Sa yo sa a i ĝulo güdraw yo dañe lüshüdzoalye, seyo che “He Awa, Ñedzü ñe No i Tawgyewwa, no ba ulu yo uw cheime, se ba he ñu na danghu-kinghuw nuna seyo vyesü-vyelüw na yo müšüñe veda, sünda angasa natrü ge duda. Am, he Tawgyewa, hado chemeje bá he í uw veda.

²² No awu i nó vyow nodru ge traadamme; seyo djuje madanghu se saw ye djujema, awu aka danghuba seyo awu djujema se je dju madanghu, se i ye sawchi gemdo aka seyo se djudru ge saw i dujoñe vyedama.”

²³ Seyo í shürhaw nachi ge tchoñe akasa ge che, “Ŝüvzüwme se iñi ye, se he ñu ná se ba hoiwa hoiye,

²⁴ Hado chemeje no djo chemkoime, ŝüpo ñihow truw na seyo ñubyu na tsüdaw ye, se ba ha ñu ye hoima howe; sé maho seyo ha ñu ye ba dzüima dzüwe, sé madzühu.”

Samri nuna uw a i zeĝaw

²⁵ Sündawñe nuna a gudzulyi; sünda ana cheñe í kúna daima hopüñew che, “He shotuko-kunu go dadrüwa, shüwa shüw shüjo ibo ha dameje ujowa?”

²⁶ I í che, “Shotuko-kunu ge ha ĝida? Ba kúnda ngüña?”

²⁷ I trutcho, “Ba Tabraw bá nudzoĝ Tawgyewchi go vyew nudzoĝ drü-lu seyo nudzoĝ krâše seyo nudzoĝ budzu vyew se nadra nülwov vyejodawe; seyo nudzoĝ ĝafopsüĝi-ĝampsüĝi go ná nülvojo dawwe.”

²⁸ I í che, “Ba umso chedaba, he ana dabya sündame üshü ĝyoyome.”

²⁹ Sé i í nudzo í usu dajoñe veñe Jisu í dzü, “Nameje nochi ĝafopsüĝi-ĝampsüĝi na djuwa?”

³⁰ Jisu i che, “Nuna a ye Yarusalem yo Jeriko ge jimkoi ye ñigudu tsaĝaw na djeshiĝiaña i gye í na shalügülag, sünda gü-shü dañe atrü dzüw datralye katrükralye.

³¹ Sünda ana da, se ĝabo ge müĝaw a kamkoi, séšo í holýe ĝeaglyeñe djetrükralye.

³² Ana vedumbo Lewi a ye je sešü katcho, ije í holýeñe ĝeaglye djetrükralyetcho.

³³ Séšo djudamje Samari ñetrü a go sa a kakukülye, sünda í hohulyeñe nülvo vyela.

³⁴ Sünda itrüĝañ ge jikuñe seyo ichi üshi ge luvuhu seyo tsühu prüñe gyeche-gyelye yo pyogo, seyo í güĝedru ge gyodügyelyeñe ñe ĝyow ge lajikyé sünda í uwyo hoivo.

³⁵ Se draha í lumu yo bosüñ ksü lahuañe se ñebraw i djüñe che, ‘I uwyo hoivojodawe, seyo bachi go küña kapyoima, se ye no kakuwñe doajome.’ ”

³⁶ Hesahelu he ba vyew ge se na ñigudu-tsaĝaw süna ge lyalahado, nadzüngko a dju ichi ĝafopsüĝi ĝampsüĝi go na ñe veiya,?

³⁷ I che, “Se i dju í nülvodama.” Jisu i í che, “Kai, baje kañe süná dajodawe.”

Marta ñe Mariyam

³⁸ Sündatcholye Jisuñe i shürhaw na jimkoitchoi ye, se i ñetrü a ge ji, seyo Marta cheñe mim a ye í iñe ge balada.

³⁹ Seyo Mariam cheñe uñum a duw, i Tawgyew ishitrü ge ĝyoñe i shi-ñu dzüw.

⁴⁰ Sé Marta chiĝa da dañe mavenghua sünda itrü iñisa ge jikuñe che, “He Tawgyewwa, ba haje mavema, noñum í no akasa chiĝa dawewñe traadaw ye? Sündada í chetcho, nó datunowe.”

⁴¹ Tawgyew i í trutcho, “Marta O Marta; ba ŝüpyo ñu ha vejema venglyeñe seyo mavenghu lyaha.”

⁴² “Séšo ñu a ye umsome, seyo se chiĝa uw í Mariam i golame; se i ichi go malaĝafijomme.”

11

Tawgyew Küĝüw í dadrüw

¹ Sündatcholye ahua ye i nolu a ye kûgûngkoi. Seyo i se kûgûfiahuwñe, ichi shûrhaw namko yo a ye í che, “He Tawgyewwa, Yohañ i í shûrhaw ná kûna veduw kûgûdrûdama baje ñi sûna veduw kûgûdrûwe.”

² I í che, “kye damje djo kûgûmkoime, sese chejodawe:

‘He Awa,
Bañiñ gûdraw vejome, ba gûdzü kakûlyawe.’ ”

³ “ ‘Ñichi muhu muhu yo tsajo-tujo í ñi djûijodawe.’

⁴ ‘Seyo ñi lalo na muchoaijo dawewe,
Hado chemeje ñi je, ñi mauw dado na muchoaijome,
Sûnda ñi mauw uw dajo yo gûksûiwe.’ ”

Prüggudruwe

⁵ Sûnda Jisu i ná che, “Djumko ye üdraw a duw ye djuwa, sûnda i ñegimko ge pakûlyeñe ichi ge ji í chewe, ‘He drawwa; nó odje üka dzü djüwe.

⁶ Hado chemeje, kasew-biñew go draw a ye nochi ge jikuda, sûnda ivro ge vejio nochi ge haje ñime.’ ”

⁷ Sûnda i ulung goñü ñu tru, se nó afafsüw djudjüwe; yabó ñegûdrûñü je dugoadammje, sûnda nosa ye nodra buño ge gûsadame, sûndada no bá pakûlyeñe haje madjûfijomme.

⁸ No ba trungkoime, se üdraw duñ sese je í pakûlyeñe haje madjûfisabamme, sedamje i ñimtchüñ ye tralye prûdo ye í kûña tsûdama sûña pakûlyeñe djûjoño.

⁹ Sûnda no djó cheime; prûmeje, djo djûjome; tchûmeje djo pajome; dûmeje, djobo voaijome.

¹⁰ Hado chemeje dju prûima, ná pajome; sûnda dju tchûima, na pajome; seyo dju dûima, nabo voaijome.

¹¹ Djomko ye dju ana awu duwa, se üsaw ye odje prûme, se í kunnu djü, seyo sûndalye tchü prûmeje, se tchü madjüw byu djü?

¹² Semome jeje prûlaima, se í mütü gûdzü djü?

¹³ Sûnda, ba mauyeñe je basa ná gañ uw djûjo danghumeje, se djo ñedzü go Awu, i ichi nudzoñ nûna prûi ná hado gûlo gûdraw madjûjowa.

Jisu ñe mütü na go dyewfo

¹⁴ Sündatcholye Jisu i ügadow gûlo mauw a í lahuatcho; se gûlo mauw ye kahuahüñe, ügadodo ye ütrü zekûlye; sûnda nûna na mavenghuatsü.

¹⁵ Séño namko ye kûña na cheda, “I bó gûló mauw nachi go dyewfow mütü ichi datunow yo lahuabaiwa.”

¹⁶ Utro na í dafidama hojoñe í ñedzü udru ge hadamge sheweñe cheshew shewe che.

¹⁷ Séño Jisu i, nadrü-nalü ge vedaw i danghulyeñe, na che, “Ha ha ñetrûgûfo ge brañidama, se ñetrûgûfo ye mütrûajome; sûnda ha ñe ye brañidama, se ñe ye je mümyajome.

¹⁸ Seyo sûnda mütü ye í nudzo íbo magotchow dame, se ichi ñetrûgûfo kûndañe dujowa? Hado chemeje djo nofo go ana cheñoibi, se mütü i datunow yo se mauw ná lahuabaibi cheñe.

¹⁹ Senameje no mütü i datunow yo gûló mauw ná lahuabaimeje, se djó agü na dju tunow yo kakûlyebaiya? Sûndada ná djo niyay djüw nûna chejome.

²⁰ Séño no Tawgyew udruyo yo uñulo mauw na lahuameje, Tawgyew i ñetrûgûfo ye djotrü ge kakujome.

²¹ Nûna gow na nachi ñe i gûksüw chiañi pyogoñe ñe í hokrûimeje, se ichi gañ-miñi na gûdzüw dujo.

²² Seño ije gofotchow na djuma a í tumuvojoñe í dafoahuñe, í se chiañi na ha ye i veksûdama, sena lañalag seyo ichi gañ-miñi na lañañe habrañiame.

²³ Dju nodra ñima se i no mavewme, seyo dju nodra dukyeñiyima se i trabrañajome.”

Gûló ñiñgûñ ye ñe tchüw

²⁴ “Nüna usso go ñișügzüñ ġulo kahuahüñe nokro ge ġyogojo tchüġijome, sünda mapawñe i chejome, no ha ñe yo kahua dama se ñe ge kamyotchojome.

²⁵ Sünda kakuwñe i ġümsa-ġümġañe howsa hohujome.

²⁶ Sündawñe i idra ye í je mofokow uġulo mauw mro ye idra ye lakujome, sünda na ilunge kamyoñe sayo sa ġyojome, sünda se nüna ye uvro gow ije mokofow mauw lyajome.”

²⁷ Sese i he ñu i trungkoi ye upumko go mim a ye gow yo che, “Șüvzüwme se uluhu ye hayo sa a ba ġyodama seyo se apu ye ha ye ba mütsüdama.”

²⁸ I che, “Am; séșo șüvzüwme i, dju Tawgyew i ñu dzüñe i chew dzüima.”

Ñedzü go ñu prüw

²⁹ Se șüpyo upu kyeġipyö dawñe, i che, “He ñishü yo nüna na maume; na chishew tchünggudru; se ná Yona i chishew í tralye seyo haje chi mashejome.

³⁰ Yona í küna veduw Ninwe ñetrü go chishew vewma, sünambo nüna üsa ye he ñishü yo nüna na chishew vedujome.

³¹ Müdzavye go nugom niyay djüw se ñetomüdrü ayo nüna nadra gudzuñe, í datrüwñe chejome, hado chemeje i Suleman i ñu dzüjoñe druguw-drulyiw udza go jikuda, sünda holabya he ayo he a Suleman ije dyewfo a du.

³² Ninwe go nüna na Niyay djüw ñetomdrü ye hesalu yo nüna nadra gudzuñe, naso ge truchoaijome; hado chemeje na Yona i ñu tru í dzüñe nadra-nalu muchoagye sünda howe, age Yona ije dyewfo a dume.”

Ussö go mütrü

³³ “Dju nüna je bela ge mütrü tchühoñe ġümșü ge seyo ñeshü ge mavewme, seșo mütrü ubo ge dzugo vewme hado chemeje nüna jikui na hohujoñe.

³⁴ Baso go mütrü ye bañi ye me, sündada bañi ġüdrameje, se basso naje vyow müsajome; séșo se ye maumeje, basso ge je nukuġujome.

³⁵ Sündada ufu je ksü-üñi je ksü dañe ġyowe, se müsaw ye baso duwye nukuġuañeme.

³⁶ Sündada baso ye vyow müsazeġiame, seyo se ichi hangeje manukrumeje, se sündame se vyow na müsajome, süna vyeduw ñeto ge dadawa, se mütrü ye ichi lünaw yo djó müsaw djüiwa.”

Mim na seyo Farisi na gohaw

³⁷ Jisu i ñu trungkoi ye, djudamje Farisi a ye i che, se nochi ge jiñe ava tsawe; sünda i ñelu ge djemyoñe ava tsajoñe ġyoag.

³⁸ Farisi na basha go na ava matsalu üshi-upo machew í holyeñe mavyenghua.

³⁹ Tawgyew i í che, “O Farisi, ba bekasa seyo bela na udru udru go ġüdrawșo, séșo balung ge vyesbiw seyo mauw vyesumokradama.

⁴⁰ Budzu ñiw nawa, dju ñepsü go vye ye dadama, hawa se i ulung go i madaima?

⁴¹ Am séșo, ulung go gañ-miġi duw na chi djüajo dawwe, sündameje bábo vyow ġüdraw lyajome.”

⁴² “Se Farisi nawa, djo tui me! Ba pudina ñe sudab yo, seyo vyow ñomñow sheġe baġüdo yo ülye ġü tronguaña djüşoma, séșo Niay i seyo Tawgyew i nülvo í mahutroiwa; tsüwbo tsüda hena je dañgudru seyo sena je tratcho.

⁴³ Farisia nawa, djo druge tui me! Djo ñegru ge nugo buġo uw vye seyo badzaġ ge ye djó gaga tsüw.”

⁴⁴ “Djo tui me! Hado chemeje djo se pelyado nuġu vedudame, süge nüna na udru ge dügrüñe kahi, se madanghuw nuġu du cheñe.”

⁴⁵ Sündawñe mükyew a ye í che, “Dadrüwa, he ana cheñe ba ñi tchüġoime.”

⁴⁶ Jisu che, “Oi shotuko-kunu dakyew nawa, djoje tui me! Djo ana lojemalofiw gañ me, nüna nadrü ge joșoi seșo yabó djo djogzüşü a je madadü.”

⁴⁷ Djo je tui! Djo se ñihow truw na nuġu chiw, dju djo aki-awu na shilyedama.

⁴⁸ Sündä: djo truksüw nüna me, seyo djo aki-awu na dalyedaw yo uw vye; hado chemeje na bó ná shidabi sündä djo ná nuḡu í daw.

⁴⁹ Sündada Tawgyew i patsü-sholu je chedame, se no nachi ge ñihow truw seyo shürhaw kiajome, seyo na naḡiyo küña na shijojema seyo küña na daše-damejojema.

⁵⁰ Se i ye küña ñihow truw duma naṡü í he druguw-drulyiw í daküleyjobo a fualyedame, vyew na ḡilyedo ye he ñefo ayo nüna nachi yo lajodawe.

⁵¹ Habil í üṡü yo dalalye Jakaria í shiw kuw se psüḡañe müḡañe naksümko ye shiw: no djo umso truime; ichi ḡido ye he ñefo syo shüdo nüna nachi go lajome.

⁵² Shotuko-kunu dakyew djo tui me! Se djo je patsü-sholu veḡiw bo ladaṡome, séšo djo djoluvyo makakume, seyo kakujoñe dado na dugo vye.

⁵³ Sündalye i sa yo kahuahuñe, sese shizew-ñuzew nañe seyo Farisi šüpyo ifum kase seyo i dagtso-damrhüñe, ha ha ñu bütuluweñe da, se i šüpyo ñu ufo bütuluweñe

⁵⁴ sündä na i ha ñu chehualaima ḡyokrü ḡyo, se umdzu yo ha damje ñu zetruahuw ye kigolajoñe.

12

Ḡivow seyo Farisi na dambo djulyawe

¹ Aña a sese hadzaḡ-hadzaḡ dzaw nüna fuguñe, aña ana kuw naḡütchü tcheḡi-lügyeḡi da, se i uvromashü í shürhaw ná che, “Farisi nago loḡāloḡe yo üḡa ḡyodawe.

² Vyojo haje dümyoñe maveme, madanghujo haje müṡüñe maveme.

³ Sündada ba ha damje nukuḡuw ge chedo ye, se i müsaw ge dzühujome; seyo ñeḡün ulung ge ufu ge ha aṡesa yo chedama, se ye ñelütsü udru go yo trujome.”

Iyo ḡewe

⁴ “Séšo no djo trungkoime, nodraw nawa, dju usso i shifidama se na seyo ha madamñefijomme, ná djuḡejo dawewe.

⁵ No djo trumchemjome djo djú ḡejoma, dzüwñe djú chigüje ge lañe djoafima, se í ḡejo dawewe; no djo trupangkoitchoimme, se í ḡejodabuwe.

⁶ Hawa ajolya ksü yo sülyisa pom madrüafima? Sedamje Tawgyew i namko ye a ye je makoṡoa.

⁷ Bakye go vyow ükyetrü duw naje ngümdzo vedame, sündada: djuḡejo dawewe, ba sülyisa na dafowme.

Jisu í matsüñe chewye hama

⁸ “No djo chengkoime djudamje no nüna navro ge nó noṡobiñe danghumeje na je nüna üsaw ye je Tawgyew i sorgomuko uvro ge ēṡobijome.

⁹ Séšo dju nüna navro ge no hopseḡiahima ije Tawgyew í sorgomuko uvro ye hopseḡiajome.”

¹⁰ “Dju nüna üsaw ütuma mauw truima, i datrudaw í muchoaijome. Séšo dju ḡulo güdraw ütuma mauw trüima, í datruw í mamuchoijomme.”

¹¹ “Nüna na ba müḡaw-ñegru seyo mükyew seyo damikyew navro lakuwñe, ba navro ge ha chemeje ujojema seyo küna chejojema se na djuvengüajodawe.

¹² Hado chemeje ḡulo güdraw ba sayo sa a ha chejome zedrújome.”

Nüna nugo a ye veduw

¹³ Seyo upu go nüna a ye í che, “He dadrüwa, noñuw í awu í bo-luko ná noje hawe chejodawe.”

¹⁴ I í che, “Nüna nawa, nó dju niyay djüw seyo baḡüḡiw nüna boña?”

¹⁵ Sündä i í che, “Uw yo ho ḡyodawe, seyo tsaḡa-laḡaw süna yo basü ḡyodawe; hado chemeje nüna na shüw ye dju bo-luko duw yo mashüwme.”

¹⁶ I í zeḡaw a tru, “Tümbum nugo a í no ge rhamu šüpo kakülye.

¹⁷ Sündawñe i ulvyu ge no hadajojemmañe ve, hado chemeje nochi ge bo no dakülyedaw rhamu na vejo buño je ñi.

¹⁸ Sündä i che, 'no ana dajobabi: no nó ñetchü í tashalyeñe dyew dalajo; sünda no rhamu seyo bo-luko na vyow süge vejo;

¹⁹ sünda no ġulo i chejo, ġuloa, bachi ge oje šüpo üġalaw kuw bo-luko vewme; ġyogowe, tsawe, tuwe seyo lüshüw yo ġyowe.'

²⁰ Sešo Tawgyew i í che, 'Chi madnaghuw nüna! He ñegimdo ñegi a ba lutuw ye lutukyoadügyejomme; sündawñe ba küña dashütrüñe vedama, se ye djuchi lyajowa?'

²¹ Ana je nüna duwme dju nudzo ubo bo-luko dashütrüñe ve, sé i Tawgyew iñigzü ge nugo mo."

Ha ñu yo je duhu djudajo dawe

²² Sündä i í shürhaw ná che, "Sündada no djo trungkoime, nudzo shüjo-dujo ubo djuvewe, no ha tsajojemañe; seyo nudzo usso ubo je ha gye-ġuvo shejojemañe.

²³ Hado chemeje tsaw-tuw í shüw ye, seyo gye-ġuvo í dyewfo usso yeme.

²⁴ Pülġam na hojodawe; na zuje mazuw seyo ñetchü ge rhamu je mapaw; sedamje Tawgyew i ná tsakyewšo. Bá musu na fow go aña dufowme.

²⁵ Djomko ye dju duwa, dju vengaw yo nudzo i shüngkoi ge ganta a ña damje shafijo ye?

²⁶ Sündada ba imisa fo chiġa íje madafimeje, hado utro ñu ná lañe vemyoñña?

²⁷ Bye go shoba ná hojo dawe, na kündañe shülyima; na chiġa je madaw chitra je madaw; sedamje no djo chengkoime, Suleman je í küña übadzü gidama, namko ye ana veduw gañ a je magime.

²⁸ Sündada Tawgyew i no go suso-müтчü namaje yow gye sheida sünda draha ná boti shüw ge joañe, anambo gye-ġuvo sheñe veihume; Tawgyew ge mesame veksüw nawa, djo künadañe aña masheijowa?

²⁹ Sündä djo ha tsajojema ha tujojema süna ve djuġyowe, sünda meaje mavemyow djudajodawe.

³⁰ Hado chemeje he druguw-drulyiw ayo go vyow tuġu-tumo na he ana veduw bostu na tchünggudruwme sünda ba Awu danghudame djo he bostu na šüpo tsüda cheñe.

³¹ Séšo ichi ġadzü i tchüjodawe, sündameje, he bostu naje pajome.

Bo-luko ná hange dashütrüñe vejowa?

³² "Nüna imisa nawa, djuġejodawe; hado chemeje ba awu i bá ġadzü paweñe vedame.

³³ Nudzo ichi fuñ-voñ na draalyeñe tunojodawe; sündalye nudzo ubo ana dalajodawe, ha ye üme malyajoma, sünda soġgo ge ana bo-luko dashütrülajo dawe ha ye makaajoma, djutrü iñisa ge tsaksutchüw naje majikujo seyo bulu naje mauw madajo.

³⁴ Hado chemeje hange bachi bo-luko duma, badrü-balü he süge dujome.

Dashütrüjo ġyovojo dawe

³⁵ "Djotsü na pyogo vejo dawe, seyo dju mütrü na dzodügyejo dawe.

³⁶ Sündä djo se kulo na veduw dajo dawe, dju nudzo dadrü í gzü jiw go ke kakujojemañe ġyokrü ġyow veduw; i kakuñe ñegüdrüşü düwñe mekutcho djeñe voa.

³⁷ Gaġüzewe se kulo í, djú dadrüw ye kakuñe madrumuvow hohudama; no djo umso trungkoime, i ütsü ge pyogolañe ava tsajoñe ġyojo, sünda üñisa jiñe í hoijo.

³⁸ I ñegi ge ülye ksü seyo ülye dzü ñepüñew ge je pakülyew hohumeje, se kulo ye gaġüzebamme.

³⁹ Djo he i danghujo vejo dawe, ñe übraw ye tsaksutchüw na tsaksuw ke jikujoma se í danghubammeje, i pakülye ġyojobamme, sünda nudzo ñe ge majimyogyejome.

⁴⁰ Baje dashütrü ġyojodawe; hado chemeje ha homoi ye jikujoñe mavew se homoi ge nüna üsaw jikujome."

Veksüfiw kulo djuwa?

⁴¹ Sündawñe Patras i che, “He Tawgyewwa, ba he zeğaw ye ñi aka bama mow vyow naje truwma.”

⁴² Tawgyew i che, “He veksüw seyo patsü-sholu hokrüw ye djuwa, djuchi dadrüw ye ná tsaw-tuw homai ge djüweñe kulo-kutro boñe ve.

⁴³ Se kulo ye gağüzeme, djú í dadrüw ye ana dangkoiye hohudama.

⁴⁴ No djo umso cheime; I í nudzo ichi vyow bo-luko ge zeğiw vejobamme.

⁴⁵ Séšo se kulo ye ulu ge ana vemeje, no dadrüw ye üğalaw ge kakujobañe veñe, sünda kulo seyo kulom na güñe seyo tsañe tuñe tukrañe gýomeje.

⁴⁶ Se kulo i dadrüw ye ana ñeto a ye, i madanghuw ñeto a ye, i í mağyokrüngkoi ye, seyo i madanghuw homai ye, kakujo sündañe í sojai djüñe í usu maw ge ngüañe vejo.

⁴⁷ Seyo se kulo dju nudzo dadrüw í véw í danghuñe, seyo madashütrüvoñe seyo í vew kuw ge makasabammeje, şüpo tsalajobamme.

⁴⁸ Séšo dju madanghuñe güw tsalajo chiğa dadama se ye me tsalajobame, sündada dju añe djüdama, í añe prújome; seyo dju şüpo boñe vedame, ichigo añe lajome.

Ğüdzüw duşome

⁴⁹ “No druguw-drulyiw ge mi dahow kakülyahume; sünda ha tsüdawa chemeje hesalu mi dzomzoaweñe!

⁵⁰ No baptisma lajome; sünda no malamdolu kuw no küna mauw ñiku-ñisüw ge gýojoma!

⁵¹ Ba vedaw ye no he druguw-drulyiw ge ğüdzüw kakudañe vedama? No ba chengkoime; mome, no dabrağiahuw kakülyahume.

⁵² Hado chemeje hesalu yo ñe ge nüna pom nağütchü ge magağijome, dzü ye ksü üdra seyo ksü ye dzü üdra.

⁵³ Awu ye saw üdra, seyo saw ye awu üdra maveğijome; añ ye sam üdra seyo sam ye añ üdra, apye ye safu üdra, seyo safu apye üdra maveğijome.”

Ümdrü í hosüw

⁵⁴ Sünda i upu naje che, “Mumu íje druguw go kalyiw hohumeje, djeañe ñedzü şüjo chew; sünda süna dabaibi.

⁵⁵ Sünda müdza gow ñedzü lyiw hohuñe cheibi, ñedzü şüw lyijome, sünda süna dabyo-dağyotcho.

⁵⁶ Loğa-loğe nüna nawa, djo ñedzüñe no naksü í utroñe danghudameje, hado he şüw-duw ubo kündañe madanghufia?”

Nudzo ñu duw ná chebruawe

⁵⁷ “Ba hesalu ba nudzo yo hado ñu mavelafia?

⁵⁸ Ba bá fodaw nüna üdra mukow ichi ge jingko ye, ğabo ge ñu chegüdrajo dawwe, momeje ba í mukow ichi ge şüñe lajikyeñeme, sünda mukow i bá shipashi nagzü ge djüñe seyo shipashi na bá pache ge şüñeme.

⁵⁹ No djo trungkoime, ba ajolya ajolya dañe magimdzoalu kuw, ba makahuafijome.”

13*Vegudolawe mome mütrajobamme*

¹ Nüna üchea sayo sa a djeku, seyo Jisu í Galiliyo nabo go ñu dzüngkoi, djuşü í Pilatus i í küğüw ge djüasadamma.

² He í dzühuñe Jisu i na che, “Djo ana veima, he Galili na utro Galili ná lalofoñe, hado chemeje nadru ge ana veduw ñiku-ñisüw djüda che?

³ No djo trungkoime, mowme; séšo djo djüdrü djolu mavetülümeje djo vyow he ñom yo mütratsüjobamme.

⁴ Mow djo ana vedama, Shilom ge nūna ġütrü šügzü djudrü ge post gaañe trüalyañe dzüdama: na vyow Yarusalem ge küña tuġu-tumo shütsüdama ná lalofoma?

⁵ No djo trungkoime, mowme; sêšo djo djüdrü djolu mavetülümeje djo vyow he ñom yo mütratsüjobamme.”

Lufuje üyañ üje majew

⁶ Sünda i he zeġaw ije tru, “Djuchidamje anggur vi ge lufuje üyañ a zuñe veda: i sayo sa a sheje thcüw jikuda, sé í mapa.

⁷ Sünda i vi ġyokrüw nūna i che, ‘Howe oje dzü gomdo no he lufuje üyañ go sheje tchüw jikunggudru, sé keje mapa, he í chepyojo dawwe, i hado no í ġyokrügejowa?’

⁸ I í ana che, dadrüwa, í oje a kuw ġyokrülüwe; no üdza üdza ge no chiguġuañe nobi sujome.

⁹ Sündañe, drawha ge sheje jelaimeje uw; se molaimeje chepyojo daşobe.”

Mim utsubo kuw í dagyow

¹⁰ Ġyogow ñeto sehu Jisu küġüw ñegru a ye truñe ġyoda.

¹¹ Süge mim a du, dju oje ġütrü šügzügomdo ksuw kaw mütü a kamyoda, sünda i utsubo kuw lyada, sünda i keje gudow magudzufiwi.

¹² Jisu i hohuñe balayeñe, che, “O mimya, ba bá hamalyiw yo kahuajemme.”

¹³ Sünda i ügzü í udru ge ve, sünda i djeañe gudow lyajebi, sünda Tawgyew í trokülyejebi.

¹⁴ Hado chemeje Jisu i ġyogow ñeto sehu dagyoda, mügaw na seyo nugobraw na nūna na che, “Ñegi ġe duw me, sa yo sa chiġa dajo dawwe, seyo se ñeto ye jikuñe dagyojo dabuwe; sêšo Sabat ñeto ge djudawe.”

¹⁵ He í dzühulye Tawgyew i che, “Loġa-loġe nūna nawa, ġyogow ñeto sehu djo djó nudzo fulhu seyo giġá na ñe tashalyeñe hu tuw lañe majikewma?

¹⁶ Seyo ha ye madafijo cheña, he mim Abraham üsam djuso ge oje ġütrü šügzügomdo mütü ye pyogodama, se í ġyogow ñeto ye vogodaw i kihuaajo?”

¹⁷ Ná he ñu na chewñe, í ubo mauw dai na ñimtchüñ lyatsü, seyo vyow upu na se uw chiġa dadaw ubo lüshütsü.

Pemdu üsü seyo pa í shipyew

¹⁸ Sünda Jisu í chetcho, “Tawgyew í ġadzü dju veduda? Seyo no í ha shipyew üdra djüsejowa?

¹⁹ I pemdu üsü a veduwbame, djú nūna na lañe ná vi ge trawma; sünda i shülyiñe shoñ lya; sünda ñedzü go musu na ufotsa ge guñe ġyow.”

²⁰ I sünda chetcho, “No Tawgyew í ġadzü í dju vedu dañe vejowa?

²¹ I pa vedudame, djú mim a ye lañe oje ulumo tola dzü ge gülüşüġia, sünda ñu-ñuñe oje ulumo ye pa lya.”

Ñegüdrüşü imisa

²² I ñetrü-ñetrü jiñe dadrüşü Yarusalem ge ji.

²³ Sünda djudamje a í che, “He Tawgyewa, nūna mesame basüafijobama?” I í che,

²⁴ “Ñegüdrüşü imisa yo jimyojodawe, hado chemeje no djo trungkoime, šüpo nūna na jimyojoñe dajome, se majimyoñe.

²⁵ Ñe ubrow gudzulyiñe ñegüdrüşü dugoahuñe, seyo ba ñepsü ge gudzuñe ñegüdrüşü düñe che, ‘He Tawgyewwa, nobo vojodawe,’ sünda i sügow no ba madanghume, ha hanggowa?

²⁶ Sündawñe ba chejo, ‘No ba how ge tsa-tuw sünda ba ñi bodzaġ ge dadrüda.’

²⁷ Sêšo i chejo, no djo chengkoime, ‘No madanghume djo hanggoma. Mütü chiġa daw nūna nawa, djo vyow no yo üġa ġyojodawe.’

²⁸ Süge ksew seyo utu trashügrüjome, ba Abraham, Isahak seyo Yakub seyo vyow ñihow truw ná Tawgyew ge ġadzü ge ġyodaw hohuñe nudzo í ñepsü kahuahuw hohujome.

²⁹ Sünda druguw seyo drulyiw; tchüsa seyo müdza go nüna na jikuñe Tawgyew i ñetrüğüfo ge dusejome.

³⁰ He i danghulajo dawwe, küña ná fum ge duma, na uvro ge dujome, seyo küña na uvro ge duma, na fum ge dujome.”

Herod i vyeñiw na

³¹ Sa yo sa küña Farisi na jikuñe í chejea, “Ayogo kahuañe kajo dawwe; hado chemeje Herodes í ba shijoñe vedame.”

³² I ná che, “Kañe se šelü í trujodawe, howe, no yow je seyo draha je uġulo na lahuañe seyo usso naw na dagyojolume, sünda ñegi dzü ye no chiġa damdzoajome.

³³ Sedamje no yow, draha seyo pülha kuw jijome, hado chemeje dju ñihow truw na Yarusalem í ñepsü ge madzüfijome.

Yarusalem ubo duhu

³⁴ “He Yarusalem! He Yarusalem! Ba se ñihow truw ná shiye, seyo bachi ge dju kiima ná kunu yo trümoahiye; no ana veduw küña tsüda, joñi i üsa ná utupro ulung ge küna tchelaima, sünambo noje basa ná lakyeġiajoñe daw, sé ba he í matsü.

³⁵ Howe, bañe babo kabra-kasaġijjome, sünda no djo chengkoime; ba ‘Ná üdrü-ulu yo uw cheime, se nüna ye gaġüzü dume dju Tawgyew iñiñi yo lañe kakuima,’ machemdolu ba nó keje mahohujome.”

14

Ġyogow ñeto ge dagyow

¹ Sünda í Ġyogow ñeto sehu djudamje Farisi nágo nugo a i ñe ge odje tsaw ji: sünda ná í usu yo hopasa.

² Süge í veduw muhu a du, dju usso dalfuñe nada.

³ Jisu í Farisi seyo shotuko-kunu damivro ná che, “Ġyogow ñeto ge dagyomeje ujo ma mow ma?”

⁴ Sé na madañda ġyo. Sündawñe Jisu i í ügzü kiñe dagyo, sünda kadügye. Sünda i í ügzü kidüñe dagyo, sünda kadügye.

⁵ Sünda i ná che, “Djongko ye dju duwa, djusa seyo fulhu ye kalü ulung ge gamyoa sünda Ġyogow ñeto ye kutcho malahuaño.”

⁶ Sé ná he ñu ge haje machefibi.

Tumowna ná hovow

⁷ I hobanda, tumona baladaw na uw uw buġo tsatchüñe lai sünda í se ná hoñe zeġaw ze,

⁸ “Djuma djo ġü ge balai ye, buġo dyew tsatchüñe djuġyodawe, asha baje dyewfo tumona baw je dufijome.

⁹ Sünda dju ije seyo baje badama, bá jikuñe ana chemeje, ‘Í buġo djüjo dawwe,’ sündawñe ba ñimtchüñ lyañe ülafo buġo ge ġyow dujobamme.

¹⁰ Sé bá bawñe, ülafo buġo ge jiñe ġyojo dawwe, bá badaw nüna ye jikuwñe, bá ana che ‘Drawa, uvro ge kalyiñe ġyoa,’ sündawñe badra a ġyosadaw navro ge udru kalyijome.

¹¹ Hado chemeje dju nudzo yo dyew dalaima, se ye imisa lyajome; seyo dju nudzó í imisa dalaima, se ye dyew lyajome.”

Dakülyew

¹² Sündawñe Jisu i í baladaw naje che, “Djo ñeto ge damje ñegi ge damje ava tsaw ge, nudzo draw, ayo-ñuw, ñeşü seyo nugo na djubajodawe, ana dañeme, naje djo balañe daġuñeme.

¹³ Sé ba ava tsakelai ge sapse, hamalyiw, üshilyew seyo iñiġew ná bajo dawwe.

¹⁴ Sündawñe ba gağüzebamme, hado chemeje nachi ge djó djüjo haje ñiwme, séšo djó ná güdraw yo üshükülyejo go kügüijome.”

Tsaw-tuw dyew go shipyew

¹⁵ Üdra ava tsasangkoi go nüna a ye he ñu ná dzühulyeñe che, “Gağüze nadra dujome, dju Tawgyew í ġadzü ge odje tsaima.”

¹⁶ Ná i che, “Djudamje nüna a ye ava dyew tsakeñe seyo sünda şüpo ná ba.

¹⁷ Tsaw-tuw dafihuñe, i í kulo ná tumona baladaw ná cheñe ki, ‘Age djebe; tsaw-tuw dafiadamme.’

¹⁸ Sé vyow na chetsü, ‘uvro go ye í che, no vi a prülawme, sünda no se í hojo dume; no ba chengkoime, no maf daijo dawwe.’

¹⁹ Utro a ye che, ‘No fulhu fulshi pom lawme, sünda no he na dañe how jingkoime; no ba chengkoime, no maf daijo dawwe.’

²⁰ Sünda a ye che, ‘No gzü dawme, sündada no majikufijome.’

²¹ Se kulo ye jekuñe i ñe übraw í he ñu ná trutsü. Sündawñe se ñe ubraw ye lusuvyulalye í kulo í che, ‘ñetrü go bozağ seyo ġabo ge kutcho jeñe sapse, kiği, üshilyew seyo iñiğew ná age lañe kakuwe.’

²² Kulo ye che, ‘O übrawa, ba küna chedama, süna damme; sé yaje buğo ufo dulumme.’

²³ Übraw ye kulo í che, ‘Ġabo ge seyo füta duw ge djeñe nüna ná künadamje lañe kakujodawe sündameje noñe gujome.’

²⁴ Hado chemeje no djó trungkoime, se tumona badaw ná no tsaw-tuw í tsapüñeje matsapüñejome.”

Dju Jisu í kulo lyafijowa?

²⁵ Sünda upu na ufum kasawñe, sünda Jisu i fum ge tchoñe ná che.

²⁶ “Djudamje nochi ge jikuñe, seyo nudzo awu, añ, ufum, agü, ñu seyo ñum seyo nudzo shüw-duw naje mahosübammeje, í no shürhaw mowme;

²⁷ Seyo dju nudzo shokru íje magilama; sünda nofum makameje; se je no shürhaw madafijome.”

²⁸ “Djomko ye dju post dzuğõndama, seyo uvromsahü bo küña kajoma, damdzojo kuw nochi ge duşoma ñima mahow?

²⁹ Ana dawñe, i shobo dzugoñe ñekru makrufiwñe, sündawñe hovow nüna na vyow í tchüğõşo,

³⁰ ‘He nüna ye damyowbo damyodaşowa, sé madamdzofiwa?’

³¹ Mo dju ñubyu duwa, utro ñubyu nadra tumo daw jiw, sünda uvromashü ġyoñe mavemchevzüme, se hadza büsha kulo lañe nodrü ge tujovodawye no hadza ġü lañe üdra dağufijoşoma mo mowma?

³² Mowmeje üğa ġyodamje, mukow kiñe ñu ġüdzüagyefijo.

³³ Ana veduw djo nudzo ichi küña duma ná nobo matrafimeje, se ye no shürhaw malyafijome.

Tsamtsalyow ġu

³⁴ “Ġu bo udame, sé ġu tsamğüw lyameje, se í ha yo ġu lüw dajowa.

³⁵ Se ye no ubo je seyo nobi ubo je chiğa ge makakujomme: se í nüna na ñepsü ge joajohubamme. Djuchi ge dzüjo ufu duma dzülasajodawe.”

15

Fugulu moahuw i shipyew

¹ Vyow patso-law na seyo lalo ubraw ná ichi ge dzüw jikuw.

² Seyo Farisi na seyo shizew-ñuzew na dubyoğunguñe che, “I bó lalo ubraw ná tüvañe seyo nadra ava je tsasai.”

³ Sündawñe i ná he zeğaw í tru:

⁴ “Djongko ye djuwa djuchi fugulu fuğua duma, sünda namko sa a moahuñe se sütü gütütrü sütü ná nodo ge tralye, se a moadaw í matchülalu kuw tchü gyo?

⁵ Sünda tchülawñe, i šüpo lüshüw upostu ge trütalañe ka.

⁶ Sünda ñe ge kakuñe draw seyo ñešü na bakeğiañe che, ‘Nodra lüshüsawe, hado chemeje nochi fugulu moadaw ye tchüladamme.’

⁷ No djo truime; ana veduw ñedzü ge je lalo a dju vyegudoladama ubo lüshüjome, küñambo sütügütütrü sütü nüna güdrow dju ulu mavegudojo duma nabo madama.

Bosüñ moahuw i shipyew

⁸ “Ana mim dju dujowa, djuchi ge bosüñ gü duw, sünda namko ye bosüñ a moadabi; sündawñe i matchü uw mütrü tchühoñe seyo ñe na süñe, dju uw yo matchüjowa?

⁹ Sünda tchülawñe, i üdram na seyo ñešü ná balañe che, nodra lüshü-lübasawe nochi bosüñ moadaw ye tchüladamme.

¹⁰ No djo truime; ana veduw, lalo nüna a í ulu vyegudolaw ge Tawgyew í sorgomuko ná ana lüshüjome.”

Saw tsağudroahuw i shipyew

¹¹ Sünda Jisu i che, “Nüna a ichi saw ksü duw.

¹² Naksümko ye kiğiw ye uyow í che ‘Awa, nobo go bo-luko duw ye, no djüjo dawew.’ I í ichi bo-luko na hağiağ.

¹³ Sünda ñegi aña makulu fum ye üsaw kiğiw ye vyow dashütrü lalyeñe ñetrü üğa a ge katrükralye, sünda süge bo-luko duw na vyow tsağudroamdzoag.

¹⁴ I vyow damdzoahuñe, se ñetrü ge nokrow kaku, sünda i usso ufobüla lya.

¹⁵ Sünda i se ñetrü go nüna a ichi ji, se nüna ye í í vi ge vo na awa gyew ki.

¹⁶ Sünda i ve uluhu í gudugyejoñe se votsa pago go vo na tsa; hado chemeje í djuje haje madjü.

¹⁷ Í vepalawñe, sünda che, ‘No awu ichi küña vi daw ná tsaw-tuw aña paw, seyo no age luhušüw yo dzüangkoibi.

¹⁸ No gudzulyiñe no awu ichi kañe í chejo, awa no ñedzüñe ba how ge lalo da-trodašomme.

¹⁹ No basaw chejo haje matramme, no ba vi daw a veduw vejodawe.’ ”

Saw tsağudroahuw í kakutchow

²⁰ “Sünda i gudzulyiñe, i awu ichi ge ji: üğa gudzudalu sa a uyow i í hoñe nülvo veag, sünda gyojeñe í krumogo lag, seyo šüpo chuma tsa.

²¹ Üsaw ye í che, ‘Awa, no ñedzü í hovow seyo ba how ye lalo dadamme; sünda hesalu basaw chejo go ñimme.’

²² Sé uyow i í kulo ná che, ‘Kutcho shedra uw yo je uw lañe í sheijodawe, sünda ügzütsü ge gütsülye lyeijo dawew, seyo ishi ge shita duijo dawew,

²³ Sünda rhano a dajo dawew, sünda me ñi tsa-tuñe lüshüfijobi.

²⁴ Hado chemeje nosaw ye dzüwmme, sünda üshükülyedamme: moahumme, hesalu tchülatchodamme.’ Sünda í lüshü-lübaw da.”

Saw nugow i shipyew

²⁵ “Sé üsaw nugow ye vi ge du. Sünda í kañe ñe kakulai ye, i nuğuw dagruw seyo ñuksu daw dzühu.

²⁶ Sünda i kulo a í balañe dzü, ‘He ha dangkoiya?’

²⁷ I í che, ‘Ba ñuw kakudamme, sünda ba awu i tsa-tuw dyew vedame, hado chemeje i í nüna uw hohuda.’ ”

²⁸ “Saw nugow ye he í dzühulyeñe i lusuvyumfoag seyo ñe ulung makamyogöñ lyag: séšo uyow i ñepse ge jihuañe í nü.

²⁹ I uyo i che, ‘Howe; no aña ojegomdo bá ĝaksüñe ĝyow, sünda ba chew keje madzügaahuw, nodraw nadra lüshü-lübaw dajo, ba no yow kuw küşüsa üsa adamje madjülü.

³⁰ Séšo he basaw ye ba bo-luko ná utroñiw mim nadru ge djoañe kakuwñe, ba ubo aña dyew tsaw-tuw dañe gyew.’

³¹ I í che, ‘Sawwa, ba shüwduw nodra dusaw; seyo nochi ha duma se vyow bachibamme.

³² Séšo hesalu lüshü-lübajodume hado chemeje he ba ñuw ye dzüñe üshükülyetchodabi; moadabi, se hesalu tchülatchodabi.’ ”

16

Budzu duw nüna

¹ Sünda Jisu je í shürhaw ná che, “Nugo a ichi ge hokrügiw a duwme, sünda nüna na i howye se hokrüw í i bo-luko ná tsağudroahime cheñe usso ge trutchoañe ve.

² Sünda nugo ye í balañe che, ‘He hawa no babo go ñu dzühuiye? Ba hokrüšo cheñe shewe; momeje ba hokrügiw ge mağyofijome.’

³ Sündawñe hokrügiw ye vemchepüñe, ‘Hesalu no hadajobya? Hado chemeje no übraw ye hokrügiw go no lahuangkoibi: noje no machifi; seyo no tsatuğujoje šüpo ñimtchüñ vei.

⁴ No danghudaba no ha dajoma: nó hokrügiw go lahuahuwñe nüna na nó nañe ge lajo.’

⁵ Sünda i übraw i chi gudzüdaw ná a a balañe dzüpüñe, no ubraw ichi ge ba küña dojo duwa?

⁶ I che, ‘Fuğua tsow psüw tel du,’ sünda i í che, ba kutcho ĝyoañe kako ge pomğü ĝijo dawe.

⁷ Sünda i utro a í dzütcho, ‘Bachi küña dojo duwa?’ I che, ‘Pu ulumo fuğua tsow dume,’ sündawñe i í che, ‘Bá kako lañe šügzüğü ĝijo dawe.’ ”

⁸ “Übraw ye se machiñiw hokrügiw í tro, hado chemeje i budzu yo chiğa dadabi; hado chemeje he druguw-drulyiw go nüna na ná ñeto go nüna nadra chiğa dasaw ge, müsaw go nüna ná fow budzu du.

⁹ Sünda no djo cheime, mauw go bo yo ba nudzo ubo üdra dalajo dawe; hado chemeje i kaahuñe, bá na shüwa-shüw lüshüw ge lamyosajo.

¹⁰ Dju imisa yo je imisa ge usuima, ná aña ge je usujobamme: seyo dju imisa yo je imisa ge usu mowma: se na aña ge je usu mojomme.

¹¹ Sündada ba he druguw-drulyiw ayo bo-luko ge usu mowbammeje, bo umso dju djüjowa?

¹² Sünda ba tuğuda-ğuvodzü i bo-luko ge je usu mowbammeje, ha ye bachi ma, se í dju djüjowa?”

¹³ “Dju kulo ye je übraw ksü í mağaksüfijome hado chemeje i a í mahoğon dajo seyo a í nülvo dajome; mome a udra gaağijo seyo a üdra magağijo: ba Tawgyewñe bo-luko naksü í mağaksüfijome.”

Tawgyew í gadzü i go

¹⁴ Farisi na, dju tsağotüdama, he na dzühulyeñe Jisu í maw-uw zekülye.

¹⁵ I ná che, “Djobó nüna na how ge uw dañe she, séšo Tawgyew í djodru djolu ná danghuwme, hado chemeje ha gañ ye nünan na how ge dyew dama, se ye Tawgyew i iñigzü ge imisame.”

¹⁶ Yohañ í kakuw kuw, shotuko-kunu seyo ñihow truw naje ná chiğa daw. Sehu ñetogomdo Tawgyew i ñetrüğüfo go shi-ñu truñe kaw, sünda vyow nüna na süna datsü.

¹⁷ Nédzüñe no naksü í kabrağiahu ye shotuko ütra a yo lyajobame.

¹⁸ “Dju nudzo ufum udra brağilyeñe utro nadra gzü daima, se na lalo dawme, seyo dju brağiñe ĝyodaw mim í gzü daima se ye lalo dawme.

Nugo nünañe sapse Lajar

¹⁹ “Nugo nüna a duw dju djüw rong seyo gye uw shewma, seyo shüwa-duwa lüshü-lübaw dañe gyonggudruw.

²⁰ Sünda Lajar iñiñ yo sapse seyo tsadu yo guñe í molgi ütrü toi tralye.

²¹ Sünda í vew, nugo í tsamyew djoadau yo uluhu í tsaşelajo; momeje şulyo na je í tsadu í kañe tsalowba.

²² Sünda se sapse ye dzütrükralye, sünda sorgomuko na í Abraham ichi laku. Seyo nugo ye je dzüdañe zuadabi,

²³ Sünda noğu üşü ge şüpo naw yo iñi voañe üga go hobanda, Lajar í Abraham í udru ge ggyodaw hohu.

²⁴ Sünda í guksuñe che, ‘He Awa Abrahamya, no nülvo veñe, Lajar í kiñe, ügzütsü üdza ge hu pagzüñe nozelbüla í ngüadügyeje dawwe, hado chemeje no he mi ulbu dzongkoige dzahiimme.’

²⁵ Séşo Abraham i che, ‘Sawwa vehujodawe, ba bá shülye ge gye-şuvo uw shehulyewme, sünambo Lajar i gye-şuvo mauw, seşo i hesalu age güdzüw pangkoimme, sünda ba namoahibi.

²⁶ Sünda he ñu na traañe no seyo ba, ñiksüngko ye go dyam a dzühadame, ago dju bachi ge jilağon dama, na majilafijomme, seyo sügo dju age nochi ge jikuğon dama na majikufijomme.’

²⁷ Lajar i che, ‘He awa, no ba chengkoime, ba no awu iñe ge kiyajo dawwe,

²⁸ Hado chemeje no ñu pom duwlume, i na hovrow ge he ñu na trume ujome, mowmeje na he anambo ñiku-ñisüw no ge kakuñeme.’

²⁹ Abraham i í che, ‘Nachi ge Musa seyo ñihow truw ná kako duwbase, na se í chew büdzüda.’

³⁰ I che, ‘Awu Abrahamya, mowme; nüna dzüw a nachi ge jikülyameje, na nadrü-nalu vyegudoğijome.’

³¹ I í che, ‘Na Musa seyo ñihow truw na chew maje madzübi se í, nüna dzüw namko yo djudam üşükülyeñe jiadamje, na madzüjomme.’ ”

17

Zehaw

¹ Sünda Jisu i í şürhaw ná che, “He ye umsöme ha ñu ye lalo yo ma, se ye kakujome, seşo se nüna í lalome dju yo kakuima.

² Dju he gato kunu namko ye djudamje a í dügaima, ibo shedra psüm yo udum ge pyogolyeñe, huği ge djoahuye ufojobamme.

³ Vemcheñe gyojodawe; bañuw datrulaimeje, zehajodawe, seyo vepalaimeje í muchoaijo dawwe.

⁴ Í ahua ye ülye mro datrudamje bachi ge ülye mro jikuñe che, no datrudaşomme, sündawñe ba í datrudaw í muchoaijo dawwe.”

Bá veksüw küña dyewda?

⁵ Sündawñe í şürhaw na Tawgyew i che, “Ñí veksüw í damñeijo dawwe.”

⁶ Prabu i che, “Bachi ge pemdu üşü ütraña kuwdamje veksüw dumeje, ba he kumtchü iyañ í ükrügomdo taprülañe huği ge şüwe chejo, sündameje i ba chew dzüjo.

Chiñiw kulo

⁷ “Sé djomko ye ana dju chejowa, dju kulo ye no chi momeje fugulu ná saw, sünda i vi go kakuwñe, sünda í che, ‘Kutcho age jeñe gyoñe ava tsabe?’

⁸ Haña i ná machejoma, no ava dashütrübe: no tsangko tungkolui kuw toi başümpe í kidzagolalyeñe no hoiwe; sünda se fum ye baje tsa-tuwe.

⁹ Haña i se kulo í ulu yo vejoma, hado chemej i í dügyedaw chiğa í aka dabada?

¹⁰ Anambo ba je, se vyow chiğa dügyedaw ná damdzoahuñe, baje chewe, ‘Ñi machiñiw kulome; ñi ha dasajo duma se í aka dabadame.’ ”

Tabüñ naw a í nülvo

¹¹ Sünda ana da, Jisu Yarusalem jiw ge Samariañe Galili ñetrü yo jipseañe ji.

¹² Sünda ñetrü a ge jimyongkoi ge í südzüm ġü ġoġo nadaw na tüva, dju na üğa gudzudama.

¹³ Sünda i üğa ge gudzüñe, gó yo che, “He Jisu, he dadrüwa, no nülvojo dawel!”

¹⁴ Jisu i í hoñe che, “Jebe; sünda bá nudzo í mügaw ná shejo dawel.” Seyo kabyo-kağyowñe güdrajebi.

¹⁵ Sündawñe namko yo a ye hoñe dagyolagdabi, gow yo Tawgyew í troñe katrükralye.

¹⁶ Seyo Jisu ishitrüge gaañe ukrumro yo ishi ge drüñe, ulvyu yo uw che; sünda í nuna uw.

¹⁷ He íbo Jisu i che, “Haña na ġü güdraw malyama, nameje se sütü ye hanga?”

¹⁸ Haña he tuğuda-ğuvodzü í tralyeñe dju ñimma Tawgyew í trojo?”

¹⁹ Sündawñe i í che, “Gudzuñe kabi; ba veksüw ye bá dagyodamme.”

Tawgyew í ġadzü kakülyahuw

²⁰ Farisi namko yo a í Tawgyew í ġadzü ke kakülyajowa che dzüñe, Jisu ná che, “Tawgyew í ġadzü ana holaw dañe makakülyajome.”

²¹ Sünda nuna naje ana machejome, age howe, age dume, süge dume. Hado chemeje, Tawgyew í ġadzü djumko ye dume.

²² Sündawñe i shürhaw ná che, “Sé ñeto je kakujome, hai ba nuna üsaw í hoğoñiw dzüajo, sé mahohujome.

²³ Nuna na ba chejome, ‘Howe, süge dume!’ Mome ‘Howe age dume!’ Séšo ba djujejo dawel sünda nafum je djudajo dawel.

²⁴ Hado chemeje ñedzü-lüğaw ye ñedzü üdza a yo utro üdza ge kuw müsakumbo, nuna üsaw ye je í ñeto kuwñe kakülyejoşome.

²⁵ Séšo uvromashü i şüpo ñiku-ñisüw gilajome, seyo he shülyiw yo nuna na í matsüñe chejome.

²⁶ Nuha i ñeto ge küna dadama, sünambo nuna üsaw i ñeto ge je dajome.

²⁷ Nuha i lü ulung ge magyomyolu kuw, nuna na tsa-tu ġyo, seyo namko ye gzü dañe ġyo; sündawñe hulüşü kaküñe vyow mauw damdzoa.

²⁸ Seyo Lut i ñeto ge dambo veduw, nuna tsa-tuñe bumdzu dağiw, shobro zuñe seo ñe daw.

²⁹ Séšo ha ñeto Lut í Sodom ge kadama, sehu ñeto ñedzü go mi seyo ecid şükülyañe vyow mauw damdzoag.

³⁰ Nuna üsaw í kakülyahu ge je ana dajobamme.”

³¹ “Sehu ñeto, dju ñelütsü ge duma; seyo na gañ ñe ulung ge du, na se na law ulung ge djukamyowe, sünda sünambo dju vi ge duma na fum ge djukawe.

³² Lut ufum í vehujodawel!

³³ Dju nudzo í ġaksüjoñe veima na mağaksüfijome, seyo dju nudzo shüw í mağaksüfima na basüjome.

³⁴ No djo trungkoime, se ñegi nuna ksü buğo a ye üşa dujome, a í latrayemjomme, seyo utro a í traalyjome.

³⁵ Mim ksü ye ġato üşa ġüjome, a í latrayejo, a í traayejome.

³⁶ [Nuna ksü vi ge dujome, a í latrayejo seyo a í traayejome.]”

³⁷ He ná dzühuyeñe na í dzü, “He Tawgyewwa he na hai dajowa?” I ná che, “Hai ñimo duma, süge kurkukiñ dujome.”

18

Müjemñe mauw zevow

¹ Sündá Jisu i ná he ubo go zeğaw a trulyeñe udrü-ulu magaada, mamuduw küğüweñe che:

² “Hange damje ñetrü a ye mukow a ġyow; dju Tawgyew ije mağew seyo nuna nabo je mavew.

³ Sündá se ñetrü ye müjem je a ġyow: dju ichi ge jikunggudruñe í chenggudru, ‘No insaf djüyeñe nobo ġaksüijodawe.’

⁴ I üğaluw kuw madzü séšo fum ye ulu ge vepüñeñe che, ‘No Tawgyew ije mağew, seyo nuna nabo je mavetunow;

⁵ Sedamje he müjem ye no matraa, sündá ubo insaf djüjo, mowmeje i nochi ge jikunggudruñe no ġüdzüw mağodügyejo.’ ”

⁶ Tawgyew i che, “Dzüwe, he mağüdraw mukow ye ha cheima?

⁷ Nameje: haña Tawgyew i í nuna basü ladaw ná mamutchoaijoma, dju ñegiw-ñetow í küğüñe ġyowma; seyo i ná üğaluw vejoma?

⁸ No djo chengkoime, i mekutcho ná mutchoijome; sé nuna üsaw kakülyahuñe, i he druguw-drulyiw í umso vefijosoma?”

Dju güdrawñe chejowa?

⁹ Seyo Jisu i shürhaw na dju nudzo í güdrawñe veksüw veima, sündá utro na mauw daima ná ana zeğaw che:

¹⁰ “Nuna ksü ñegru ge küğüw ji; a ye Farisi seyo a ye patso-law nuna.

¹¹ Farisi i gudzülyiñe üdrü-ulu ge ana küğü, ‘He Tawgyewwa no ba ulu yo uw cheime, no utro nuna na dambo tsaksu-laksuw, mütü chiğa daw, seyo mim ġubuw, seyo he patso-law na dambo nuna mowme.’

¹² No sopta ye ülye ksü tsaw-tuw matsaw ġyowme, seyo no bo-luko dalaw gow üchea je djüwme.”

¹³ “Séšo patso-law nuna ye üğa gow gudzüñe, ñedzü ge je iñi maholyi dá i ülüjetchü ge ġüñe che, ‘He Tawgyewwa, he lalobraw no nülvojjo daw!’

¹⁴ No djo cheime, i ufum yo mowme; séšo he nuna ye güdrañe ñe ge kajeme; hado chemeje dju nudzo í dyewñe veima, i imisa lyajome; seyo dju nudzo í imisañe veima, i dyew lyajome.”

Tawgyew í ġadzü anagasa na vedumbo

¹⁵ Sündá nuna na na sa naje ichi ge lañe jikeñe nagzü Jisu udru ge vefijoñe; sündá shürhaw na hohuñe ná goha.

¹⁶ Jisu i angasa ná ichi ge balañe che, “Angasa ná nochi ge jigyejo daw, seyo ná djugohajo daw: hado chemeje Tawgyew í ġadzü he nambo nabome.

¹⁷ No djo umso truime, dju Tawgyew í ġadzü í angasa na dambo malama, ná keje süge majimyofijome.”

Nugo nuna a Jisu í ñu dzü

¹⁸ Djudamje dümbraw a ye í dzü, “He uw übrowa, no shüwa-shüw shüjo ye küna dameje ujowa?”

¹⁹ Jisu i í che, “Ba nó hado uw chewwa? Djuje uw mowme, nuna a akasa uwbame, se ye Tawgyewme.

²⁰ Ba shotuko-kunu í bo danghušo: ‘Mim dju ġubuwe, djushiwe, djutsakšuwe, mülaw-mütraw djutruwe, nudzo awuñe nudzo añ naksü í chew dzüwe.’ ”

²¹ I che, “Nobo he ná vyew angasa ulvyu ladañe vewbame.”

²² He í dzüwe, “Jisu i ná che, bachi ge yaje ñu a ñilumme, bachi vyew ha duma ná draatsülyeñe sapse ná hatsüwe; sündá bá ñedzü ge luko pajome, sündá kakuñe nofum kasajo daw.”

²³ He í dzühulyeñe i šüpo duhu da, hado chemeje i šüpo nugo.

²⁴ Jisu i í holyeñe che, “Bo-luko duw na Tawgyew ichi ġadzü ge šüpo ataġa yo kamyofi-jobame.

²⁵ Tawgyew i ġadzü ge bo-luko duw na kamyoyo í bo ut í sütrü üšü yo kamyow je ufojomabe.”

²⁶ Sünda dzühu daw na che, “Nameje djú basüafijowa?”

²⁷ I che, “Haye nüna yo madafima, se ye Tawgyew i dafijome.”

²⁸ Patras i che, “Howe, nobó ñe-vi je tralyeñe bafum kasawme.”

²⁹ I í che, “No bá umso truime, ana djuje ñime, dju Tawgyew í ġadzü ubo, ñe, mim-kiġi, ñu, awu-añ seyo saw-sam ná trahuw.

³⁰ Sünda sa yo sa a na haje añe djupawe; seyo dzüwñe druguw-drulyiw ge shüw lüshüw pajodawe.”

Dzüñe üšü lyajo go ñihow

³¹ Sünda Jisu na ġüyo ksü shürhaw ná üdra lañe ná che, “Ñi Yarusalem ge jingkoime, sünda küña ñu nüna üsaw ibo ñihow truw na ġi vedama, se na vyow datsüjome.

³² Hado chemeje i tuġuda-ġuvodzü nagzü ge djüjome, sünda na í tchüġoñe-hoġojome, sünda zehu je müdrüdzajome.

³³ Sünda na í ġüjome, sünda shijome, sünda i ñegi dzü ye üshükülyetchojome.”

³⁴ Sünda na he ñu namko ye haje madzüsü sünda he ñu na namko ye müšütsü, sünda ha trudama se ye na madzüla.

Iñi ġew í iñi

³⁵ I Jeriko ñetrü ütrü üñisa jikulai sa a, iñi ġew a ye üdza ge tsatuġuñe ġyoda.

³⁶ Sünda i upu na dügrü jiw dzühuñe dzüpuñe, “Ayo a ha dangkoiya?”

³⁷ Na í tru, “Jisu i Nasri ge jingkoime.”

³⁸ Sündawñe i ġuksuñe che, “He Jisu, Dawud i üsaw, no nülvojjo dawe.”

³⁹ Dju vro-vro jeima, na í madañda ġyo cheñe ze, sé i umsow šogzukülye, “He Dawud üsawa, no nülvojjo dawe.”

⁴⁰ Sündawñe Jisu i gudzulyiñe í ichi ge lañe jikuwe che, sünda i iñisa jikuwñe, i í dzü,

⁴¹ Bá ha tsüda, “No babo daijome?” I che, “He Tawgyewa, nó hofidügyewe.”

⁴² Jisu i í che, “Hojodabe, ba veksüw ye ba dagyojemme.”

⁴³ Sünda í djeañe hohu; sünda Tawgyew í troñe, ufum kase, sünda vyow nüna na hohuñe, Tawgyew ibo trotsü.

19

Jisu Jakariya ichi ñe ge

¹ Jisu Jeriko ge jimyolye jimkoi sese.

² Süge Jakkai cheñe nüna duvo, i patso-law go mukyew sünda nügo je nügo.

³ I Jisu í hoġoñ vyew i djuma cheñe? Sešo upungda sese mahofi. Hado cheme i üchesada.

⁴ Sese i í hojoñe vye uvro ge gyo djeñe lufuje shoñ udru a ye lyilyig, hado cheme Jisu i se ġabo kajoda.

⁵ Sese Jisu se a jikuñe, udru ge hotrolyiñe í che, “He Jakkai, kutcho lyiga; hado cheme yow no bá ñe ge ġyojo dume”.

⁶ I kutcho yo lyigalye lüshüldzulalye í ichi ñe ge la kake.

⁷ He í hohulyebi nüna na zeġi, “I bó se lalo nüna ichi ñe ge jijebe.”

⁸ Jakkai i gudzuñe Tawgyew í che, “He Tawgyewwa, No nó bo-luko üchea ye ñiw ná djüjome, seyo üchea ye sena djüjome djuchi go no laġamüñeda ma se na no psüġingua fow djüpyojome.”

⁹ Sese Jisu i í che, “Yow he ñe a muchoahuw jikudame, sündada he i je Abraham ichi sawbamme.

¹⁰ Hado cheme nūna üsaw ye moadaw ná tchüw seyo ná basüaijo kakuwme.”

Bosün uvyu gü

¹¹ Sese i he ñu ná dzümkoï sese, i zeğaw a ze, sündada chedawa i Yarusalem ütrüañ a duda, seyo i vyesüw je vyesüw, se Tawgyew ichi ġadzübraw ye hesahe kakudalaibiñe.

¹² Sünda: I che, “Nūna nugo a ye ge ñetrü üğa ge ka sügo nugo pafiñe kakutchofijo.

¹³ Seyo i í kulo naği yo ġü ye balalye ná bosün uvyu ġü djü, seyo ná che, ‘No kakuw kuw bumdzu davojo dawwe.’

¹⁴ Sešo í ñetrü ge ġyodaw na í mahoğon daw, seyo ífum ge muko kiñe ñu che ki, se i ye no matsüme, se i ñidru ge ñubyu dañjo.”

¹⁵ “I ñubyu lyibiñe kakutchow sese, i ana a da, ichi se kulo ġü ye dju í bosün uvyu ġü djülyedama, se na itrü a balaku sünda danghujoñe vyeñe se na se i yo küña ha ha dashaladama.

¹⁶ Sese uvromashü yo a ye jiku che, He übrawwa bachi djüdaw bosün uvyu ġü yo dañe ġü müñew damñeladame.

¹⁷ I í che, ‘He kulo ülüksüfowwa, bá šüvzüw me, ba šüpyo mesame sese ba umsowda kakülyeda, ayo ba ñetrü ġü yo übraw dabei.’

¹⁸ Sefum yo a ye jikuñe che, ‘He übrawwa, hošoa, bachi bosün yo uvyu pom dashamüñewme.’

¹⁹ I í chetcho, ‘Ba je ñetrü pom yo übraw dabei.’

²⁰ Sefum ye a ye jikuñe chetcho, ‘He übrawwa, hošoa, bá bosün ye he duw ye, he í no nó gye ġupaw üdza toi pyogoñe vyedaw he.

²¹ Hado chemeje no bá ġedabi.’

²² I í che, ‘Mauw kuloa, no bamdzu yo bá no trudañe chei he me.’ Ba nó danghuwbi nūna mügzütchüwñe, ha ye no ma vyema se í dzula, seyo se no ma zuw, se í djoahuwme;

²³ Ba nochi bo ye bo dashabraw ná hado madjüña, se í no kakuñe sashadaw ye lakeğijobi?

²⁴ Seyo dju nūna na üñisa gudzudama, se na í che, ‘Se bosün ye ichigo latchojodawe, seyo djuchi ge bosün ġü duma se í djüpyojo dawwe.’

²⁵ Na í che, ‘He übrawwa, ichi bosün ġü bó dušo.’

²⁶ ‘No bá chemkoime, se djuchi ge duma, í seyo djüpyojoluwe; seyo djuchi ñima ichi go se í je lajodawe se ichi ha dusama.

²⁷ Sešo nochi se fugulu ná se vyeñidaw na se no nadru ge ñubyu dame, se na age lakuñe noñisa a shiwe.’ ”

Jerusalem ge fojelübzüw kakuw

²⁸ Jisu i he ñu na chelye i Yarusalem ge navro-navro ka.

²⁹ Seyo se i Jetun üñiñi yo pu sa a Betfage ñe Betniyah üñisa ge jikuwñe, sese i í shürhaw naği yo ksü ye ana cheñe ki,

³⁰ “Üñisa yo ñetrü ge jijo dawwe, seyo süge jikubyo jikuğyoñe giğe ichi üsa a udru ge djusa je magyoluww, pyogo vyedaw bá pajome, se í tashalye lakuwe.

³¹ Seyo djudamje bá dzülaimeje, hado tashamkoïya chemeje, se a ana chejodase, se Tawgyew i he í tsüdame”

³² Se kidaw ná, na jikuñe i ná ha chesedama, süna pabadabi.

³³ Se na giğe üsa ye tashamkoï se, ichi übraw ye ná dzü, “He üsasa ye hado tashamkoïya?”

³⁴ Na che, “Tawgyew i he í tsüdame.”

³⁵ Na í Jisu ichi ge la kaku seyo nudzoğ gye ye tapualye se udru a ñeilye Jisu í giğe udru ge gyodügye.

³⁶ Sünda na kamkoï sese, na nudzoğ polu ye ġabo toi ñevoñe ji.

³⁷ Seyo ũñisa kakulye se i Jetun pu i ġo ge kaku, sese shürhaw na vyew upua na vyemoñe chiġa dadaw ibó i hohuda na, lüshüldzuañe gow yo ñu zeñe Tawgyew ibo trokülye:

³⁸ Šüvzüwme se ñubyu ye, dju Tawgyew iñiñi yo jikuma!

Sorgo ge ġüdzüw seyo ñedzü ge lüshüwme!

³⁹ Sese upu na yo süña Farisi na í chengkoibi, “He Danghubrawwa, bá shürhaw ná zea.”

⁴⁰ I ná chetcho, “No djomko a chemkoime, he i maziw ġyome, kunu na šogzukülyejome”.

Jerusalem íbo ksew

⁴¹ Se Jisu ũñisa kakuñe se ñetrü í holye ubo kse.

⁴² Sündalye che, “Ha ye ujowa, he ba; am, ba bába, he ñeto ai lüshüjo ñu danghudama, séšo se i yabó bañisa yo mušwadabi.

⁴³ Hado cheme se ñeto ye badru ge kakujome se bá vyeñiw na sülyeñtchü pyogoñe bá djetuġujome, seyo djetuġulye bá ñujome.

⁴⁴ Seyo bá seyo badra ayo a ná bachi angasa ná, nogüdzü nadra gülyiajome, seyo badru ge kunu yo je kunu matrüjome; hado cheme ba süna dajo ye kye badru ge nülwov vyeñe hojema sei madanghuje”.

Ñegru í dagudrahuw

⁴⁵ Sese Jisu i ñegru ge drüñe ġyodaw ná nopsü ge lahuatsü.

⁴⁶ Seyo ná che, “Ġidame; ‘Nochi ñe ye küġüw ñejome,’ séšo djo he í tsaġa-laġaw nachi ñe da joadamme.”

⁴⁷ Seyo i muhu-muhu ñegru ge shi-ñu truñgudru: seyo se müga sawlyiw na seyo shizew-ñu zew na vyew djekeġiñe í shijoñe tumuñgudru.

⁴⁸ Séšo haje ġabo matchüla; he í küna dañe dajojema, hado chemeje vyew na dru-lu djübyo djügoñe ichi ñu dzüñgudru.

20

Yahudi na Jisu í ñu dzüw

¹ Ahua ye ana a da, jisu i sese ñegru ge shi-ñu trumkoi sese, mügaw dew seyo shi zew-ñu zew kew nadra jikuñe sese gudzu.

² Seyo chemkoibi, “Ba ñi truwe, ba he chiġa ná dju dadügyedañe dawdo daña, seyo se i djua, dju bá he i dawene dügyedaye?”

³ I ná trutcho, “No je djó ñu a dzüjome; nó trujo dawwe

⁴ Yohañ ichi Baptisma djüw ye Soġgo go ma mo nüna yo ma?”

⁵ Sündawñe naġütchü zeġi, “Se ñi chebammeje, ‘Soġgo gobabi,’ süñchewñe i chetchojo; ‘Sünameje djo idru ge hado umso mavyeña?”

⁶ Seyo ñi chetchojobi, ‘Nüna yo me chetchobamme,’ se vyew na ñidru ge kunu trüjobi, hado cheme i umsow go danghudabi, Yohañ i ñihow cheñe.”

⁷ Dañdañlye na tru, “Ñi madanghume, se i djuchi go jema.”

⁸ Seyo Jisu i ná che, “Nameje no je djo matrujome no he chi ná dju dügyeñe dadama.”

Bolu mau vi daw nüna i laġüshi truw

⁹ Sese i se nüna ná he ana zeġaw go tru, “Nüna a ye anggur zugua, sündalye vi daw ná howeñe bo ve seyo šüpo uwalaw kuw utro ñetrü ge jitrükrallye.

¹⁰ Bomdrü sese i vi daw nachi ge kulo a ki, se vi yo kakülyedaw anggur üje ibó je djüweñe cheñe k, sé vi daw na í gümoamdo gümoañe ufo kadügye.

¹¹ Sündawñe i kulo a ye kitcho, sé na se í je gütcholyebi zeaše zeameñe ügzü ufo kikutcho.

¹² Sündatchowñe i ülye dzü kitcho, seyo na se í je dzütchüzew gimoañe lahuag.

¹³ Sündawñe se anggur go vi übraw ye che, ‘No há dajobabya? No nó saw í kijobaba, asha na í chew dzüw dujoješoma.’

¹⁴ Sese vi daw na i hohulyebi nağütchü poği, ‘He i bó üsaw ye ba; age djebya, ñi í shibow, sündañe he na ñichi lyajobi.’

¹⁵ Seyo na í se anggur vi yo lahuañe shiag: sündada vi übraw i nadra ha dajobabya?”

¹⁶ “I kakuñe se anggur vi daw nüna ná damütrajo, seyo vi ye utro ná djüjo.” He í dzühulye na che, “Tawgyewwa ana djuda.”

¹⁷ I nachi ge hulye che, “Se he ye ha gida:
‘Ha kunu ye ñe dasüw na ha madağiwnë süñe adama,
Se i ukutru go dakrükye se i lyada.’

¹⁸ “Djudamje se kunu ge gaahima se i ganüajobamme, seyo djudru ge i gahima, se í gñünü-gñüajobamme.”

Shi-ñu zekyew nañe Mügaw sawlyiw na lütsa

¹⁹ Seşügudo ye Shi-ñu zew nañe seyo Mügaw dew na í külyijoñe vye, hado cheme danghula dabi, i nabó magow ñu zeğaw yo tru, seşo í ná büğedañe vye.

²⁰ Seyo na í hokrübabiñe seyo ichi ge hotumuw ki, se hadowo cheme i alyamo alye ye shi-ñu trutroameje sese ñustu kigojoñe, se í nugo ichi ge trutroadame che djüfijoñe.

²¹ Na í ana dzü, “He dadrűwwa, ba mülaw truiñe ñi danghudame, Seyo dadrűw je darüi, Seyo djubó go goñeje mache; Semome Tawgyew ichi gabo ye umsow trufijo.

²² Hawa ñi Kesar í patso djümeje ujoma, mo mowma?”

²³ I ná budzu yo dzüi ye dzüsülye che,

²⁴ “Bosüñ a nó shejo daw. He a djuchi gîge düdama seyo dju ñiñ duma?” Na che, “Kesar ichi.”

²⁵ I ná chetcho, “Se Kesar ichimeje í djüwe, seyo Tawgyewchimeje í djüwe.”

²⁶ I nüna ñisa a se ñu ye madzüsüla, semome ichi ñu hutrodaw se i yo mavyenghuatsü.

Güdrakosküwñe gzü

²⁷ Sündatcholye Saduki i chew ye, nüna dzüw na kenghuañe maüşhujome, naği yo nüna üchea na ichi ge jikuñe dzü.

²⁸ “He dadrűwwa, Musa i ñibó ana gida, ‘Se djuchi damje üyalyo a ichi ufum ye saw-sam malaluye dzütrükralyemeje se üñuw ye se mim üyañedra i gzü datchowe, seyo üyalyo íbó agü mulo sakülyewe.’

²⁹ Sünda ye alyoñuw mro duw, üyalyo nugowfow ye agü je masakülyelubi ye dzütrükralye.

³⁰ Sefum yo ye je,

³¹ Seyo seladzü kiği ye je se mindra í gzü daladabi. Se ana dadañe namro mamro agü masakülye dzümdzoaha.

³² Se nafum se mim ye je dzüase.

³³ Se a na üshükülyemeje se mim ye djufum lyijowa, hado chemeje i na mro mamro üdra gzü datsüwdabi.”

³⁴ Jisu i ná che, “He ñefo go shüdaw agü na gzü daibi,

³⁵ Se dju nüna damje ana lyifikülyemeje, sé ñeto go dzüdaw nüna na üshükülyetchojo lyifime, namko ai gzü madafijo.

³⁶ Se i dzü je madzüjo; hado cheme i sorgomuko vyedujo, seyo güdrakoşksüw yo agü üshükülyemeje Tawgyew ichi je agü lyijo.

³⁷ Seşo he ñu ye dzüdaw na je üshütchoi, Musa je shoñ ge süna folakülyeda, i Tawgyew í ‘Abraham üsa, seyo Isahak üsa, seyo Yakub üsa ana chelyew.

³⁸ Tawgyew ye dzüw nachi mow seşo üshü nachi Tawgyew: hado chemeje ubo yo vyew na üshütsü.”

³⁹ Sese na se í dzühulye Shi-ñu zekew küña duma na che, “He dadrűwwa ba uw chejejeba.”

⁴⁰ Seyo bó na í ha madzülofibi.

Jisu Dawud üsawma mo Dawud ichi Tawgyew ma?

⁴¹ Sündatcholye Jisu ná dzütcho, “Masi í Dawud üsaw cheñe kúndañe cheña?”

⁴² “Dawud i üsaw Masi i kako ge cheda:

‘Tawgyew i nochi Tawgyew í cheda,

Nochi südzüvopsügi ge gyowe,

⁴³ No bá fugulu ná bashitrü ai malakyeğitsülü kuw.’ ”

⁴⁴ “Dawud bó í Tawgyew chew; se sünameje i í üsaw kúnda cheña?”

Shi-ñu zekyew nüna zew madzüw ná Jisu í trüdrü

⁴⁵ Vyew na dzümkoise, i í shürhaw ná che.

⁴⁶ “Shi-ñu zekyew na yo hochiğiwe, dju shedra psüw sheñe kahi uw vewma, seyo ná bodzağ ge gaga daw, seyo küğüw ñegru ge psüga dew ge gyoyo uw vyejome.

⁴⁷ Na müjem nachi ge tsaw jiñe seyo bühodañe uwalaw kuw küğüw dawme, he na şüpyo mau ñe ge gajome.”

21

Haje ñiw müjem ichi umsow lapsü djüw

¹ Sündatcholye Jisu i ñni yo lapsü dzüw nüna na nudzoğ nudzoğ lapsü í lapsügyebyo ge trümkoise hohu.

² Seyo i haje ñiw müjem a ye je i sayo sa a bosüñ ksü trümyoajew hohu.

³ Sese i che, “No djó umsow chejome se i ye he haje ñiw müjem ye fow trümoabajeme.

⁴ Hado cheme nabó nachi nudzoğ nudzoğ lapsü yo me trüje, seşo i í şüda yo küña dusama vyew trümdzoajebi.”

Ñefo i mudzoajo go hosüw daw

⁵ Küña nüna na ñegru ufo go chemkoise ye, se i küña kunu howsa yo seyo gañ yo chibra daida, se i che,

⁶ “Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome.”

⁷ Na í dzütcho, “He dadrüwwa, he na kye dajowa? Seyo he ñu na dajobi sese, ha chi hosüw dujowa?”

⁸ I chetcho, “Chitchüğivowe, dju dzüşeawe, hado chemeje şüpyo nüna na nó ñiñi lañe chejome, no se ibamme; seyo he i damdrü kakudamme: djo se nafum djukasejo daw.

⁹ Seyo djo psegi-luği daw süna nafo go dzühulaimeje, dju gejo daw; hado cheme he na uvromashü davzüjowbamme; seşo se ñeto kutcho mamütrajome.” Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome, Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome,

¹⁰ Sündawñe i ná che, “Gübye yo gübyeğütchü seyo ñetrü yo ñetrüğütchü pseğijome.

¹¹ Seyo ñeğüzüw je dew dew dajome, seyo ñetrü ñetrü sapseañe seyo gañemu kajome, seyo ñedzü ge ñiğeniñu seyo dew dew chi shejome.

¹² Seşo he ñu na madaluye na uvro nó ñiñi yo kigovzujome, seyo maw-uw ze dajome, seyo ñegru ge djüjome, seyo pache ge şüjome, seyo ñetrü ge ñetrü ñubyu natrü ge lajikujome.

¹³ Se he na babó ñu truvomdrü kaküleyjome.

¹⁴ Sündada nudzoğ nudzoğ drü-lu ge pyogo vyejo daw, no vrogomdo trufijo se í duhu madadañe.

¹⁵ Hado cheme no bá ana chejo seyo ana budzu djüjome, se bá mau zeñe zeaşe zeame dai na madafijo.

¹⁶ Seyo bachi awu-añ seyo ñuw-ñum seyo ñeşüğ-ñepyeğ, seyo draw na je tsüladügyejobamme; aña kuw dajome, djomkoye şüpo na dzüdügyejome.

¹⁷ Seyo no ñiñi yo badra mau dajome.

¹⁸ Séšo bakyetrü umu a je matrüafijome.

¹⁹ Ba nudzoğ drü-lu ye güdzüw yo shütrüñe vyejo dawe.

Jerusalem í mütrüw

²⁰ “Ba kyedamje Yarusalem í rhünokew na yo jîgshiğiahuw hohume, sese ichi mütrüjo üñisabammeñe danghujo dawe.

²¹ Sese dju Yahudiya ñetrü ge duma se na pu udru ge djetralyewe, seyo dju Jerusalem ulung ge duma se na djehuaajo dawe; seyo dju ñetrü ge duma se na süge djujijo dawe.

²² Hado che se i dutruğijo ana ñeto kujome, sese ñu giñe vyelyedaw na vyew ly-itsüjobamme.

²³ Se ñeto ge dju agü ñiw seyo agü apu tudügyeima, se nabó tui! Hado cheme se ñeto ge no nağütchü dağijo seyo se a ná şüpyo ñiku-ñisüw lyijo.

²⁴ Na vyetsü ürhü yo süğüajome, seyo vyew ñetrü drü-drü ge mubyo na lakuzeğiatşüjome, seyo utro sama nachi ümdrü vyew makulu kuw, sese Yarusalem í utro sama yo dashiğiajome.

Jisu i kakutchojo chitruw daw

²⁵ “Seyo dru seyo hubye seyo lütsü se na ge chi shejome, seyo nomñew ñetrü a je, ñetrü drü-drü go nuna ná chitruw dajome; hado cheme na sütügülü ichi hu rhaw yo lamo getsüjome.

²⁶ Seyo ğew yo druguw-drulyiw a trüw kakujo se í hohuñe nuna üshüjoñe je mavyejome, hado cheme ñedzü go gokew ye je ğüdü-ğüdüjome.

²⁷ Sese na nuna üsa í lüshüw-lübaw mumudrü ge gow kalai hohujome.

²⁸ He ñu ye trumkoi sese, ükye ye gudow dañe udru ge hotrojo dase; hado cheme bá solutoajo üñisame.”

Tawgyew ichi ñetrü ñubyu üñisabamme

²⁹ I ná zeğaw je a tru, “Lufuje üyaññe vyew shoñ na howe.

³⁰ Ichi übatra kakülyebyo kalyeğyowñe, se í ba hohulyeñe balvyo danghulaibi ñeshü kalaibiñe.

³¹ Sünambó vyeduw ba he ñu na kye hohuima, sese danhulababise Tawgyew i ñetrüğüfo kakujo üñisababiñe.

³² No bá umsow trujome, he ğhei ñu na madalu kuw he ñefo ayo shüdo nuna na kyeje lüshüw mapajome.

³³ Ñedzüñe No naksü kaltruğidamje, sešo nochi ñu kye je makatrujome.”

Shüwa Dashütrüvojo dawe

³⁴ “Sündada ufu je ksü üñi je ksü da ğyowe, ya ba badrü balu ye he druguw drulyiw ayo dashüw ge daşea kişeañe, shüjo djojo ge vyeşeañe da ğyomkoñbai ye jia, ñe se badru ge kyegüdü-ñiği kakugme.

³⁵ Hado chemeje i he añawa nomñew ñetrü ayo ğyodo nachi ge ana vyeduw dañe kakujobabi.

³⁶ Sündada chiğiñgudrujo dawe seyo küğüñgudrujo dawe, he ana a kyegüdü-ñiği kaku-damje ha madaw ğaksüfisejoñe, seyo nuna üsaw i vro a gudzufiwjo lyijo dawe.”

³⁷ Seyo se ñeto ge ñegru ge shi-ñu tru süna dawse; Seyo ñegi ge i nopsü ge jihuañe Jetun pudru ge ğyoñgudru.

³⁸ Seyo na je şüzüw ye tralye ichi ge jikuñe shi-ñu truw ye dzüjoñe ñegru ge jikuñgudru.

22

Jisu i shijo go küla

¹ Odje oğüme se i na ofo rhano chew, üñisa dabi.

² Seyo mügaw dew nañe shi-ñu zew naksü shüwa í kúndañe shijoma se í kadang hotumu, sé na nûna nayo ġew.

Yahuda Iskuriya ichi umsokulyu

³ Seyo mütü Yahuda ge kamyoa, djú Iskariyoti chew sünda í shürhaw ülgü ġü yo ksü namko ge i je duw.

⁴ I jiñe Mügaw dew ñe kulow kyew hotumuw nadra chitru, Tawgyew í kúnda lügyelajoma sena.

⁵ Na lüshülag, Seyo í na bo djüjome cheñe müdaa.

⁶ I je embi che, sündalye hotuma-hotumuhi, se í usso ge ñu majodügyew lügyeladügyejoñe.

Fasa í dashütrüw

⁷ Sese odje oġüme daw ñeto kakudabi, sese Fasa ge fugulu üsa ye che küġüw kijobabi.

⁸ Sünda Jisu i Patrasñe Yohañ naksü i ana cheñe ki, “Djeñe ñibó Fasa ge tsajo-tujo dashütrüvowe.”

⁹ I í dzütcho, “Ba nó hange dashütrüvoweñe tsüda?”

¹⁰ I ná che, “Howe, ñetrü ge kaakubyo-kakuġyowñe nûna a ye hu guw kolo lodow tüvajome, dju ñe ge i jihima; ba ifum jisajo dawew,

¹¹ Seyo sé ñe go übraw í chewe, ‘Dadrüwwa bá chemkoime; se tumóna ná ñe hagewa sa a no nó shürhaw nadra Fasa tsajo ye?’

¹² Bá i howsa yo dagüdravodaw üġüñ dew a shejome; süge dashütrüvowe.”

¹³ I jikubanda, i kûna chedama sünabyo-sünaġyo duvobi, sünda i Fasa í dashütrüwo.

Tawgyewchi müliñ driüpsü

¹⁴ Damdrü kuwñe, Jisuñe i shürhaw na nadra tsajobiñe ġyo.

¹⁵ Sündalye i ná che, “No nolu ge şüpyo ana vyewme, duhu makakulu kuw djodra ye ülya ana üşa ġyoñe ava tsajoñe vyewme.

¹⁶ Hado cheme no djó chemkoime, he i Tawgyew ichi nogo ge vyew makulu kuw no se í keje matsajome.”

¹⁷ Sese i bekasa lañe dru-lu yo şüvzüw gañe che, “He í lalyeñe djoġütchü ge habraġijo dawew.

¹⁸ Hado cheme je no djó chemkoime, Tawgyew ichi ġadzü madalu kuw no ayo dalalye keje he shejehu matujome.”

¹⁹ Sündatcholye i odje la, seyo üdrü-ulu yo küġüñe takuġia, seyo ná ana cheñe djü, “He i nó usso me, ha yé djobo djüwma: nó vyehuñe he ana dajo dase.”

²⁰ He ana dambo i tsaw tsafialye bekasa je ana cheñe la, “He i nochi sé şü yeme he i djobó fuadaw yeme ñu ükünüme.

²¹ Sé hojo dawew, nó kigoladügyejo ichi ügzü ye nodra a dume.

²² Hado chemeje nûna üsaw ye bó ibo kûna dawewñe dadama, sünambó dajobabi, séso tui se nûna idru ge, djobó sa a í kigoladügyejoma!”

²³ Sündawñe na naġütchü dzüġi-hoġingkoibi, “Ñimko a djuwa, he chiġa dajo ye?”

Djú dewñe vyefijowa?

²⁴ Namko a ana ñu che zeġi; ñimko a dju dew vyefijowa?

²⁵ I ná che, “Utro sama nago nugo na nadru ge shotuko joi; seyo dju nadru ge shotuko jofijo daima, se ná povow nûna chewme.

²⁶ Séso ba ana djulyiwe; mowme djomko a dju nugow dama, se i angasa vyeduw seyo dju ye ñubyu ma se i kulo vyeduw lyiwe.”

²⁷ Hado cheme dyew ye djuwa; se i buġo ge ġyodaw yeme, semome se chiġa damkoi yema? Hawa se i je mowma se tsawdra ġyodaw ye? Séso no djodra a kulo vyeduw bame.

²⁸ “Séso djo se na me, dju nodra ñiku-ñisüw ge je nodra duwsaw na me;

²⁹ Seyo sünambo vyeduw nochi Awu i nóbó ñetrü ükün a davyedama, sünambo no je djobó davyejome.

³⁰ Se i ye hadowo cheme djo nodra nó bugotrü ge tsawe-tuweñe; se psüga a gyoñe Israyel nachi go gübye güyoksü í zegüdralawe.

Patras i hujonoğyow ñihohuw

³¹ “Simon, oi Simon, djó mütü ye prüdame pu í dambo güjoñe.

³² Séso no djóbó kügüwme, djódrü-djolu go umsowñe vyedaw ye kyeje mañoajo seyo djo kakume djó nudzoğ alyo-ñuw na je güdükewe.”

³³ I í che, “He Tawgyewwa, no badra pache ge damje kasejo semome dzüjoje dzüfijobame.”

³⁴ I che, “Oi Patras no bá chemkoime, yow jo külyiwñe sese ba nó ülye dzü mahosüw chejome.”

Duhu gijo ye dashütrüvowe

³⁵ Seyo i í che, “Bá no dzulngasa seyo kapüga seyo shita je ñiw ufobüla kimkoi ge ba hama a mapu mavyaw dadama?” I chetcho, “Ha chi go mowme.”

³⁶ I í che, “Séso djuchige dzulngasa duma se na se i lawe, seyo sünambo kapüga í je, seyo djuchi ge kyeği ñima ná nachi gye na damje drütülülye lawe.

³⁷ Hado cheme no djó chemkoime, he gido ye, ‘Se i truw nüna ge ngüjobamme,’ se i nódrü ge dajoye krükrüwbamme; hado chemeje nogru ge küna dajoñe dadama se na datsüjobamme.”

³⁸ Na che, “He Tawgyewwa, howe, he a kyeği ksü duwa.” I ná chetcho, “Şüpyo dume.”

Jetun pudru ge Jisu i kügüw

³⁹ Sese na ñepsü ge jihuañe na dadaw basha yo na ge Jetun pudru ge jitsü, seyo shürhaw na nafum jisa.

⁴⁰ Süge jikuñe i ná che, “Kügüjo dawé, djo zeğaw ge magajoñe.”

⁴¹ Seyo i na yo utroga kunusa a josajombuaña ge jiñe, seyo üshipyu dugoñe kügümyomkoibi.

⁴² “He Awua ba tsübameje he bekasa ye notrü yo latrülyewe, sedamje nó husü yo mow bá husü yé dadzowe.”

⁴³ Sese soğgo go sorgomuko a í sa yo sa a hohu dju í zego dawma.

⁴⁴ Seyo babiye i şüpyo vyemülüaño vyemoaño kügükülyejebi; seyo ichi úfu ye no ge şü fuw vyeduw tra tra dzuamkoi.

⁴⁵ Sese i kügüfialye gudzülye ichi shürhaw nachi ge kakuñe hoholye vyew na drumsüdaw hoñe duhu da.

⁴⁶ Sündalye i ná che, “Hado drumuiya? Pülyibya, kügübya, na zeğow ge magajoñe.”

Jisu í tsülaw

⁴⁷ Jisu i süna chemkoi sese, howe upu a djelai ná, seyo se gü yo ksü namko a ye dju ñiñi ye Yahuda chewma i uvro uvro djekelaibi, i Jisutrü ge djeku, í bubu dajoñe.

⁴⁸ Sé Jisu i í che, “Oi Yahuda, hawa ba bubu daño nüna üsaw í kigoladügyejoma?”

⁴⁹ Idra yo na idra ha dajoma í hohuwñe, sünda che, “He Tawgyewwa, ñi keği dzofi-joma?”

⁵⁰ Seyo namko ayo a ye mügaw dew ichi kulo nadru ge keği yo dzohiñe ufu fuvo go dzoga.

⁵¹ Sé Jisu i che, “Sayo sa a damudoabe.” Seyo sa a ichi ufu ye kiñe dagyoi.

⁵² Sese Jisu i mügaw dafow na seyo ñegru ge hokrüvow go mükyefow na seyo kew se na ídru ge lyikülyedaw ná che, “Hawa djo nó ñiguduñe danghuñe keği ñe shalbo ñe lañe jikuma?”

⁵³ No djodra ñegru ge muhu-muhu djodra duw sa je sesüge djo nó gzü a je maki; sé hesahe djochi ümdrübamme, vatağüsagiahuw yo vatağüsagiahuwme.”

Patras ichi hujonoğyow

⁵⁴ Sündatcholye í na tsülalye la kakye, seyo mügaw dafow saw-lyiw ichi ñe ge lañe kaku seyo se Patras i üga-üga djega djegañe ifum-ifum djese.

⁵⁵ Seyo na nopsü ge mi pyeñe tchü üša ġyomkoi sese Patras je namko a ġyoa.

⁵⁶ Seyo se a kulom a ye í mi müsaw ge ġyokülyedaw hohulye seyo í usu yo hopafi hopaño chemkoibi “He i je üdra yo baba.”

⁵⁷ Séšo i ana che hujonoğyoa, “O mimya, no í madanghuwe.”

⁵⁸ Me uwalatchowñe utro a ye hotcholye chetcho, “Ba je nadra yo baba se.” Patras i che, “Oi nuna, no mowhoje.”

⁵⁹ Me uwalatchowñe nuna a ye dügago hoñe chengkotchoibi, “He i je nadrayobabiša; umsow cheme he i Galilibabi.”

⁶⁰ Sé Patras i che, “Oi nuna, no madanghuwa ba cheijema.” I süna chemkoi sese jo je külyijebi.

⁶¹ Sündawñe Tawgyew i tcholtruğiañe Patraschi ge ho, sündawñe Patras i Tawgyew i ñu chedo ye vyehu i ha chedama, “Yow jo makülyilu uvro ge ba nó ülye dzü kuw madanghuw cheñe hujonoğyoajome.”

⁶² Seyo i ñepsü ge kahualye şüpyo ku ku kuw kse.

Jisu i mülakulyuw

⁶³ Dju nuna ye Jisu í kigo dama, na í mülakulyuñe ġümyomkoibi;

⁶⁴ Seyo ichi iñi ye pyelyeñe í dzü, “Ñiholye trubya bá dju ġüima.”

⁶⁵ Seyo ana şüpyo nomñew zeaşe-zeameñe í maw-uw ze.

Kyew nañe seyo melye dew gzu

⁶⁶ Ñetoahuwñe naği yo kyew seyo müga dew shi-ñu zekyew-kikyew se na vyew keğitsü, sündalye í na melye dew gudo ge lakuñe chi dzü,

⁶⁷ “Sünameje ba Masimeje, ñi trujo dawel!” I ná che, “No djó trumsome djo nó umsow mavvejome.

⁶⁸ Seyo dzüdamje, matrufijome.

⁶⁹ Sešo ayo dalalye nuna üsa no sawlyiw Tawgyew ichi upo südzügo gow dañe ġyongudrujobi.”

⁷⁰ Sünchewñe vyew na chetsü, “Sünameje ba Tawgyew üsawma?” I ná che, “Djo cheñsoiwa, hado chemeje nobabi.”

⁷¹ Sese na che, “Yabó no truvoiyoje ha matsübi; hado cheme no bó nobyo no dzühuladabi.”

23

Pilatus i Jisu í ñu dzüw

¹ Sese vyew keğidaw nuna na gudzutsüñe Jisu í Pilatus ichi ge la jiku.

² Sündalye na ana cheñe ídruge külü jo, “Ñí i nuna ná zeğow seyo Kesar í patso i madadügyew seyo nudzo í Masi seyo nugomeñe chew dzühudame.”

³ Pilatus i í dzü, “Ba hawa Yahudi nago nugoma?” I í tru, “Sebó ba cheşoiwa.”

⁴ Sünchewñe Pilatus i mügaw saw-lyiw nañe se nuna ná che, “No he nuna idru ge ha je külü mahohume.”

⁵ Séšo nabó sünchewñe seyoje şüpyo mügzüw yo chemkoibi, “He i Galili yo dalalye age kuw Yahudiya ná vyew shi-ñu tru truñe truğolatsüdame.”

⁶ Süna dzühulye Pilatus i dzü, “Hawa he nuna ye Galili ñetrü goma?”

⁷ Seyo he í danghula i Herodes ichi shotuko ulungo nuna dabi, í Herodes itrü ge kitcho, hadowo cheme sé ñeto ge i je Yarusalem ge duvo.

Jisu í Herodes ichi ge kiw

⁸ Herodes Jisu í hohulye šüpyo lüshü, hadowo cheme šüpyo uwalaw gomdo í hoñoñiw vye: se i ye hadowo cheme ifogo dzühuda, seyo ichi chi ashama asha ye sheweñe ve.

⁹ I í šüpyo ha ha ñu dzü, se i í ha je matru.

¹⁰ Seyo se müga saw-lyiwñe shi-ñu zekyew naksü ulung ulung ge í ze.

¹¹ Sese Herodes i ichi nuna nadra ye í zeaše-zeameñe zekütso zemürhü, seyo iği ğiguw gye ye sheisalye ge Pilatus ichi ge kitülütcho.

¹² Sehu ñeto yo Pilatusñe Herodes naksü üdraw lya. Ana madalu. Sevro ge naksü mahoğiw.

Pilatus i Jisu í shiweñe düm takyoo

¹³ Pilatus i mügaw saw-lyiw í seyo nuna na balañe ná che,

¹⁴ “Djo he nuna í nuna ná zeğoi me cheñe nochi ge lakuda, seyo holaşoa, no djó how a í dzü howşobi, se djo ha ñu yo iso ge külü joima, se ñu yobó no hasaje ichige külü mahohu;

¹⁵ Ge Herodes je mowbi, hado cheme i í nochi ge djültrutchodabi: seyo holaşoa, i düm takyolaje shimdojo ana haje mada.

¹⁶ Sündada no í shidzü trabañebi”

¹⁷ Pilatus i rhanomko a nuna a tsüla vyedaw ye kihuajobabiñe lya.

¹⁸ Sündawñe vyew na şogzutsü, “I damtrüabei, seyo ibó Barabba i trajodawe.”

¹⁹ I ñetrü a ye pseği-luğine, shiw-law dadaw ubo go pache ge shüñe vew.

²⁰ Seşo Pilatus i Jisu í trajoñe vyeñe nuna ná che hopüñetcho.

²¹ Seşo nabó şogzuñe che, “Í kuros ge külyiwe, kuros ge!”

²² I ülye dzü kuw ná che, “Hado cheme i ha mau damdoda? Nobó í düm takyoñe shimdojo lalo daw mahohubei! Sündada no í gidüñe trabañebya.”

²³ Seşo na şogzu-şogzuñe zetsü, í kuros ge külyimdoweñe, sünda ná şozuw ye foajebi.

²⁴ Ha madanghulye: Pilatus i dügyeaha, na ha cheima sei dzülye dawwe cheñe.

²⁵ Seyo i se nuna vyesvye-vyemdolalye nuna shido í pache ge shüdaw ye, seyo djú í prüwma í trase; seyo Jisu í na nalu ge ha vyedama süna vyew apyew kuw djüki.

Jisu í kuros ge külyiw

²⁶ Na í lañe kakemkoi sese, Simon cheñe Kureni a ye ñetrü go kanglai sa a, í kigo lalye shokru giñe Jisuchi ge lakuñe ifum ifum la kake.

²⁷ Seyo nuna ye gumtchubabiñe ifum ifum kase: seyo şüpo upu mim na je, dju ibó üldjetchü gü gü kseñe ksekuğiladjew.

²⁸ Jisu i nachi ge tcholtruğialye che, “He Yarusalem ayo sam nawa, nóbo djuksejoda; seşo djo josa seyo djó nudzoğbó ksejoda.

²⁹ Hadowo cheme se ñeto kakujome, seyosa a nuna na chejome, ‘Şüvzüwme se na dju ügübzümme, seyo dju saw-sam masakülyema seyo dju agü apu manuma.’

³⁰ Se ümdrü ge

‘Na pu naje chejome, ñidru ge gaabe,
Seyo noğüfo yo ñi muşuiwe.’

³¹ “Hado cheme na shoñ djüw nadra ana damkoibi ye, krow nadra küna ha dañjema?”

³² Na seyo nuna ksü ije lalo datruw go idra ye shijoñe la jikye.

³³ Na se Kopri che Noğüfo ye jikuwñe, na sayo sa a í seyo se lalo datrudo ksü ye je, a ye ichi südzü go seyo a ye ichi fuvogo ge süna kuros ge külyiñe vye.

³⁴ Sündawñe Jisu i che, “He Awuwa, ná muchoaiwe, hadowo cheme he na madan-ghume na ha dangkoima?” Sünda na kako ge ği veñe i gye í habrağia lastü.

³⁵ Nuna na gudzu-gudzu hoğyo, seyo nugo na je zeaše-zeameñe ze ğyo, “I utro na ğaksülaw, i Tawgyew ichi Masimeje, seyo ichi dzulawmeje, nudzoğ ğaksülajo dawwe.”

³⁶ Rhünokyew naje í trow uhu ye í nuñe zeaše-zeameñe che.

³⁷ “Senameje ba Yahudi nachi go nugomeje, ba bá nudzoğ í ğaksülalabya!”

³⁸ Seyo idru ge truw a chedalubi; “He i Yahudi na go nugome.”

Shokru ge dru-lu vyeğüdolaw lalobraw

³⁹ Ha lalobraw ye shokru ge külyi suntchadama, namko a yo a ye í zebze-zeğene che, “Hawa ba Masi moma? Sünameje ba balvyo ġaksüñe seyo ñiksü i je ġaksüila!”

⁴⁰ Sünchewñe utro a ye í zeñe che, “Hawa ba Tawgyew í je mağewbama? Ba je süna pabaibi,

⁴¹ Seyo ñiksü bó shotukobasha yo pangkobabi, hadowe cheme ñibó ñi chiğa ha dadama süna shishü pangkobi; séšo i haje mau chiğa mada.”

⁴² Sese i che, “He Jisua, ba bá ñetrü kakuwñe nó je dju koşoawe.”

⁴³ I í che, “No bá umsow chemkoime yow yo ba nodra sorgo nogo ge dujome.”

Jisu i lutukyohuw

⁴⁴ Seyo muhumdzu yo dalalye me apyew djüdualai kuw ye vyew ñetrü na nukuğuatşüdabi,

⁴⁵ Seyo dru müsaw yebó je kañoahibi, seyo ñegru go gyeña bó je ulumko toñe-meñe yo gağaa Jebi,

⁴⁶ Seyo Jisu i şüpyo gow yo şogzuñe che, “He Awuwwa, no nó ġulo ye bagzü ge trahime.” Seyo i süna chelye ulvyu sese lutukyoaha.

⁴⁷ Ġyokrüw nüna ye sa a ha dadama se na holye i Tawgyew í tro, sündalye che, “He nüna ye güdraşobi.”

⁴⁸ Seyo upu na he í hojoñe keğitsüdaw na, he şoboşulyw dadaw í holyeñe nalüjetçü ge güñe kalütrü.

⁴⁹ Seyo ichi hosüw-holüw küña duma vyew, seyo mim na je dju dju idra Galili go jikusedama vyew, üğa ge gudzuñe se na ho ġyo.

Yusuf i Jisu í iyo ġuahuw Arimitiya go nolu ge

⁵⁰ Seyo süge, Yusuf cheñe yo nüna a ye se rhano dew ge du, dju ye uw seyo chi danghuw muhu.

⁵¹ Seyo ichi vyéw seyo ichi chiğa daw yo malüşüw; seyo i Yahudi na ñetrü go Arimitiya ge ġyow seyo Tawgyew ichi nogo ye ġyokrüw nüna.

⁵² I Pilatus ichi ge jiñe Jisu ichi ñimo ye prü,

⁵³ Seyo í lagaalye gylüdü yo daw gyeña ge vaşüñi, seyo nuğu a ye vye, se i ye kunu ge chido süna; seyo süge keje dju je mavyewlu.

⁵⁴ Se i ye dashüwtrüw ñeto, seyo ġyogow rhano damivrojo ümdrü ge.

⁵⁵ Seyo se mim na dju idra Galili go jikusedama, ifum, ifum jiñe se nuğu ye ho seyo uso je ho í daw basha yo da vyedaşomañe.

⁵⁶ Seyo kakultruñe şowsa chi seyo şonuw dashütrü; seyo ġyogow ñeto ge bó i je daw basha yo ġyogo.

24

Jisu í üşükülyew

¹ Sopta uvro ge, sağa-müğa na nuğu ge şowsa şow gañ-miği lañe jiku.

² Sünda na kunu í ġühuadaw hohu.

³ Sünda ulung ge jemyongkoi ge, na Prabu Jisu usso mahohubi.

⁴ I he ñu yo mavenghuañe ġyoñbaiye, muhu ksü ye lütsü-lütsüw gye sheñe ütrü iñisa ge gudzu.

⁵ I ġeñe, sünda nodo ge ukrumro i pelye; sündawñe i í che, “Ba üşü í dzüw namko ye hado tchüwwa.

⁶ I ayo a ñimme, séšo üşükülyedamme. I djo Galili ge ha trudama vehujodawe.

⁷ ‘Umsogo je nüna üsa í lalobraw nagzü ge kigo ladügyejobamme, sünda kuros ge tükegojome, sünda ñegi dzü ye üşükülyetchojome.’ ”

⁸ Sündä i í ñu í vehuag,

⁹ Sündä nuğu go kangkoi ye i se ġüyo a ná, sündä utro naje, he vyow ñu ná tružeġiatsü.

¹⁰ Dju he ñu í shürhaw ná trudama, se na Mariam Magdalini seyo Yoana, seyo Yakub üyañ Mariyam sündä nadra ye utro mim naje duw.

¹¹ Séšo na ñu trudaw ye ná shipyew truw veduw velada sündä na ná umso mave.

¹² Sündawñe Patras i gudzulyiñe nuğu ge gyo dje, sündä gye ufobüla hohubadabi, sündä hadadama, se yo mavenghulyaha, í nudzo ñe ge kaltrutcho.

Imawus ġabo ge shürhaw na how

¹³ Sehu namko ye nüna ksü ye Imawus cheñe ñetrü ge jiiñgkoi, Yarusalem yo kilo mitar mro kuw üğa.

¹⁴ Sündä naksü se vyow ñu ná, hadadama se na naksüġütchü chitruñe ji.

¹⁵ Sündä naksü se ñu na naksüġütchü ge truġiñe dzüġiñe jingkoi ye, Jisu i iñisa jikuñe naksü üdra jisa.

¹⁶ Séšo nañi ye ana veduw mütrüdaw ye í mahosülañi.

¹⁷ Jisu i ná dzü, “He ha ñuwa, djoksüġütchü ge truñe jiiye.” I duhu dañe ġudzu.

¹⁸ He í dzühulyeñe, namko ye Kilyupas ñetrü go nüna a ye che, “Haña ba Yarusalem go ba akasa tüvwaw jiw nünabamma, dju he ñeto ge hadadama se na se i madanghu.”

¹⁹ I í dzü, “Ha ñu ye wa?” Na í che, “Nazret go Jisu ibo dju Tawgyew seyo nüna nabo chiġa dawma sündä shi-ñu truw go ñihow truw.

²⁰ Sündä mügaw kew na seyo ñi dümbraw dakyew na í kigoladügyeñe, shibeñe dügyeaha; sündä kuros ge sümtchadügye.

²¹ Séšo ñi vyeksüwšo, i Israyel í mutchoaijo che, sündä he ñu na tralye, he soboşulyuw dajew ye ñeġi dzü kujebi.

²² Sündä jimko ye je mim üchea na ñi mavenghuadügyeda, dju saġa-müğa nuğu ge jidama na.

²³ Sé usso í mahohuwñe, sorgomuko nadra í üshüdame cheñe ñu truw che djekuda.

²⁴ Sündawñe ñimko yo a ye nuğu ge how ji, sündä mim na küna trudama, süna tchülada; séšo í mahohu.”

²⁵ Sündawñe Jisu i ná che, “O madzühoave dañe ġyodaw nawa, seyo ñihow truw ná ñu ge üdrü-ulu yo umso dzüngahu nawa!

²⁶ Ana dajo mowma, Masi i duhu gilañe nudzo lüshüw ge kalyitralyejo?”

²⁷ Sündä í ná ibo go kako ge ha ġidama se ye Musa ichi yo dalalyeñe vyow ñihow truw nachi ge ġidaw na, i ná danghudügye.

²⁸ Aña sa a na hange jingkoima, se ñetrü jikujebi, sündä í dawyo na ana danghuda, i ayoje uvro ge jijolu cheñe.

²⁹ Sé na í ana cheñe ġokrüdügye, “Ñidra ġyosajodawe; hado chemeje djüdu lyañe aña uwaladabi.” Sündä i ulung ge nadra ġyosaw kamyoa.

³⁰ I nadra ava tsajoñe ġyosangkoi ye, i odje í lañe gaġüzü djü, seyo í takuġiañe ná djü.

³¹ Sündawñe nañi hojukülyeñe í hosülag, sündä na iñi how yo müşü.

³² Na naġütchü ge che, “Ñidrü-ñilvyu ge mi madzoma, i ñi ġabo ge kako ge ġidaw ná truñe jomkooi ge?”

³³ I sa yo sa a gudzulyiñe Yarusalem ge katrükralye, sündä i se ġüyo a seyo nadra a yo na üşaka ye keġidaw hohu.

³⁴ Na che, “Tawgyew umsogo je üshükülyetchoda, sündä Simon i hohu.”

³⁵ Sündawñe i ná ġabo ge chitru jidaw na ná tru seyo he je tru, i ná kündañe odje í takuġiañe tsadama.

Jisu i í nudzo shürhaw nadra

³⁶ Na he ñu í trumkoi ye, Jisu í husü yo namko ye gudzukülye; sündä ná che, “Djo ġüdzüw pawe.”

³⁷ Séšo na mavenghuatsüg, seyo êatsüg, sündañe na velatsü, ñi mütü hohungkoi.

³⁸ I ná che, “Hado mavenghuatsüña? Sündá djulvyu ge hado mavenutsüña?”

³⁹ No gzü seyo noshi na howe, no sebamme; no kiñe hojodawe; hado chemeje ñeêgulo nachi uso ügübye ñijo nochi ge hohumbo.”

⁴⁰ Ana chelyeñe ná i ichi ügzü ishi na she.

⁴¹ Ná lüshüw yo seyo umsojemañe veñe, seyo lümashü ve, sündawñe i ná dzü, “Haña djochi ge ava дума?”

⁴² Na í psekrow tchükro üsüla a djü.

⁴³ I lañe na how sa a tsag.

⁴⁴ Sündá i ná che, “He na no ñu name, no djodra êyosañe truwme, Musa í shotuko ge seyo ñihow truw kuw na seyo kako ge nobo go êidaw na umso kaküleyjome.”

⁴⁵ Sündá i na ükye-ümüñi í güdraw ñu êidaw dzüsüdügyejoñe voiha.

⁴⁶ Sündá ná che, “Ana êidame Masi duhu gilañe seyo ñegi dzü ye dzüñe üshükülyetchojome,

⁴⁷ Sündá Yarusalem yo dalalyeñe vyow êübye geg vetrüw seyo lalo daw na iñiñ yo lañe truzeêiatsüjo.

⁴⁸ Djo he ñu na hohusawme.

⁴⁹ Sündá djuchi trašüga no awu i dadama, se ná no djo lakülyaijome sündá udru go gow mapamdolu, süña kuw djo he ñetrü ge êyokrüjo dawé.”

Jisu í ñedzü ge katcho

⁵⁰ Sündá i ná Betnyah kuw ñepse lañe jekülyasa, sündá ügzü i lañe ná gaêüzü djü;

⁵¹ Sündá ná gaêüzü djüshüñe i na yo utro lya seyo ñedzü ge kalyitrallye.

⁵² Sündá na mraañe í šüpo lüshüw yo Yarusalem ge katrükralye.

⁵³ Sündá ná ñegru mamuduw keêiñe Tawgyew í troñe seyo gaêüzüwe.

Philemon iñiñ güdraw Polus üsam

Ĝiw

He kako í ĝiw braw ye Polusme. He kako ha a Polus i Filemon í i Unesimus i ichi ge kitchojomeñe che sünda Kulu 4:9 ge Unesimus i Tukikus üddra Kulusse ge jimkoi sese Tulukus i Filemon i Polus ichi kako i djü. He ye šüvzüw ñume Polus i he kako i nudzo ügzü yo ĝidaw ichi gō vyow na shetsüjoñe.

Ĝiw übraw ichi dzaga

Oje 60 kuw.

Filemon í he kako ĝingkoi ñeto ge Polus i Rom go pache ge shü veda.

Lajovo

Paulus i he kako ye Filemon í ĝida, Arkippus í girja ñe ge sünda ñi ñum Apphia í. Kako ĝidaw í holyeñe vemeje he kako ye Filemon í ĝibadabi.

Ha ma a vew

He kako í ĝiw ge Polus i Unesimus í i übraw ye ichi ge lakutchoweñe ve ĝidame (Unesimus ye Filemon ichi kulo tsaksulalye kaksudaw ye) sünda í sojai djudjüwe. (10-12, 17). Sünda sesüyo, Polus i Filemon í kulo veduw mowdaye “nudzo uñuw” veduw veweñe veda. (15-16). Unesimus i yaje Filemon ichi bo-luko ubo go lubi seyo Polus i ubo ĝabo davoĝoñ ve hado chemeje Filemon í lajovowene veñe. Polus i shi-ñu truw ubo sa Unesimus i Tawgyew í ĝaksüla. (File. 10).

Ñustu gow

Kahuahuw.

Udrüla

1. Abiwadan ____ 1:1-3

2. Abarokti ____ 1:4-7

Unesimus ubo ñu chegüdraĝiw ki ____ 1:8-22

Damdzualai shi-ñu ____ 1:23-25

Dašüvzüw

¹ Polus ichi go bó, se Jisu Masi ichi pache ge shüdáw nüna, seyo ñuw Timotiyus ichi ve go ñichi nülvo chiĝadam Filemon,

² Seyo ñum Afiya seyo ñidra yo shipashi Arkipusñe Filemon ichi ñe go ñešü na ñiñi.

³ Ñichi Tawgyew awuñe Tawgyew Jisu Masi naksü naksüchi vye go ĝüdzüw ye bá pangudruwe.

Šüvzütroi ñe Küĝüw

⁴ No shüwa Tawgyew í šüvzütrojome; seyo nudzo küĝulai ge je bá vyehuwme.

⁵ Hado cheme no bachi sé nülvo seyo vyemso chi shi-ñu na dzühulye, se Tawgyew Jisu dru ge seyo vyew güdraw nüna nadra.

⁶ No küĝujome se vyemsodaw ge bachi üdra ayo na hadamje uw ñu ge danghusajo dawwe ha ye Jisu Masi ichi yo ñidra dusama.

⁷ Hado cheme noñuwwa, nó bachi nülvo yo šüpyo lüshüw seyo ĝüdzüw padame, sündada, ba yo dañe güdraw nüna nadrü-nalu hu je adjüdjüw no je aĝimiw pajome, uñuw nawa.

Unesimus ibó küĝüw

⁸ Sündada sedamje noje Jisu ge šüpyo bolu duda, se ha ñu ye udama, se í bá dügyejo.

⁹ Sedamje no vyeduw mukro Polus i se yabó Jisu Masi ibó pache ge ĝyow nüna babi, se ayoje šüpyo nülvo yo ibó küĝüjolu.

¹⁰ No nosaw Tawgyew go Unesumus ibó no yo nochi sülyeñtchü ge sakülye dame no yo kügüime.

¹¹ Se ibó ahuge ha madaği w a ba, se yabó ba ñe seyo nochi dew chiğa tsüwbaba.

¹² Se í ñe seyo dju nolu ge kadama, no se í bachi ge djütülütchowba.

¹³ Í no nochi ge vyejoñe vyeahomacha se í bó bachi vye go shüdabi shi-ñu ibó yo sülyeñtchü sumbo, nó datunowe.

¹⁴ Sé no ba mahusüw haje madağon se bachi he nülvo djüdo ye datüdalüw yo mow lüshüw dawe.

¹⁵ Hado chemeje ha danghuñda i ba yo ksühua dzühua kuw he ibó utro lyadawa shüwa bañisa ge gyojoñe.

¹⁶ Sešo ayogo kulo mavyeduw, kulo yo je dewfo, seyo ñuw vyeduw gýowe se nochi drü-lü ge duw süna nülvobó sešo, se yabó usofu ge je seyo gulo ge je, bachi je drü-lu ge sünda Tawgyew ge.

Filemon ichi dügyew dzüw lüshüljow

¹⁷ Senameje ba nó bachi nudzoğ dakyetunowñe vyedameje, se na vyeduw yo shutro-lajodawe.

¹⁸ Chemeje se nó bachi ha damje damdalyoama semome sa a bachi ha damje a kakuw, se í nochi üñiñi ge giwe.

¹⁹ Polus no nó gzü yo gijome, se i no bá gígujome; seyo ichi chejoje ha madaği, se no añawa he daado na badru me se i babamme.

²⁰ He no ñuwwa, he lüshüw nó bachi Tawgyewwa nó bachi go pawe, Tawgyew ge nodrü nolu ye hu je adjüdjüw no je ağimi w daiwe.

²¹ No bachi dügyew dafi w dajo umsow vyeyeñe, bá gımkoime seyo he ana danghuwme, se no ha cheima, ba se í foje lübzüw daijo.

²² Seyo he i je, nobó gyojo buğo dashütrüvowe; no süna umsow vyedame, se bá kügüw trüdu yo noje no bachi ügzü ge djüjome.

Mülün şüvzüw

²³ Ifras se Jisu ge nodra pachesüw ge

²⁴ Seyo se Markus ñe Aristikurs seyo Demas seyo Luka seyo no chiğadam.

²⁵ Ñichi Prabu Jisu Masi nülvow ye bachi gıulodra duwe. Amin.